

# إكتشفتُ زَوْجِي فِي الْأَتُوبِيسِ

دعاء عبد الرحمن  
(مشاعر غالية)

دعاء عبد الرحمن



اكتشفت

زوجي في الاتوبيس

سأقص عليكم حكايتي  
ولكن أرجوكم تمهلوا قليلاً قبل أن تطلقوا الأحكام  
فما مررت به ستمر به فتياتكم وبناتكم إن لم تنتبهوا

فاحذروا !

( ١ )

أنا اسمي " منى " فى المرحلة الثانوية ومدرستي للبنات فقط ، أنتمي للطبقة المتوسطة والتي تكاد تندثر ببلدنا، محجبة ، " طارق " هو أكبر إخوتي وهو متزوج ويسكن بالجوار ويليه " هشام " وهو خاطب من فتاة تكبرني بعدة أعوام ولكنه يعمل فى إحدى الدول العربية فى الوقت الحالي .  
أنا أصغر إخوتي ووحيدة جدًا جدًا ، أبى مشغول دائمًا فى عمله أو مع أصدقائه؛ لذلك كانت أمى هى المسئول الأول والأخير عن كل شىء يخص المنزل أو يخصنا نحن الأبناء.

أمى كأي أم مصرية عادية للغاية ، طيبة، ومطبعة لوالدي لأقصى حد من الممكن تصوره ولا تستطيع حتى مناقشته فى الأمور اليومية فهى لا تجيد أمامه سوى كلمة " حاضر " ؛ لذلك لم يكن من الغريب أن أصبح ما أنا عليه الآن ، شخصية مهزوزة .. متوترة .. أتطلع إلى أصحاب الرأي وكأنهم من كوكب آخر .. التقليد منهجي والنقمة على حالي من أهم هواياتي ، فلم يكن قاموسي يحتوى سوى على نصف الكوب الفارغ فقط وذلك كان سبب جميع مشاكلي فيما بعد .

وخلال ثلاث سنوات كاملة ويوميًا وفى طريقي إلى مدرستي الحظ " طارق " أخى الأكبر يمشي خلفي ويراقبني دون سبب وكأننى مجرم تحت المراقبة والمضحك أننى إعتدت على ذلك وهو لا يعلم أنى أراه من الأصل ، كنت مستسلمة تماما لما يحدث حولى وكل ما يهمني هو الخروج من هذا المنزل فقد سئمت تساؤلاتى حول شخصيته المتشككة فى كل امرأة وفتاة على وجه البسيطة لا يتعب ولا يمل ، حتى انتهى العام الدراسي الأخير بشق الأنفس وقد حصلت على درجات تؤهلنى بالكاد لدخول كلية الشعب " التجارة "

أول يوم دراسي بالجامعة كنت كما يقولون " زى اللى كان فى جرة وطلع برة " دُهشت بشدة عند رؤيتي لكل هذا العدد من الشباب والرجال " إيه ده كل دول ولاد ؟ كانوا فين دول !! "

وكرد فعل طبيعي زاد إنطوائى وخِفتُ أكثر وأصبحت أذهب للكلية وأعود وكأننى سراب أو غير مرئية ، إلى أن قابلت " سماح " .

كانت " سماح " زميلة لي فى السنة الثانية من المرحلة الثانوية ثم تركت المدرسة وانتقلت لمدرسة أخرى لانتقال أسرته إلى مكان إقامة جديد فلم أراها منذ ذلك الحين ومن الأصل كانت معرفتي بها معرفة شكلية فقط وتحية بعيدة فقط ، حتى قابلتها فى الكلية وتعرفت عليها برغم من تغير ملامحها قليلا بفضل طبقات ألوان الزينة المترامية فوق بشرتها وعينيها وطلاء شفثيها الداكن لدرجة غريبة ، مظهرها الجديد أقلقتي وجذبني فى نفس الوقت ولكن طبيعتي الجبانة أمرتني أن أستدير وأنصرف دون أن أكلمها، ولكنى فوجئت بها تحت الخطى نحوي بابتسامة واسعة وهى تقول :  
- أنت كنت معايا فى مدرسة ( ..... ) صح ؟

احتضنتني بشدة وأنا فى حالة ذهول ودهشة وفرحة وابتسامة بلهاء !

فى يوم وليلة أصبحت "سماح" صديقتى الحميمة وصارت وجهتي وقدوتي ومثلي الأعلى فى كل شىء ، كلمة تقليد كانت قليلة على ما كنت أفعله ، ولكن بينتي كانت تحكمني فلم أستطع تغيير طريقة

اختياري لملابسي ولكني كنت آخذ مجموعة ألوان الزينة بحقيبتني وعندما أدخل بصحبته حمام الكلية أضع الألوان على وجهي فتتغير ملامحي تماما وكأني أخرى لا أعرفها ولكني أحبها هكذا متمردة !.

"سماح" كانت سعيدة جدا بي وقد أصبحت كالعجين بيدها تشككني كيفما تشاء وقد كانت تعلم بمراقبة أخي لي في البداية فتأخذني وتخرج بي من أبواب أخرى بخلاف باب الكلية المعتاد وكنت أنا منبهرة بالمغامرات التي تقودني إليها ، وسعيدة بأن مراقبي قد مل من كثرة عدد أبواب الجامعة وتفرقها فعدل أخيرا عن فكرة المراقبة ووجه طاقته نحو زوجته ومضايقتي في المنزل فقط !

أتذكر خفقان قلبي للمرة الأولى وأنا أخطو بداخل أحد دور السينما وأنظر حولي كالبلهاء وكأنها كوكب مختلف عن كوكبي .

بعد عدة أشهر أصبحت تلك الأماكن معتادة لدي وأصبح الكذب على والدتي اسمه ذكاء وفطنة وتحرر من القيود وبالطبع كان من النادر تواجدنا في مدرج الكلية ، ورغم كل ذلك فكل ما فات كان أبسط بكثير مما هو أت .

في أحد الأيام وأثناء جلوسنا بكافتريا الكلية مالت "سماح" بجزعها مستندة إلى الطاولة وهي تقول بسام :

- أنا زهقت من الفسح والخروج ، ماتيجي نغير شوية  
- إزااي ؟

ابتسمت سماح وقالت :

- تيجي نروح عندي البيت أفرجك على البومات صور من ساعة ما كنت صغيرة لحد دلوقتي ونقعد في البلكونة أحكيك على مغامراتي ، يعني أهو نضيع وقت وخلص قلت بتردد:

- لا يا ستي هاتكسف من أهلك

زفرت "سماح" بقوة ثم قالت :

- ماتبقيش هبلة ، بابا وماما عساسيل خالص ومتفتحين وبعدين إحنا هنقعد في أوضتي يعني هنبقى براحتنا خالص

وبتفكير وبيعض القلق المشوب ببعض الحماس قلت :  
- ماشي

منزلها كان أنيق للغاية مما جعل حالة القنوط وعدم الرضى على حياتي ترتفع معدلاتها لأقصى حد وبالأخص حينما قابلت والدتها ووالدها قبل أن يخرج لعمله ورأيت أن هناك نوع آخر من الآباء من الممكن أن يضحك مع ابنته ويضمها بفكاهة ويبتسم ويرحب بصديقتها ، والأغرب أن والدتها قالت له في إحدى عباراتها كلمة " لا " فهل هذا معقول ؟!

دقائق وذهب والدها لعمله بينما التقطت والدتها الهاتف وأخذتني "سماح" لغرفتها وردية الطلاء ، غرفة رائعة رغم بساطتها ورغم احتوائها على كل ما تحتاج بالإضافة إلى مساحة واسعة للتحرك بسلاسة عكس غرفتي التي بالكاد تتسع للسريير وخزانة ملابس صغيرة وجهاز الحاسوب الذي لا أفقه فيه شيء سوى محادثتي أنا وأمي الأسبوعية لأخي "هشام" عن طريق برامج الاتصالات عبر الشبكة العنكبوتية فهي أرخص بكثير من محادثات الهاتف .

- إيه يابنتي فوكي كده وخاليكي براحتك أنت في بيتك

- أفك إيه ؟

لوحث بيدها وهي تقول :



- طيب يا سماح هنشرب النسكافية ونمشى.. أنا محرجة جدا

هتفت سماح بنزق :

- نعم ياختى أنا هاضرب المشوار ده كله علشان النسكافية .. كنا شربناه فى أى حته وخلص ..

البيت بعيد يا منى بلاش إستعباط

صمت مستسلمة لرغبة سماح وبعد قليل طرق سماح باب الغرفة فعدلت من جلستى سريعاً وسماح

تهتف :

- أدخل

فُتح الباب وأدخل سماح رأسه بطريقة مضحكة وقال بتفكه :

- تشربوا شاي معايا

سماح:

- أه إعملى معاك

فنظر لي ووجه حديثه نحوي وكأنه يعرفني منذ زمن :

- وإنت يا منى تشربى شاي؟

قلت بحرج بالغ :

- لا شكرا

سماح بتساؤل:

- ليه مش بتحبيه ؟

منى:

- لا مش بحبه

مط شفتيه بأسى وهو يقول :

- يا عذابه

شعرت بالدماء تندفع بأوردتى بقوة وتلون وجهي لكلمته ، دقائق أخرى قليلة وعاد سماح حاملا معه

صينية بها أكواب شاي له ولأخته وكأس عصير لي ووضعها أمامنا وجلس وهو يقول ببساطة:

- ممكن أزعجوا شوية

سماح:

- بتستاذن ، مؤدب أوى يعنى

ابتلعت لساني وأنا أنظر إلى سماح وهي تلتفت إليه وتقول باهتمام :

- أحكىلى بقى محمد صاحبك عامل إيه

سماح:

- كويس الحمد لله .. بيحاول يشيل السلاح بس فى الغالب السلاح هو اللى ببشيله

وجدت نفسي أبتسم رغماً عني ورغم اندهاشي ليس من سؤالها فقط وإنما من رده وكأنها تسأله عن

الطقس مثلاً وحدثت نفسي " أياه ده بتسأله على صاحبه عادى كدة .. وهو بيرد عليها عادى خالص ..

ده أنا لو أخويا طارق عرف أنى فاكرة اسم صاحبه يقتلنى"

جذبتني عبارة سماح من شرودى عندما قالت:

- هو محمد مش جاى معاك الأجازة دى ولا إيه؟

سماح:

- لسه نازل بكرة

سماح:

- ياخسارة لسه بكرة ده قعدته ميتشبعش منها

سماح :

- بكرة هايجي عندنا طول اليوم يقرفنا إبقى إشبعى منه براحتك وريحيني من إزعاجه شعرت بأن عيني تدور في مكانهما كما يحدث في أفلام الرسوم المتحركة وابتسامة بلهاء مرتسمة على وجهي بمنتهى السذاجة وأتمت بداخلي " ينهار مش فايت !! عادى كده ؟..  
هما فيهم حاجة غريبة ولا أحنأ اللي عايشين فى كهف"

ومرة أخرى يجذبني حديث سماح ليخرجني من حالة البلاهة التي أعاني منها ببعض المواقف المضحكة والنكات التي استمرت طوال جلسته معنا وخطوة خطوة ذهب الخجل أدراج الرياح وعلت ضحكاتي بل وتفاعلت معهما بما أحفظ من نكات مضحكة وأصبحت الجلسة حميمية وكأننا أصدقاء منذ زمن بعيد ، وفي النهاية رأيت سماح تمسك برأسها وقد تجعد جبينها بقوة وهي تتأوه ثم نهضت تبحث عن دواء مسكن.

فقلت بحرج :

- طيب أنا هقوم أروح بقى

حاول سماح أن يثنيني عن رغبتى فى الرحيل ولكننى رفضت بتهديب فقالت سماح بتأوه وهى تضغط جبينها :

- أنا مش هقدر خالص يا منى معلش

قلت لها بهمس:

- مش قولتى هتيجى تعرفينى أروح أزاي أنت بتستهلبلى هتفت بعصبية:

- إيه يا منى ... مش شايفة دماغى هتفرقع إزاي

وتابعت وهى توجه كلامها لسماح :

- معلش يا سماح ممكن تنزل مع منى تعرفها الطريق أصلها أول مرة تيجى هنا سماح:

- معلش ليه يا سماح مفيش مشكلة خالص أنا فاضى

رفضت اقتراحها بانفعال فغضبت بشدة وهنا تدخل سماح قائلاً ببساطة :

- إيه بس إنتوا عاملين أزمة ليه .. مالك بس يا منى فيها إيه لما أوصلك هو أنا مش زى ابن خالة مرات عمك ولا إيه

ابتسمت رغباً عني على أثر دعابته فكأن ابتسامتي كانت تعني رضوخي وموافقتي فقال وهو يتجه نحو الباب :

- خلاص أنا هنزل أستناكى تحت هاسخن الدبابة على ما تنزلى ، حملت حقيبتى ورمقت سماح بنظرة عدم رضى وعتاب وتوجهت للخارج خلفه تماماً، صافحت والدتها وغادرت منزلهم سريعاً وعندما وصلت للأسفل وجدته فى انتظارى وبمجرد رؤيتي رفع يده وهو يؤدي التحية العسكرية قائلاً بروتينية مصطنعة :

- تمام يا فندم ، حاولنا نسخن الدبابة بس واحنا بنسخنها نسيناها فى الفرن فاتحرقت يا فندم

كل مرة كانت ابتسامتي تزيد وتتحول لضحكات لا تنتهي ، سرنا فى طريق طويل إلى حد ما ، حتى وصلنا لمكان السيارة الوحيدة التي يمتلكونها ، وهي السيارة الخاصة بوالده فلقد تركها اليوم لابنه وغادر بدونها، كنت أريد الجلوس فى الكنب الخلفية لكنه قال بطريقة عسكرية :

- أنا كده هبقى سواق حضرتك يا فندم

فضحكت وركبت بجواره فى المقعد الأمامي وكان هذا التنازل ضمن كمية التنازلات الكثيرة التي قمت بها اليوم معه ، المدن الجديدة هي عشقي لذلك لم تترك عيني النافذة وأنا أتابع الكئيبان الرملية



والمباني البعيدة التي لم يكتمل بناؤها بعد وبعض الشجيرات القليلة المزروعة على حافتي الطريق والهواء يضرب وجهي فأبتسم بانتشاء.

إنترعنى سماح مما أنا فيه من استمتاع بالطريق بسؤال مباحث قانلا:

- منى إيه رأيك نبقي أصحاب؟

عقدت حاجبي متسائلة:

- إزاي يعنى

بكل جرأة وثقة منحني هاتفه وهو يقول بلهجة أمره :

- سجلى رقمك هنا

أخذت الهاتف وجعلت أقلبه في راحتي بتردد فأردف وكأنه يقرأ أفكارى ويعطيني الحلول :

- على فكرة سماح أختى معاها رقم محمد صاحبي وهو كمان معاها رقمها وبيكلموا بعض عادى

قلت بحذر لا يخلو من الدهشة:

- بتقول كده ليه

سماح:

- علشان أنا عارف دماغك

- لحقت تعرف دماغى

بجدية مضحكة قال:

- إنت بتتعاملى مع أذكى جهاز مخبرات فى العالم يا منى

باستسلام ضحكت وسجلت رقمى لديه بتلقائية وكأننى مسحورة

دخلت بيتى وأنا بين السعادة والإحساس بالذنب وقد زاد هذ الشعور بداخلي عندما وجدت أمى جالسة

تقرأ فى كتاب الله بسكينة وهدوء ، يالهداه الأم الطيبة المسكينة ، هى واثقة فى تصرفاتى وأنا أخون

هذه الثقة بمنتهى الامبالاة .

سلمت على أمى بشيء من الخجل وقبلت يدها فابتسمت وقالت بحنان :

- أكلتى حاجة ولا لسه؟

وعندما أخبرتها أننى قد أكلت بالخارج وأحتاج إلى النوم بشدة قالت :

- طيب أدخلى نامى

وعندما إستدرت باتجاه غرفتي سمعتها تقول داعية لى :

- ربنا يبعد عنك ولاد الحرام يا بنتى

الدعوة إخرقت قلبى فدخلت غرفتي بحزن غريب لا أعلم سببه ولم ينقدنى منه سوى النوم العميق.

فى اليوم التالي استيقظت باكرا على غير عادتي وتوجهت للجامعة وانتظرت سماح فى مكاننا المعتاد

ولكنها لم تأتى .. ياترى ما السبب؟! ، هاتفتها فردت بصوت نائم معتذرة عن الحضور اليوم نظرا

لزيارة محمد البهية التى تنتظرها بشغف على فترات متباعدة ، وعندما أغلقت الهاتف وأنهيت

المكالمة نظرت حولي وقد تأكد لي أننى آتى للكلية لأى سبب فى الدنيا سوى الدراسة ، كانت

المحاضرات ثقيلة وكثيية فلم أستطع إنهاءها كاملة وتوجهت عائدة لمنزلي مشيا بتناقل وأنا أفكر فى

حالى ووحدتى التى لا تنتهى .

حدث فى اليوم الثانى والثالث نفس ماحدث تماما ، أهاتفها فتعذر عن الحضور نظرا لزيارات محمد

المتوالية وخروجهم للتنزة والتسوق معا وكأنها رحلات يومية ، شعرت بالقهر وأنا أتخيلها تنتزة

وتتسوق بصحبتهم والضحكات تملو بينهم وأنا المسكينة الوحيدة التى لا تنتظر سوى لوجهها الكئيب

بالمرأة! ، فأصدرت قرارا سريعا بغیظ شديد "والله ما هاعبرك تانى يا سماح براحتك ،، إيه هو

مافيش غيرك يعنى"

وفى لحظة غضبي تلك تذكرت صديقتى القديمة وجارتي " حياء " فاتجهت لشقتها والتي تقبع فى المنزل المقابل لمنزلنا تماما .

بالطبع لم تصدق "حياء" عينيها وهى تنظر لى على باب شقتها بعد تلك الفترة من إهمالى لزياراتها وانقطاعي عنها ورغم ذلك رحبت بي بشدة واشتياق، قضيت مع "حياء" وقت ممتع حقا ذكرتنى فيه بأيامنا السابقة وعرفتني عن طريق الإنترنت على منتديات كثيرة كلها إسلامية ونسائية وشجعتني على الإشتراك والتفاعل معهم وشرحت لي طريقة الدراسة الشرعية عن طريق الإنترنت وكأنها لاحظت الخواء الذى أمر به فى تلك المرحلة من حياتي .

طبعاً كالعادة أظهرت حماسي ووعدتها بالتفاعل والمشاركة ، وانطلقت عائداً لمنزلى بضمير مرتاح لأول مرة منذ شهور !

لكن .. هل يبقى الوضع على ما هو عليه ؟.. لا

## ( ٢ )

فى اليوم التالى مباشرة إستيقظت من نومي ولكن لم تكن لدي أى رغبة فى النهوض من الفراش ، كانت والدتي توبخني وتفتح الستائر والنافذة وهى تقول :

- كسل وملل ، طبعاً ما أنت مصليش الفجر كالعادة فلأزم ينطبق عليك حديث رسول الله صلى الله عليه وسلم

" يعقد الشيطان على قافية رأس أحدكم إذا هو نام ثلاث عقد ، يضرب كل عقدة مكانها عليك ليل طويل فارقد ، فإن استيقظ فذكر الله انحلت عقدة ، فإن توضأ انحلت عقدة ، فإن صلى انحلت عقده كلها ، فأصبح نشيطاً طيب النفس ، وإلا أصبح خبيث النفس كسلان " ثم تابعت وهى تنادى هاتفية :

- قومي بقى ، أخوكى "طارق" ومراته زمانهم جايبين ، النهاردة الجمعة إلتوت شفتي تلقائياً وأنا أقول بنفور :

- وإيه يعنى ماهم كل يوم عندنا ، جمعة ولا مش جمعة هما بيقعدوا فى بيتهم أصلاً قالت أمي مكررة:

- طيب يالا قومي بس ، مش عايزاها تيجى تلاقىكى نايمة هتقول عليكى كسلانة قلت بعبوس وأنا أنهض بتكاسل:

- قال يعنى هى اللى نشيطة أوى

ورغم فضل يوم الجمعة إلا أنى كنت أصبحت أكرهه بشدة فلم أكن أحب بقائى بصحبتهم دقائق فمابالكم بيوم كامل !

أنجزت أعمال المنزل مع أمي من نظافة وطبخ ولم يدور حديث بيني وبين والدى سوى أن قلت له " صباح الخير " ولم يرد كالعادة سوى بـ " إعمليلى شأى "

وعند الغذاء إلتف الجميع حول الطاولة فشردت فى طبقي أعبت بطعامي وأفكر "طب قالى أسجل نمرتى عنده ليه طالما مش هيكلمنى " .. وفجأة دوى صوتها كصفارة إنذار فى أذني - سرحانة فى إيه يا منى ؟

إلتفت مبهوتة إلى زوجة أخى بسؤالها المباغت :

- هااا ... مفيش حاجة

زوجة أخي بسخرية:

- مفيش حاجة إزاي إنت مش بتاكلى و سرحانة

- " الله يخرب بيتك أكثر ماهو مخروب إنت عاوزاه يقلق منى و خلاص " ..

مفيش حاجة يا ستى أصل الامتحانات قربت وأنا لسه مذاكرتش بجد يعنى

زوجة أخي بنظرة خبث :

- أهأأأ

وجه "طارق" حديثه نحوى بانفعال :

- أو مال بتعملى إيه من أول الدراسة هي مصاريف و خلاص

وأخيرا هتف أبى بانفعال أكبر أسكت الجميع :

- شششش مش عاوز دوشه عاوز أسمع الماتش هاييجى إمتى

بعد الغداء قمت مسرعة إلى حوض المطبخ لتنظيف الأطباق ، ليس حبا بها ولا عشقا للصابون وإنما

للهرب من أخي "طارق" وزوجته اللزجة ! ولكنها لم تتركنى لحالي فدخلت خلفي قائلة :

- منى ممكن شاي بعد ما تخلصى

كنت على استعداد أن أفعل أى شيء لتتركنى وتخرج فقلت بتأفف :

- اللهم طولك يا روح ، حاضر

- إعملينا كلنا

- حاضر ها عملكوا كلكوا فى حاجة تانية ؟

إستدارت لتخرج بلزوجة كما دخلت وهى تقول وتمط شفتيها رافعة إحدى حاجبيها :

- لا شكرا

وضعت أكواب الشاي أمامهم وعدت لغرفتي جالسة أمام شاشة جهاز الحاسوب العتيق أعبت بلا هدف

مجرد تضييعا للوقت فتبعني "طارق" وما زال كوب الشاي بيده متسانلا بجفاف :

- بتعملى إيه يا منى على النت

- ولا حاجة

طارق :

- ما تذاكرى أحسن ، هتفضلى طول عمرك مش نافعة فى حاجة خالص كدة ؟

- متشكرة أوى فى أى شتيمة تانية؟

عنفني بعصبية وجفاف :

- إيه يا بت هتعمليلى فيها بنى أدمه ولا إيه أنا أقول اللى أنا عايزه و متفتحيش بؤك

نظرت إليه بقلّة حيلة وأنا أقول بداخلي " هو أنت يعنى هتجيبه من بره من أنت إتربيت على كده "

خرج بحركات عصبية ثم دخلت زوجته وهى تستند إلى حافة الباب بتمايل سخيّف قائلة :

- تاخذى بؤ يا منى الشاي بتاعك حلو بصراحة

- شكرا ما أنت عارفه إنى مش بحبه

خرجت وكأنها تزحف قائلة بدلال يجبر العاهر على العفاف والتقوى:

- براحتك

فى هذه اللحظة تذكرت سامح عندما سألتنى فى منزلهم :

- منى تشربى شاي ؟

- لا شكرا

- ليه مش بتحبيه

- لا مش بحبه  
- يا عذابه  
ابتسمت بشكل عفوى وامتدت يدي بحنين لأطلب رقم هاتف سماح، لتجيب بعد ثلاث رنات وهى تضحك  
قائلة :  
- ألو منى إزيك يا حبيبتي  
- إيه يا بنتى هو أخوكى ييجى من هنا وإنتِ تنسينى من هنا  
سماح بدلع :  
- أنا أنساكى يا منى ده كلام ده إنتِ قلبى  
شعرت أن الكلام موجه لشخص آخر غيري فقلت ساخرة:  
- أه وكمان بقيت سلم على آخر الزمن ، إنتِ فين يا سماح؟  
- فى وسط البلد بنتفسح وبنشترى شوية حاجات  
ثم صممت لثوان وكان أحدهم يكلمها ثم عادت لتحدثنى مقترحة :  
- ما تيجى معنا  
ابتسمت بسخرية مريرة وأجيبها:  
- وأقولهم بقى رايحة فين  
قالت سماح بلا مبالاة :  
- قولى أى حاجة  
- بقولك إيه يا سماح أنا مش ناقصة قلق كفاية اللي عندي  
أغلقت الهاتف بعد أن ودعتني بكلمة ممطوطة ذكرتني بزوجة أخى فزفرت بضيق :  
- هو أنا كنت ناقصاكي إنتِ كمان ترخمي عليا، هو يوم باين من أوله  
وانتهى اليوم ببطء شديد وأنا لا أعلم الذى ينتظرني فى الغد من مفاجآت

### ( ٣ )

فى اليوم التالى وعند إنتهاء المحاضرة الأولى وأنا أتعجب من نفسى، ها قد أصبحت طالبة أخيرا  
وأحضر محاضراتي كلها وقد أوشكت إختبارات نهاية العام على الإقتراب وبشدة ، خرجت للجلوس فى  
مطعم الكلية قبل أن تبدأ المحاضرة التالية وفى مفاجأة غير متوقعة إرتفع رنين هاتفى معلنا تعطف  
سماح أخيرا وموافقتها على التواصل معي :

- ألو يا هانم  
قالت سماح سريعا:  
- إنتى فين  
- هاكون فين فى الكلية طبعا  
فتابعت وكان أحدهم يلاحقها:  
- إطلعي لى برة بسرعة .. بسرعة  
- برة فين هو فى إيه؟  
سماح :  
- بطلى لماضة واطلعي برة بسرعة مستنياكى عند الباب ، المكان اللي بنتقابل فيه كل مرة  
- يابنتى فى إيه بس قولى  
- يالابقى يا منى خلصى هقولك لما أشوفك



وأخيرا ظهرت أمامى الأهرامات من بعيد فقلت دون وعي :

- إيه ده إحنا رايعين الأهرامات؟

قال سامح ملتفتا نحونا :

- إيه مش بتحبيها هي كمان ؟

إبتلعت ريقى ورددت متسائلة :

- يعنى إيه هي كمان دي؟

سامح مداعبا :

- إيه نسيتى الشاي المسكين اللي سايباه يتعذب

محمد باستغراب :

- شاي ؟ شاي إيه ده اللي بيتعذب على آخر الزمن

دفعه سامح فى كتفه قائلا :

- خليك فى حالك

كانت المرة الأولى التي أزور فيها منطقة الأهرامات على أرض الواقع بعيدا عن شاشة التلفاز ، جذبتنى روعة المكان والهواء المندهف منه وإليه نحونا ونحن نسير بجوار الأحجار الضخمة وكأن هذا النسيم شعر بقلقى فقرر أن يداعبني ويحوم حولي ويتخلل رنتي بهدوء ولطف، قررت سماح فجأة أن تركب الجمل وجرت خلفه مثل الأطفال :

- إستنى يا عم إستنى

توقف الرجل بينما ذهب محمد خلفها يفعل مثلها وركب جمل آخر، بينما وقف سامح بجوارى وأخذنا نلوح لهما ثم إلتفت إلى متسائلا :

- تحبى تركبى زيهم؟

حركت رأسي بنفي قاطع:

- لالا مينفعش

سامح :

- ليه بس

- معلش أنا هتفرج بس

هتف سامح وهو يشير إلى رجلا قادم يجر حصانه :

- طيب إتفرجى بقى على صلاح الدين الأيوبي

إعتلى سامح ظهر الحصان بخفة ورشاقة وأخذ يدور حولي بهدوء وكأنه فارس قد أتى من الزمن البعيد

فقلت ضاحكة :

- إيه إنت بتحارب ولا إيه

سامح بنبرة جادة :

- فعلا أنا بحارب

- ها وبعدين كسبت المعركة ولا خسرتها

سامح بنفس النبرة :

- أنا عمرى ما أخسر أبدا

شعرت بالدوار فوضعت يدي على عيناى هاتفة :

- كفاية بقى أنا دُخت

سامح:

- مينفعش .. إنتِ خلاص وقعتي فى الأسر وبقيتي أسيرتي  
لم أفطن فى البداية لمعاني حديثه فقد كنت أظنه يمزح فقلت مازحة :  
- طيب معلى أطلق سراحى ومش هاعمل كده تانى  
قال بنفس الجدية:

- بقى تحاربينى وتقولى معلى

- أنا ؟ وأنا معايا إيه بقى أحاربك بيه؟

أوقف سماح الحصان ومال للأمام قليلاً ناظراً إلي بعمق وهو يجيب:

- معاكى عنكى الحلوة دى

هاجمنى الدوار مرة أخرى وارتعشت أوصالى فأول مرة يقول لى أحدهم كلمة غزل مباشرة هكذا  
وبتلك الطريقة التى جعلتنى أرغب فى الفرار من أمامه دون انتظار لحظة واحدة فقلت على الفور وأنا  
أحث الخطى للخلف وقد تورد وجهى تماما :

- أنا هروح أتمشى شوية

باعدت خطواتى ورغم أن الهواء حولى من كل جانب إلا أننى شعرت بسخونة شديدة وكأننى محمومة  
قلبى كان يدق بسرعة هائلة وفقدت السيطرة على أنفاسى تماما فلم يكن هناك بد من الجلوس على أحد  
الصخور لإلتقاط بعضها ، دقائق إرتفع رنين هاتفى وعندما أجبت هتفت سماح بقلق :

- إيه يا منى إنتى فين

- أنا بتمشى شوية

سماح :

- كده هانتوه من بعض إرجعى من نفس الطريق وقابلينا يالا

عدت من نفس الطريق حتى إلتقيت بهم ولكنى لم أستطع النظر إلى سماح مباشرة بينما قالت سماح  
بانزعاج:

- كده يا منى قلقتينى عليكى إفتكرتك توهتى إيه اللى خلاكى تسيبى سماح وتمشى لوحذك كده  
رد سماح بسرعة :

- منا قولتلك راحت تتمشى إهدى بقى

قلت محاولة إخفاء توترى بالمزاح:

- أيوه بتمشى خلاص يا سماح متعمليش فيها بنت خالتى

أنهى محمد الحوار هاتفاً وهو يضع يديه فوق معدته :

- يالا ناكل بقى أنا مت من الجوع

وفى نهاية الرحلة شعر محمد بالإرهاق فطلب من سماح أن يتولى هو القيادة فى طريق العودة ، جلس  
بجانبه بينما جلسنا أنا وسماح فى الخلف كالعادة ، شعرت بأن نظرات سماح تحاصرني فى المرأة من  
كل مكان وفى صمت مطبق شقه صوت محمد المرهق قائلاً بإعياء:

- آآه الجمل ده مرهق أوى

سماح :

- أنا حاسة إنى لسه راكباه وباتمرجح ، بجد دوخت

محمد متابعا وهو يسألني :

- ها يا منى الأهرامات عجبك

قلت بتردد :

- آه جميلة

محمد :

- ده إنتِ اللي جميلة

تورد وجهي مرة أخرى ، هل هذا هو يوم الغزل العالمي !!! كسر خجلي حدة صوت سامح وهو يوجه حديثه إلى محمد قاتلاً بجفاف :

- جرى إليه يا أمور .. إنتِ مستغنى عن لسانك ولا إليه محمد ببراءة مصطنعة :

- إليه يا عم أنا قولت حاجة

ثم إلتفت نحوى مرة أخرى وكأنه سيعتذر ولكنه قال :

- خلاص يا ستي إنتِ مش جميلة ، إنتِ قمر بس

ضغط سامح مكابح السيارة وتكلم بنبرة أكثر حدة :

- أنا ما بهزرش يا محمد

ساد جو من التوتر داخل السيارة فتكلم محمد معتذراً :

- خلاص يا سامح أنا آسف يا سيدي مكنتش أعرف

سامح بحدة :

- مكنتش تعرف أيه

محمد :

- لا ولا حاجة

سامح تكلمت محاولة لتخفيف جو التوتر :

- يالا يا سامح بقى إحنا واقفين فى نص الشارع

ثم غمزت لي هامسة :

- يا جامد إنتِ

أدار سامح محرك السيارة وانطلق بها من جديد وهو لا يدري أنه إنطلق أيضا بالقلب الذى يقبع خلفه وقد إبتلعني المقعد من كثرة إنكماشى فيه تعصف بي مشاعر عديدة بين التوتر والقلق .. والحب

دلقت فى ذلك اليوم إلى غرفتي وتدنثرت بالكامل لأخفى تلك الإبتسامة التى أبت أن تتركنى منذ ترجلت من سيارتهم مودعة إياهم بعيداً عن منزلى قليلاً وأغمضت عيني لدقائق طويلة وقد جفانى النوم حتى شعرت باهتزاز وسادتي فاحترت متسائلة ، ترى هل هو هاتفى أم ارتعاش قلبي وجسدى معه !! ، أخرجت الهاتف من تحت الوسادة لتفاجئني رسالة نصية منه لا تحوى سوى كلمتين فقط .. " أيوا باغير " ..

( ٤ )

الساعة الحادية عشر ظهراً داخل الجامعة جالسة فى مدرج الكلية من ينظر لي من بعيد يظن أننى أكتب خلف أستاذ المادة ولكن من يقترب سيجدنى بمنتهى السذاجة أرسم قلوب على أطراف الصفحات كالفتيات المراهقات تماما ، مالت سماح نحوى وهمست :

- مالك يا منى سرحانة فى أيه؟

- هه بتقولى حاجة يا سماح

سماح :

- لااااااا ده أنتِ مش هنا خالص

بعد انتهاء المحاضرة التى لم أستوعب منها أى كلمة وخرجنا خارج مدرج الكلية أعادت سماح سؤالها باهتمام واضح :



- أيه يا منى كنت سرحانة فأيه طول المحاضرة مكتبتيش ليه دى الحاجات المهمة فى المادة  
قلت بلا مبالاة :

- مش أنتِ كتبتى؟ ، خلاص

- سماح وهى تجذب أول مقعد يصادفها فى الكافتريا :

- أقعدى هنا لما اروح أجيب حاجة ناكلها أنا هموت من الجوع

- متعمليش حسابى انا مش جعانه

- سماح :

- لاااا ده أنتِ حكايتك حكاية النهاردة أستنى لما أرجعك

- جلست أنتظرها وأعبث بهاتفى حتى عادت واضعة حقيبتها فى المقعد الشاغر بجوارنا قائلة :

- أيه بقى يا هانم أيه حكايتك

- مفيش حاجة يا سماح أسكتى بقى

- سماح وهى ترفع حاجبها للأعلى :

- منى أعترفى أحسنك انا عارفاكى كويس

- غلبنى التوتر وأنا أجيبها:

- انتِ هتعملى فيها مفتش المباحث بقولك مفيش حاجة، كل ده علشان مش عاوزة أكل خلاص يا

ستى هااكل ها ارتحتى

ابتسمت سماح بخبث قائلة وهى تتعمق بلامحى:

- الله أكبر هو أنتِ وقعت ولا الهوى اللى رماك

زاد توترى وتوردت وجنتاي وأنا أهتف بانفعال:

- أنتِ غريبة أوى النهاردة

- سماح :

- أنا برضه اللى غريبة ، أنتِ مش شايفة نفسك ولا أيه؟ ، سرحان .. شخبطة .. قلوب .. ملكيش نفس

تاكلى

أبتلعت جزء من الشطيرة كاد أن يخنقنى وأنا أبتلع نظراتها الماكرة معه وقلت :

- ايه يعنى فيها أيه دى

- سماح وهى تتمايل وتلحن كلماتها:

- فيها حب جديد ... وبشكل شديد

نهضت بعصبية هاتفة :

- أنتِ شكلك أتجننتى ، وانتِ بصى .....أنا ماشية

أوقفتنى سماح وهى تقول :

- أقعد بس يا جميل متعصبش نفسك

جلست مرة أخرى وقد احمر وجهي بشدة من كثرة الانفعال بينما قالت سماح مهدئة للموقف:

- خلاص يا منى خالينا فى الامتحانات المحاضرة النهاردة كانت مهمة اوى

جذبت الكتاب منها قائلة:

- طب كلى أنتِ على ما انقل منك

أصطنعت سماح الخجل وهى تقول بدلال :

- طب خلصى بسرعة علشان انا ماشية .. أصلى عندى معاد مع محمد

رغما عني وجدتنى أستدرجها قائلة :

- اممم لوحدكوا؟

سماح بخبث:

- طبعاً لوحدنا او مال أنتِ فاكرة هيكون معنا ميبين

وكان الموضوع لا يشغلني قلت:

- لا أبدا بسأل بس أصلك أول مرة تخرجي معاه لوحدكوا يعني

قالت بتنهيذة قوية:

- اااه عاوزه اشوفه قبل ما يمشى ، بيوحشني أوى

شعرت بقلبي يقفز وكأنه يود مغادرة مكانه بين أضلعي وسقط القلم من يدي وقلت بوجوم:

- هما أجازتهم خلصت خلاص

قالت بأسف وحزن:

- ماشيين بكرة بعد الظهر وشكلهم المرة دي هيتأخروا ، بيقولوا عندهم تدريبات ضرب نار حي

والتدريبات دي رخمة أوى بيتأخروا فيها جداً

أكملت سماح باهتمام مشوب بالقلق :

- تعرفي يا منى أنا ببقى قلقانة عليهم هما الأثنين لما بعرف انهم عندهم التدريبات دي ، كذا مرة سماح

يقولى أن فلان أتصاب وعلان مش عارفة حصله آيه . ربنا يستر عليهم بقى

وكان روعي غادرت جسدي بالفعل وعدت إلى الكتابة وأنا في عالم آخر . الفلق ينهشني والصقيع يلف

قلبي ويدمرني فقدانا ووحشة وقلقا عليه.

بعد مغادرة سماح جلست أستمع إلى المحاضرة التالية وأنا أكثر شروداً وعدت إلى بيتي هائمة على

وجهي ودخلت فراشي أبكى دون سبب حقيقي للبكاء حتى سقطت في النوم رغماً عني

في صباح اليوم التالي وقفت بوجه حزين أنتظر اللحظة المناسبة لعبور الطريق وقبل أن أتحرك شعرت

بأحدهم يقترب مني من الخلف ويميل هامسا منادياً:

- منى

التفت بانزعاج فوجدته أمامي وملابسه الرسمية قد زادت جاذبية ووسامة

قال سماح بدون مقدمات :

- ماكنش ينفع أمشي من غير ما أشوفك

نظرت حولي محاولة أخفاء تعبيرات وجهي التي ظهرت عليه بقوة ولم استطع الكلام فقال برجاء:

- ممكن نقعد مع بعض شوية

قلت بتلعثم :

- مع بعض ازاي يعني لالالا مينفعش

سكت سماح سكوت الواثق وشبك ذراعيه أمام صدره ثم ذهب بعينه للأعلى وعاد إلي من جديد وهو

يمط شفثيه بخيبة أمل قائلاً :

- أنا آسف ، أنا كنت فاكراً أنى أفرق معاكى ، عموماً أشوف وشك بخير و آسف أنى ضايقتك بوجودي

دلوقتي ، خلى بالك من نفسك

عندما التفت ليذهب وجدت يدي تمتد للهواء بتلقائية وكأني أوقفه وقلت بهمس وخجل :

- أستنى ... أنت رايح فين

سماح بنظرة مكسورة:

- ماشى  
- أنت فهمت غلط أناااا .. أنا بس .. طيب هنروح فين  
لم ينتظر كثيرا فقال بفرحة المنتصر :  
- تعالى ..

دخلت سريري ليلاً وأنا أتأرجح بين السعادة والحيرة ، أغمضت عيني وأنا أسترجع لقائي به وجلوسي معه فى ذاك المكان الراقى المطل على النيل بمياهه الجذابة والنسيم يداعب وجهي وسامح ينظر لي وكأنه يحاول الولوج لعمق أفكارى وأخيرا تحدث ليلفت نظرى بعيدا عن صفحة النيل مناديا :  
- سرحانة فى اية

- أبدا بس بحب النيل  
- يا بخته

شعرت بخجل شديد وأطرقت برأسي فسمعتة يناديني مجدداً:  
- منى؟

- نعم  
- تعرفى أن دى أول مرة ازعل أوى كده لما الأجازة تخلص  
- ليه؟

- مش عارفه ليه؟

حاولت تغيير مجرى الحديث قائلة:

- سماح قالتلى انك عندك تدريبات خطيرة .. خلى بالك من نفسك  
- خايفة عليا؟

- طبعا

- ليه؟

- مش أحنا خلاص بقينا اصحاب

رد مستكرا :

- أصحاب؟ بس كدة !!

قاطع النادل حديثنا وهو يضع المشروبات على الطاولة سريعا ثم انصرف فقلت محاولة تغيير دفعة الحديث مجدداً:

- انت بتشرب شاى وقهوة بس ؟

زاد انفعاله ولم يستطع التحكم بأعصابه وهو ينقر بأصابعه فوق سطح الطاولة ثم قال فجأة بحنق :

- أنتِ كل شوية تهربي

حاولت تصنع المزاح قائلة:

- أهرب ، وانا أهرب ليه أنا معايا فلوس وهدفع تمن العصير بس القهوة دى متخصصيش ماليش دعوة  
سماح بانفعال:

- طيب يا منى انا مش هضغط عليكى

تابعت بنفس طريقتي فى الفرار:

- سماح قالتلى أنك هتتأخر المرة دى

- ايوه

- أد أيه يعنى

- مش عارف شهرين ثلاثة على حسب
- رددت خلفه متممة بتوتر:
- ايه شهرين ثلاثة؟
- سامح بمرارة :
- قال يعنى هوحشك أوى
- طبعا ما أحنا .....
- قاطعني سامح بمرارة أكبر :
- عارف أصحاب
- قلت بتردد :
- هتبقى تكلمنى
- نظر لي وقد استعاد هدوءه شيئا فشيئا وقال :
- هكلمك كل يوم وكل ساعة
- عدت بنظري إلى صفحة النيل الهادئة ودون أنظر نحوه شعرت بنظراته تخترقني من كل جانب
- وهويخرج من جيب بنطاله سلسلة مفاتيح فارغة يتدلى منها شكل قلب ذهبي يتوسطه مفتاح صغير
- ذهبي أيضا:
- أفضلي
- وضعتها في راحتي وقلبتها أشاهدها بأعجاب من كل جانب وسمعته يقول:
- هدية بسيطة علشان تفنكريني وانا غايب
- ليا انا ؟ ليه؟
- أعدتل في جلسته ومال للأمام وهو يقول بأهتمام :
- هاقولك ، سماح قالتلى أمبارح أنك كنتى سرحانة فى المحاضرة وبترسى قلوب
- تنحنت وقلت متممة بانزعاج:
- أحتك دى بتستهبل وحسابها معايا بعدين وانا مكنتش سرحانة ولا برسم حاجة
- أكمل سماح وكأنه لم يسمعني:
- أنا قولت اديهولك فى ايدك بدل ما ترسميه
- حاولت ألتقاط أنفاسي بصعوبة وأقول:
- هو ايه ؟
- سامح بثقة :
- القلب .....
- وتابع بنفس الأبتسامة وهو يشير إلى صدره موضع قلبه:
- كنتى بترسمى قلب غيران ؟
- ثم وجه سبابته تجاهي وأكمل :
- ولا قلب لسه حيران؟
- نهضت فجأة حتى كاد مقعدى أن يسقط خلفى وقلت بتلعثم:
- أنت مش قولت أنك هتمشى الظهر
- عاوزانى امشى؟
- مش انت اللي قولت الظهر
- قال سماح بهدوء حزين :
- طيب ماشى بس كنت عاوز أستسمحك

- تستسحمني من ايه؟
- قال بأستعطاف :
- يعنى لو جralى حاجه أبقى سامحيني
- قلت بسرعة بدون وعي :
- متقولش كده بعد الشر عليك
- نهض واقفا وعلى وجهه ابتسامه عريضة :
- خلاص أنا كده همشى وأنا مطمئن

ولم تغب ابتسامته تلك عن بالى حتى دخلت فراشي ، ضمنت وصادتى أكثر إلى صدرى وابتسمت له وكأنه أمايمي الآن وأغمضت عيني لأحتفظ بابتسامته تلك لمدة أطول فأصدر هاتفى ذبذبة ضعيفة معلنا عن رسالة نصية جديدة

- (لا اله الا الله)

أبتسمت وأنا أكتب ردا عليها فى الحال :

- (محمد رسول الله)

## ( ٥ )

فى اليوم التالى فى كافتريا الكلية جلست بصحبة سماح أتحدث بحنق شديد معها :

- أنت بتستعبطى يا سماح ازاي تقولى لسماح أنى كنت سرحانة فى المحاضرة وبرسم.. مش دى حاجات بينا بتطلعها برة ليه؟

سماح ببطء شديد:

- وأنتِ عرفتى منين أنى قولت لسماح كده ؟

ثم ضحكت سماح بشدة عندما شاهدت تلون وجهي وهي تقول :

- متكسفيش أوى كدة .. اومال يعنى يا هبله مين اللى قاله على معاد وصول سيادتك الجامعة

ومين اللى قاله أنتِ بتنزلى فين وبتعدى منين ؟

أجبتها بتوتر شديد :

- لو سمحتى بعد كده الحاجات دى خاليها بينا

حاولت سماح كتم ضحكاتها:

- خلاص يا منى متزعليش انا والله مكنش قصدى أقوله حاجه بس هو لما سألنى على مواعيدك وانه

عاوز يشوفك الكلام جاب بعضه يعنى مكنش قصدى ، بس قوليلى بقى هو كان عاوزك ليه

تصنعت الامبالاة قائلة:

- عادى يعنى بيسلم عليا قبل ما يمشى ما أحنا بقينا أصحاب بقى

غمزت سماح بخبث وهي تقول :

- أصحاب يا منمن؟

قلت بجديّة:

- بصى يا سماح الامتحانات خلاص فاضلها أقل من اسبوعين ممكن نركز بقى

ووفى سامح بوعده وأصبح يهاتفني كل يوم مكاملة لا تزيد عن خمسة دقائق يطمئن على أحوالي ثم يلقي عبارة غزل غير مباشرة قبل أن ينهي المكاملة وفي كل مرة كان ينتظر مني أي رد فعل أو كلمة صريحة ولكن لا حياة بمن تنادى وقبل النوم في كل ليلة أحتضن هديته والقلب المتدلي منها وأذهب في أحلامي السعيدة

آخر يوم في الأختبارات وبعد أن انهينا الأختبار خرجنا لنجلس بالكافتريا قليلا ونتفق على مكان نذهب إليه للتنزة بعض الوقت ولكن قاطعنا رنين هاتفها الذي ما أن أجابته حتى هتفت وهي تحدث والدتها بفرع :

- أيه بتقولى أيه يا ماما ؟.. سامح .. أمتى .....أزاي

دقيقة وأغلقت الهاتف ولملت أغراضها سريعا وهي تقول بوجه صاحب :

- انا ماشيه يا منى سلام

لملت أغراضى بعفوية وانا أقول بقلب وجل :

- فى أيه يا سماح

خطت سماح خطوات سريعة وأنا أكاد أعدو خلفها أحاول اللحاق بها وهي تقول بأنفاس متقطعة وقد أوشكت على البكاء :

- مش عارفه يا منى ماما بتقول سماح أتصاب فى التدريب ونزلوه أجازة

شحب وجهي أنا الأخرى :

- أيه أتصاب ازاي ؟، وهو عامل أيه دلوقتى ؟

سماح وهي تخرج من باب الكلية وتقف لتشير لسيارة أجرة :

- مش عارفة ، لما اشوفه هبقى اكلمك

حشرت جسدى بجانبها فى الكنبة الخلفية فى سيارة الأجرة قائلة :

- وانا لسه هستنى ، أنا جايه معاكى

وصلنا منزلهم والقلق يفتك بنا وصعدنا الطابقين هرولة حتى وصلنا لباب شقتهم ، طرقات قليلة وفتح لنا محمد الباب ونظر إلى وجهينا والشحوب يعتمل بنا فاندفعت سماح للداخل هاتفة به :

- فى ايه يا محمد سماح فين وحصله ايه

محمد:

- براحة شوية مالكوا كده

اقتربت والدتها تطمئنها قائلة :

- متخافيش هو بخير ، الحمد لله أنها جت على أد كده

دخلت سماح وبدون تفكير تبعتها للداخل بمنتهى الלהفة فدلفت لغرفته لأول مرة وشاهدتها وهي تجلس بجواره على طرف فراشه قائلة بجزع وهي تنظر ليدة المحاطة بضماضة طبية ومرفوعة إلى كتفه

قليلًا :

- سماح حصلك ايه يا حبيبي أيه ده دراعك ماله

أجابها وهو يخطف نظرة لي سماح وأنا أقف شاحبة بجوار حافة الباب :

- متخافيش يا سماح متخافيش انا كويس

دخل محمد خلفها وأدخلنى معه وقال بمزاح:

- متخافيش يا ستى أخوكى ده عامل زى القطط بسبع ترواح ، دى أصابة خفيفة فى دراعه ، ايه هتعملوه قطز
- أشار سماح إلى رقبته علامة الذبح وهو يقول لاخته بجدية مصطنعة بها بعض الإعياء :
- لو شوفتوه فى المعركة اقتلوه
- تنهدت سماح براحة كبيرة قائلة:
- الحمد لله ده انا اتخضيت حته خضة عليك...
- ثم التفتت إلى محمد وقالت :
- طب هو اتصاب ، انت بقى نزلوك أجازة ليه ؟
- محمد باستعراض:
- او مال يابنتى أنا محدش يقدر يقولى لاء هناك
- أكتشفت فجأة أننى أقف صامتة منذ دخولى فقلت بصوت خافت :
- حمد الله على السلامة
- قال سماح بنعومة :
- الله يسلمك
- قالت سماح بابتسامة خبيثة وهي توجه حديثها إلى محمد :
- منى أول ما سمعت الخبر جات جرى قولتها يا بنتى خاليكى وانا هطمنك قالتلى لاء هو انا لسه هستنى
- عندما ضحك محمد شعرت بحرج بالغ ونظرت لها بعتاب وقلت:
- طيب أستأذن انا بقى
- كاد أن ينهض من فراشه فتألم وهو يقول ليستوقفنى:
- بسرعة كده، طيب أستنى شوية
- معلىش أصلى مقولتش لماما أنى هتأخر
- شعرت بيد والدة سماح توضع على كتفى من الخلف وقد دخلت للغرفة للتو قائلة بود :
- أنت لحقتى تاخدى نفسك حتى يابنتى ؟
- أطرقت برأسى وقلت بحرج :
- معلىش يا طنط أصل ماما متعرفش أنى هتأخر
- قالت مقترحة:
- طب ما تكلمياها فى التليفون
- تدخلت سماح قائلة:
- خلاص يا ماما أنا هتصرف
- وأخذتني سماح خارج الغرفة وهمست لي:
- ماتكلمى مامتك قوليلها أنك هتتأخرى عندى شوية
- لا يا سماح هتقولى ليه ومش ليه أقولها ايه بقى
- قوليلها أنى تعبت بعد الامتحان وانت اضطررتى تروحي معايا البيت
- قلت برفض وضميرى يكذبني :
- لا طبعا انا مش بحب أكذب على ماما
- قالت ببساطة:
- دى كدبة بيضا مش هتضر حد
- ثم أردفت بتصميم:

- والله يا منى لو مشيتى دلوقتى هزعل منك جدا وبعدين يعنى هو الواد اللي مرمى جوة ده مش يستحق انك تقعدى معاه شوية وتطمنى عليه  
ترددت كثيرا وبادخلى رغبة قوية للبقاء وأخيرا حسمت قرارى وهاتفت والدتي واستأذنتها للخروج قليلا مع صديقاتي بعد أن بذلنا مجهودا مضنيا فى الاختبارات ووعدها بعودتى باكرا ، وافقت والدتي على مضض بعد أن أكدت على عودتى قبل أن يحل الظلام ، أغلقت هاتفى وأنا أشعر براحة ضمير زائفة وبادخلى يتردد سؤال ملح " يعنى أنت كده مكديتيش؟ !! "

## ( ٦ )

لم تدم الراحة لدقائق فقبل توجهى مع سماح للداخل مرة أخرى أستقبلت والدتها ضيوف جددا جيران لهم ، امرأة أنيقة للغاية وابنتها الجميلة والناعمة إلى درجة محبطة ! ، همست لي سماح بأنها جارتهم والفتاة تدعى ياسمين وهى تدرس فى الجامعة الأمريكية ولمحت لي سماح بأن ياسمين تحب سماح ومتعلقة به ووالدتها ترحب بالأمر بناء على رغبة ابنتها المدللة

دخلت والدته سماح فى البداية إلى غرفة سماح وتبعنها ياسمين ووالدتها فنظرت لي سماح بتسائل قائلة :

- آيه يا منى واقفة هنا ليه تعالى

أنتابني حرج شديد وقلت بتردد :

- لالا آجى فين هى صحيح الأوضة كبيرة بس مش للدرجادى يعنى سماح :

- يعنى هتقعدى هنا لوحدهك

- يوه بقى يا سماح مش انتِ اللى صممتى انى أستنى منا كنت عاوزة امشى علشان الأحرار ده سماح بعتاب :

- آيه يا منى اللى بتقوليه ده هو انتِ غريبة ، خلاص يا ستى انا هقعد معاكى هنا ده حتى مبطبقش طنط أم ياسمين دى أصلها لزجة أوى

أبتسمت من التعبير الذى استخدمته سماح ورغم ذلك ظل القلق ينهشنى فبمقارنة بسيطة سقط قلبي فى أخصم قدمى والنتيجة فى غير صالحى بالمره .

علا صوت رنين الباب مرة أخرى ، ألن تنتهى تلك الزيارات أبدا؟! .. لم تكن عروس أخرى هذه المرة ، لقد كانت صديقة والدتها التى عادت من الداخل للتو لتستقبل صديقتها مرحبة بها بقوة فهمست لي سماح مرة أخرى :

- دى طنط هدى أنتيمة ماما بس آيه .. ألزج من اللى جوه ، خنقة ، وآيه بقى لسه خارجة من ليالى الحلمية طازة من عند نازج الصلحدار

لم أتمالك نفسى وحاولت كتمان ضحكاتى قدر المستطاع وأنا أقول :

- يخربيت عقلك يا سماح أنتِ شركتيا خالص سماح :

- دى لما بتيجى ماما تنسانا خالص ، كل مرة تبقى جايلها كاتلوجات كتير ، مرة ديكور ومرة أسكسورات وبرفانات وميكب على كل لون يا بطسطا



قلت ضاحكة:

- أنتِ مش معقوله .. والله انتِ اللي لسه خارجة من ليالى الحمية بس من عند العوالم وفجأة جانا صوت والدتها منادية :

- يا سماح أعملى لطنطك هدى النسكافيه بتاعها ومنتشيش الضيوف اللي عند اخوكى قدميلهم حاجة سماح بتأفف :

- حاضر ما أنا الروم سرفيس النهاردة.. تعالى يا منى معايا لو سمحتى

قمنا بتحضير عدة مشروبات سريعة وسألتنى سماح على عجلة من أمرها :

- منى تحبى تقدمى طلبات قسم الطوارئ ولا قسم نازج الصلحدار قلت سريعاً:

- لا انا معرفش طنطك هدى دى ، روحى انتِ قدميلها

حملت المشروبات إلى غرفة سماح بفضول ودخلت ببطء وحذر وأنا أقدم لضيوفه العصير :  
والدة ياسمين:

- شكرا يا حبيبتي

ياسمين :

- ميرسى

وعندما وصلت إلى سماح قال بابتسامة :

- ما انتِ عارفة أنا ماليش فى العصاير

ثم تابع بغمزة خفيفة لم يرها سوى محمد :

- أنا بحب الشاي

فضحك محمد وقال :

- هاتى كوابية العصير بتاعته يا منى ، خسارة فيه

وقبل أن أخرج من الغرفة دخلت سماح واستوقفتنى قليلاً عند الباب المفتوح وعندما استمعت إلى

الحوار الدائر بينهم لم يعجبني بالمرّة ولم يخرج عن الآتي :

- يارب نفرح ببيك قريب يا بنى

- لسه بدرى يا طنط، عاوز أكون نفسى وأعمل بيت معقول الاول

- متقلش أنوى أنت بس وهتشوف ده انت الف واحدة تتمناك

هزرت رأسي وأنا أنظر إليهم بتفحص وعقلي يدور ويدور بلا توقف وكأنني أشاهد مشهد من بعيد لا دخل لي به "الست باين عاليها عاوزة تجوزوا بنتها وتجهزوا كمان ..والبت كمان بتحبه عينها مش بتنزّل من عليه.. وزى القمر ... جاتنا نيلة فى حظنا .. لا لا يا منى انتِ برضة حلوة متقلّيش من نفسك كده .. صحيح هي أحلى وصحيح ناعمة وبسكوتة وصحيح جامعة أمريكية وصحيح شكلهم أغنيا وهيقوموا بالليلة كلها.. بس انا برضوااا .. لا لا يا منى خاليكى واثقة من نفسك .. يا شيخه روحى كده" !

وعندما زاد الغليان بداخلى ولمحت باب شرفة فى زاوية من الغرفة همست بخفوت لـ سماح :

- سماح انا هقف فى البلكونة دى شوية لحد ما الناس تمشى

أومأت سماح لى بالموافقة فتحرّكت بصمت حتى دخلت الشرفة الخاصة بغرفته وكأننى دخلت عالم آخر

جعلنى أنسى غليانى وضيقى ما يحدث فى الخارج ، أقل ما يقال عنها أنها رائعة ، بتصميمها

ومساحتها وتكعيبه العنب أعلاها وقصاص الزهور المختلفة فى كل مكان فيها والنسيم يحمل لأنفى

روائحها المختلفة وقص لعصافير الكنارى تكتمل به اللوحة الفنية الرائعة واتسعت ابتسامتى عندما

أبصرت مقعدا هزاز في أحد أركانها فأسرعت إليه كالأطفال لأجربه للمرة الأولى بحياتي ، لو كانت تلك الشرفة بمنزلي لما خرجت منه أبدا ! ابتسمت وأنا أجلس فوق المقعد الهزاز وأغمضت عيني بسلام أستمتاعاً بما حولي من جمال ، لم أشعر بالوقت الذي مر سريعا وأنا في تلك الجلسة الممتعة، وفجأة شعرت بأنامل تلمس كتفي ففتحت عيني والتفت متفاجأة به وقد كنت أظنها سماح فحاولت النهوض بارتباك و لكنه أمسك كتفي وشدد عليه قليلا وهو يقول برجاء :

- أرجوكي خاليكي

أرتعش جسدي على أثر لمستته وتجمدت مكاني لا أعرف ماذا أفعل وسمعته يقول بهدوء:

- أنا واقف من شوية ... تعرفي لو كنت بعرف ارسوم كنت رسمتك صورة وانت في حالة الاسترخاء الجميلة دي

وجدتني أقول بأبتسامه خجلة :

- أنت قومتي ليه من السرير كنت خاليك مرتاح

قال بهمس:

- أنا برتاح أكثر لما بشوفك

تسائلت بتلعثم:

- هي ... هي فين سماح

سامح بلوم وعتاب:

- بتسألني عليها ليه

حاولت أن أبدو طبيعية وقلت :

- لا ابدا عادى

أشار سماح إلى ديكور الشرفة وهو يقول:

- مقولتيش أيه رأيك في ذوقي

- ذوقك حلو أوى

قال هامساً :

- مش أحلى منك

ثم تابع متسائلا وكأنه لم يقل شيئا :

- أنت جيتي قعدتي هنا لوحدك ليه؟

رغما عني كانت نبرتي حادة قليلاً وأنا أقول :

- أبدا عشان الضيوف ياخذوا راحتهم .. هما مشيوا ولا لسة

ألتقط سماح نبرة صوتي وترجمها سريعا فقال بنية الإستفزاز:

- مشيوا .. بس كنتي جيتي قعدتي معانا دي ياسمين قعدتها حلوة أوى فانفعلت قائلة:

- اه منا عارفة علشان كده قولت اسيبك تشبع من الحلاوة براحتك

ضحك سماح ضحكة عالية زادت من انفعالي فقلت بعصبية واضحة:

- بتضحك على ايه ، على فكرة بقى انا ميهمنيش

سامح بثقة أستفزتها:

- منا عارف

أندهشت من نبرته الباردة الواثقة وبدون شعور قلت بانفعال أكبر:

- على فكرة بقى انت مغرور

أبتسم وهو يمد يده يسحب مقعدا آخر ووضعه في مواجهتي وجلس أمامي مباشرة وهو يميل للأمام نحوي قائلا بنظرة ثاقبة :

- ياااه ده أنت شكلك مضايقة منى أوى  
أدركت وقتها فح الحوار الذى أوقعنى به فحاولت النهوض مرة أخرى ولكن لم تكن هناك مساحة كفاية  
فقلت بحرج :  
- ولا مضايقة ولا حاجة وبعد أذنك بقى عدينى عاوزة أمشى  
قال بعناد:  
- مش هاعديكى انت نسيتى ولا ايه ولا كنتى فإكرانى بهزر  
ذهب انفعالى أدراج الرياح و تسائلت:  
- نسيت ايه؟  
سامح:  
- هو أنا مش قولتلك انت بقيتى أسيرتى

(٧)

أرتبكت بشدة عندما أسر يدي فى راحته بقوة ولم يتركها رغم محاولاتي وقد تلون وجهي ولكنه لم  
يرحمني بل وظل يعن النظر إلي بنظرات عميقة يكتسح بها روعي ويجتاح مشاعري وأنا أتمتم  
بصوت مختنق من الخجل والقلق والتوتر :  
- سيب ايدى لو سمحت  
شد أكثر على يدي وقال :  
- مش هسيبك يا منى أنت كل مرة تهربي منى وبسيبك وبقول معلى بلاش أضغط عليها ، المرة دي  
مش هسيبك ، مفيش هروب المرة دي بالذات عارفه ليه ، علشان أتأكدت ان القلب التانى اللي كان  
حيران بقى هو كمان غيران ، وطالما بقى غيران يبقى لازم تتحط نقطة ومن أول السطر.  
أبتلعت ريقى بصعوبة وحاولت سحب يدي من بين أصابعه قائلة برجاء :  
- سيبنى يا سامح  
سامح بتصميم كبير :  
- مش هسيبك .. يامنى أنت متعرفيش انت بقيتى أيه عندي  
ثم تابع كمن يقر واقعا :  
- أيوا اتعرفنا على بعض من فترة بسيطة وأيوا مشوفناش بعض إلا مرات قليلة وأيوا متكلمناش إلا  
مرات أقل ، لكن المشاعر مش بعدد المرات المشاعر حسابتها مختلفة ومقاييسها مش عادية  
حرارتي ارتفعت جدا ووصلت إليه من خلال ملامسته ليدي فأطرقت بوجهي أخفى ما يعتمل بداخلي  
على أثر كلماته التي خدرتني بالكامل وكأنه سحر وقلت هامسة :  
- سامح انت عاوز ايه دلوقتي  
زاد ضغطه على يدي وقال بنبرة زاد فيها الحنان على الحسم:  
- منى انا مش هلاقى وقت أنسب من الوقت ده علشان أعبر عن مشاعري .. أنا فى الأول كنت قلقان  
علشان مكنتش متأكد منك لكن بعد ما شوفت لهفتك عليا وغيرتك من واحدة تانية بقيت متأكد خلاص ،  
وبعد كده زى ما قولتلك يبقى لازم نقطة ومن أول السطر .. و زى ما أتأكدت من مشاعرك لازم انت  
كمان تتأكدى من مشاعري .. أنا ادبتك القلب المرة اللي فاتت مش علشان هدية وبس لاء.. ده كان  
تعبير رمزى علشان تتأكدى أن قلبي معاكى وتعرفى أنى....

- أياه أتأخرنا عليكوا؟! ..  
قاطعته سماح بتلك الجملة وهي تدخل على حين غرة من الجميع بل ومنها هي أيضا فلقد تسمرت  
بمكانها وقد أيقنت أنها أتت بوقت غير مناسب على الإطلاق ، جذبت يدي على الفور بقوة بينما  
تنحنت سماح بتلعثم وهي تنظر إلى شرارات الغضب المتطايرة نحوها من عيني أخيها قائلة بخفوت:  
- جبت الجاتوه  
حاولت مداراة موقفي المخرج وتحركت من مكاني على الفور نحوها قائلة :  
- كنتي فين يا سماح سايباني لوحدى كل ده ليه؟  
قالت بنفس النبرة الخافتة :  
- روحت مع محمد نجيب الجاتوه  
خرج سماح من الشرفة وهو يتحاشى النظر للجميع بينما محمد يقول متسائلاً:  
- مالك يا سماح ؟  
سماح بعصبية:  
- وانت مالك انت  
محمد :  
- لا مالي طبعاً بتشخط في خطيبتى ليه  
سماح بتعجب :  
- خطبتك!!  
محمد وهو يرفع أصبعه مهددا :  
- مفيناش من ضرب ما انا عارفك ايدك ثقيلة  
سماح بخجل:  
- روق يا اخويا يا حبيبي علشان اقولك على المفاجأة  
سماح بنفاذ صبر:  
- قولى هاا سامعك  
محمد أستوقفها بأشارة من يده :  
- أستنى  
ثم قال متابعاً :  
- تسمحلى يا عمى أطلب أيد أختك اللمضة ... فى الحقيقة يا عمى انا عامل حسابى على خطوبة.. أكثر  
من كده تبقوا طمعانين فيا  
أبتسم الجميع وضحك سماح وهو يقول :  
- وهتكلم ابوها امتى بقى  
سماح:  
- البركة فيك بقى يا سماح تفتح معاه الموضوع هو بيتق فيك  
- ماشى ياختى لما نشوف أبوكى هيقول أيه  
هتف محمد بحماس:  
- طب يالا مش هتأكلونا الجاتوه بقى ولا ايه

وفى النهاية جلسنا فى صمت وقد كانت النظرات كفيلة بنقل المشاعر بيننا دون حديث و فى هدوء تام ،  
وضعت كل انفعالاتي فى قطعة الحلوى التى أكلها رغماً عني بعد ألحاح شديد منهم فأنا لا أكل  
الحلوى ولا أستسيغها أبداً إلا إننى أضطرت إلى ذلك حتى أتحاشى النظر لهم وما أن ارتشفت بعدها  
عدة رشفات من كأس العصير حتى شعرت ببداية دوار و برودة شديدة تسرى فى جسدي وفجأة زاد

الدوار وترنحت وأنا جالسة وآخر شيء رأيت قبل سقوطي النظرات الغريبة التي تبادلتها سماح مع محمد وسامح ثم أظلم كل شيء وسقطت في بئر سحيق !

جفوني ثقيلة لا أستطيع فتحها بسهولة ورأسي يدور بشدة فحاولت تحريك أصابعي وأجاهد لفتح عيناى ببطء وتثاقل وآخر شيء تذكرته هو سقوط كأس العصير من بين أصابعي ثم سقوطي وهنا سمعت صوته وكأنه أتى من بعيد :

- حمد الله على السلامة

وعندما استطعت تمييز الوجوه من حولي رأيت سماح يجلس بجواري على طرف السرير ويمسح على كفي وينظر لي بتقرب، وعندما حركت رأسي رأيت المشهد بوضوح أكبر وأنا مستلقية على فراشه والجميع ملتف حولي ... سماح .. محمد.. والدة سماح .. شخص غريب لا أعرفه والذي أتضح بعد ذلك أنه الطبيب

وأخيرا تكلمت سماح:

- حمدالله على السلامه يا منى

وأنا أحرك رأسي أكتشفت أنني بدون الحجاب وشعري متناثر بجواري فوق وسادته فرعت بشدة وحاولت الجلوس ولم أستطيع من شدة الصداع هامة:

- أنا ايه اللي حصل

جلست سماح بجواري وقالت :

- أستريحى يا منى

وتكلم الطبيب قائلا:

- حمدالله على السلامه يا أنسة منى

قلت بخوف وأنا أمسك برأسي :

- حد يقولى ايه اللي حصل

جعلتني سماح أستلقى على السرير مرة أخرى وقالت :

- متخافيش يا منى أنت تعبتى شوية وجبنالك الدكتور

فهمت والدة سماح خوفا فتدخلت مطمئنة :

- متخافيش يا بنتى

بينما تابع الطبيب حديثه بعملية:

- متقلقيش يا أنسة ، عاوز أسألك سؤال بس أسترخى كده علشان الصداع ميزدش

تحرك سماح ووضع وسادة كبيرة مريحة تحت رأسي بمساعدة سماح والطبيب يتابع :

- أنت بتشتكى من أعراض السكر من أمتى ؟

أجبتة بحيرة:

- سكر ؟ أنا معنديش السكر يا دكتور

الطبيب :

- لا انتِ معنديش المرض نفسه أنتِ بتجيلك أعراضه لما بتاكلى أو تشربى سكريات .. فى عندك فى العيلة حد عنده السكر؟ حركت رأسي ببطء أن .. نعم فقال على الفور شارحاً:

- شوفى يا أنسة منى كل الامراض اللي فى الدنيا دي جزء منها كبير جدا استعداد وراثى

وانتِ عندك استعداد وراثى لمرض السكر ..علشان كده الحلويات الكثير والسكريات ممكن تخالى

السكر عندك يعلى بشكل ملحوظ ويؤدى للحصل ده... ولازم أنبهك لما إن شاء الله تتجوزى وتبقى

حامل لازم تخالى بالك جدا جدا لانك بسهولة جدا ممكن يجيلك سكر حمل .. لكن عموما متقلقيش لو

ظبطى أكلك هتبقى زى الفل



- أستنى شوية

ثم أمسك بأطراف شعري قائلاً بإعجاب:

- لسه مشبعتش من السواد الجامدة  
تعرفى أن الشعر الاسود زادك جمال على جمالك

بخجل شديد سحبت شعري من بين أصابعه بهدوء:

- سامح لو سمحت بطل تخرجنى قدام سماح كده  
قال مماًزحاً:

- خلاص ينفع أخرجك بينى وبينك

- يا سماح لو سمحت بطل الكلام ده

- معاكى حق انا زودتها شوية بس أعمل ايه مش قادر أمسك نفسى والله  
وأكمل بشغف:

- ها قوليلى بقى انا ايه اخر حاجه كنت بقولها لك فى البلكونة قبل ما اختى المجنونه تدخل علينا كده  
...اه افتكرت

قاطعته بابتسامة ممزوجة بالخجل :

- على فكرة هتلاقيها دخلت دلوقتي تانى هى مضبطة نفسها عليك  
سماح أكمل قائلاً بنظرات عميقة وبنقّة:

- برضه مش هيهمنى لو الدنيا كلها دخلت برضه هقولها

قلت برجاء:

- سماح متخرجنيش اكثر من كده الله يخالك انا موقفى بقى صعب اوى والمفروض اقوم امشى انا  
اتأخرت اوى  
فى هذه اللحظة دخلت سماح وهى تضحك قائلة:

- تعال شوف صاحبك وماما مضبطاه ، أو مال هيعمل ايه مع ...

قطعت حديثها عندما لاحظت ملامح سماح الحائقة فقلت على الفور:

- لو سمحتى يا سماح ممكن أروح أظبط هدومى عندك  
سماح بترحيب:

- آه يا منى تعالى أوضتى فاضية

وقفت أمام مرآتها فى غرفتها أهدم ملابسى وأرتدى حجابى وأنا أشعر بالضيق والخرج وألوم نفسى

على استسلامي لاقتراح سماح والبقاء في منزلهم منذ البداية ، بداخلي شيء يعاتبني بقوة ويعذبني ويشعرنني بذنبي ويدفعني للرحيل سريعاً من هذ المكان الذي لا أنتمى إليه بأى شكل من الأشكال ، أستندت سماح على الجدار المقابل أمامي وهي تكاد تقرأ صفحة وجهي ثم قالت بهدوء:

- ياابنتى مش كنتى تقولى موضوع السكر ده ، مكنتش ضغطت عليكى علشان تاكلى

- هو انا أصلا كنت أعرف يا سماح ، أنا أساسا مبحبش الحلويات لوحدى، كنت هعرف منين تنهدت قائلة:

- الحمد لله أنها جت على أد كده  
انتهيت من إحكام حجابي قائلة:

- طب يالا أنا ماشية

- كده لوحذك  
قلت بإصرار والإحساس بالذنب يقتلني :

- أه لوحدى، أنا خلاص عرفت السكة ....

خرجت من الغرفة فوجدته يقف أمامي مباشرة مستنداً إلى الجدار المقابل لغرفة سماح مباشرة و كأنه كان يتوقع هروبي السريع منه ، واعتدل متسائلاً:  
- رايحة فين ؟

- ماشية، أنا أتاخرت أوى

- مينفعش أسيبك تمشى لوحذك خصوصاً وانتِ تعبانه كدة

- أنا خلاص بقيت كويسة  
فقال بتصميم :

- مش هتمشى لوحذك ده قرار نهائى  
تدخلت سماح مقترحة :

- خلاص يا سماح ، محمد ماشى دلوقتي هخليه يوصلها فى سكتة  
فقال على الفور بحسم:

- ومين قالك أنى هاسيبيها تركب مع محمد لوحدها

- هو هياكلها يعنى  
شعرت باختناق وأنا أراهم يقررون مصيرى بالنيابة عني وكأننى غير موجودة ، لماذا يحاول الجميع اتخاذ قراراتي دون الرجوع إلي؟! فوجدتني أقول بانفعال وأنا أتحرك فى طريقي للمغادرة :

- أنا ماشية لوحدى ، ولا محمد ولا غيره  
أستوقفنتي قبضته التى التفت حول معصمى هاتفاً بغضب:



- أنتِ عناديةٍ ليه كده؟ .. بقولك مش هتمشى لوحديك مفيش سمعان كلام خالص ولا انا مش راجل  
قدامك

غضبه جمدنى مكاني وانتابتنى رجفة توتر مشوبة بفرحة خفية لغيرته الشديدة فقلت باستسلام:

- طيب ايه الحل دلوقتي هبات هنا يعنى  
سامح :

- لا طبعا هاجى معاكوا  
سامح :

- يا سامح انت لسه تعبان

- مش عاوز ولا كلمه أنا داخل ألبس علشان أروح اوصلها .. قولى لمحمد يجهز نفسه  
سامح باستعطاف :

- طب ممكن آجى معاكوا  
نظر لها مفكراً فاستدركت:

- علشان أبقي معاك يعنى هسيبك ترجع لوحديك وانت تعبان كده  
اوما برأسه موافقاً وأسرع إلى غرفته لتبديل ملابسه وبعد مداولات كثيرة مع والدته سماح غادرت مع  
سامح وانتظرنا سماح أسفل البناية حتى لحقنا محمد الذى ما أنر رأته سماح حتى قالت متسائلة:  
- فين سماح يا محمد؟

- نازل ورايا  
- أتأخر كدة ليه؟

- جاتله مكاملة منرفزاه مش عارف يخلصها..

وهمس لسماح فى أذنها:

- فاكرة البت اياها .. مش عاوزة تسيبوا فى حاله .. هاتك يا عياط فى التليفون ومش عاوزة تقفل

أستطعت التقاط كلماته التى كانت همسا مرتفعاً وصل إلي بسهولة وأنا أقف بجوارهما وهنا لمحت  
سامح يعبر باب منزلهم متوجهاً نحونا على عجلة من أمره وهو مازال ممسكاً بالهاتف واضاعاً أياه  
على أذنه ويتحدث بحنق ويشير لـ محمد بتشغيل السيارة ولنا بالركوب ، وكأن سماح استغلت الموقف  
واستقلت السيارة فى المقعد الامامي بجوار محمد وكان أمر خطبتهما باتت محتومة وتلقائياً فتح سماح  
الباب الخلفي ليركب بجوارى ، وفى الطريق أرهفت سمعي لحديثه على الهاتف وهو يقول بضيق:  
- طب عاوزة أية دلوقتي؟

-----

- كل اللى بتقولية ده قولتية قبل كدة

-----

- مبقاش ينفع



- أه ومالة مفيهاش حاجة يرجعوا أصحاب

نظر لي سامح نظرة نارية وقال بغضب مكتوم:

- هو أيه اللي و مالة... هو حضرتك أصلا تعرفى مين دى؟  
قلت بارتباك:

- مش بالظبط يعنى بس الكلام باين

- يعنى سيادتك فهمتى الموضوع ورغم كده بتقولى ومالة!!  
زأغت نظراتي وقلت بخفوت:

- هو انا قولت حاجه غلط  
سامح بعصبية:

- لاااا ابدأ هو انت بتقولى حاجة غلط خالص

( ٨ )

بعد ثلاثة أيام هاتفتني سماح وأبلغتني بمقابلة محمد لوالدها وأنهم حددوا موعد للخطبة بعد أسبوعان حتى يكون سماح قد شُفي تماما وبدأ فى تحريك ذراعه بسلاسة ، الخبر أسعدني للغاية وأنا أرى قصة الحب هذه تتوج بارتباط رسمي يكملها بنجاح وتعلق قلبي الحالم بسماح أكثر وأنا أتصور علاقتنا تأخذ نفس المنعطف الرسمي الذى أحلم به رغم انقطاعه عني منذ آخر مرة كنا فى السيارة وغضبه مني ومن كلماتي ، وبدات استعداداتي على الفور بالبحث عن مكان أوجر منه ثوب لهذة المناسبة على قدر ميزانيتي التى لم تكن تسمح بشراء شيء سوى حجاب بنفس لون الفستان وفى كل اتصال هاتفى وبين سماح كانت تؤكد علي للحضور باكراً للذهاب معها إلى الكوافير فأنا سأكون الوصيفة الأولى !. ، وبعد الألاح على أمي أعطتني إيداً مفتوحاً للخروج باكراً والعودة الساعة التاسعة مساءً وكلل الأمهات كانت ترجو أن أعود لها من حفل الخطبة بعريس مناسب !

وفى الكوافير حصل مني أكبر تنازل ورضخت لرغبة سماح وخلعت حجابي ! ، ورغم نظرات سماح المتأملة إلا انه كان لا يزال غاضباً مني ويتجنب الحديث معي حتى وصلنا إلى قاعة الفندق التى سيقام بها حفل الخطبة ، وفى تلك القاعة اكتشفت بأن ثوبي محتشماً للغاية بجانب ما رأيته على الفتيات والنساء هناك وعلى خلاف ما كان متوقع مني اتخذت جانباً منزوياً قليلاً وأنا أرقب تحركات الحضور وبالأخص أقترب سماح الدائم من ياسمين وهو يتعمد أن أراهما سوياً فى وقفة حميمة للغاية

وفجأة انخفضت الانوار قليلاً واتخذت ألواناً هادئة وتسربت من زوايا القاعة الموسيقى البطيئة وقام أفراد الفرقة الموسيقية بدعوة الحضور للرقص البطيء على الانغام الحاملة ، نظرت إلى سماح الذى كان يحرص على أغاظتى وهو يلف ذراعه حول ياسمين ليرقص معها وشعرت بوخزات الدمع فى

عيني وهى تنذرني انها ستهبط بقوة وبلا توقف ، شعرت بوحدة طاغية وتجمعت برأسي كل ذكرياتي المولمة فى تلك اللحظة واختنق حلقى بغصته وضاق صدرى فوجدتني أتسلل للخارج أنوى الرحيل دون أن يشعر أحداً بي ، ومنذ متى وأنا يشعر بي أحدهم من الأساس ؟ .  
خرجت من القاعة ونزلت السلم ووصلت لحديقة الفندق وكل ما كان يشغل بالي هو كيف سأعود إلى منزلى ، فتحت حقيبتي وأخرجت منها حجابي وأنا أبحث بعيني عن مكان أرتديه فيه، وهنا استمعت إلى نداء لاهث من خلفي:

- منى ...

ألتفت خلفي لأجده أتى نحوى بخطوات سريعة أقرب إلى الركد :

- رايحة فين قطعنى نفسى

وقفت أنظر إليه حتى توقف أمامى مباشرة ويدقق النظر بدموعي مضيئاً ما بين حاجبيه بتساؤل:

- أيه ده ..دموع ..ليه ؟

- مفيش بس مخنوقة شوية

- طب ليه ؟ و ماشية دلوقتي ليه ؟

حاولت تجفيف دموعي قائلةً بجمود:

- كفاية كدة هاروح

سامح :

- هو انت لحقتى ، مش كفاية قاعدة لوحذك ، كمان ابص ملقاكيش كدة

قلت بسخرية :

- معلىش أصل محدش فاضيلى .. روح يلا ..تلاقى ياسمين بتدور عليك

بابتسامة قال:

- ااه علشان كده مشيتى ..

قلت بانديفاع:

- لاء طبعا أنت حر فى تصرفاتك ..أنا ماشية علشان مش عاوزه أتأخر، لسه مش عارفة هاروح ازاي

قال معاتباً:

- ده كلام ؟، وأنا رحى فين

- لا مش عاوزة اعطل حد معايا

- أولاً أنا مش حد ، ثانياً أنا مفيش ورايا حاجة تعطيني عنها

قلت بسخرية مريرة:

- ليه هى العروسة دى مش أختك .. بلاش دى ..مش خايف ياسمين تسأل عليك

سامح ببرود:

- متسأل وأنا مالى بيها ..

فقدت أعصابى هاتفة بانفعال مفاجيء :

- يعنى أيه مالك بيها أومال كنت بترقص معاها ليه وحاطط أيدك عليها وواخدها فى حضنك ليه وعمال

تضحك وتهزر معاها من الصبح ليه؟

هااا ما تكلم ..طبعا مش لاقى حاجة تقولها .. طبعا هتقول ايه ..علشان كدة مكلمتنيش ولا مرة من

ساعة ما كنت عندكم تلاقىك كنت عايش حياتك معاها طبعا

والهدية بتاعتك دى هروح اكسرها مليون حته ولا اقولك هرجعها لك شكلها وصلتنى غلط و بص بقى

انت ملكش كلام معايا تانى ورقمك همسحه من عندى و.. أنت مبتسم أوى كده ليه شايف أراجوز

قدامك ؟!

قال بابتسامة ارتياح كبيرة:

- بحبك ... وبحب غيرتك عليا

تحول اندفاعي وغضبي إلى نوبة بكاء شديدة وبدأ هو في تجفيف دموعي بأنامله قائلاً:

- متعيطيش يا حبيبتي.. قلبي بيتقطع لما بشوفك كده

دفعت يده بحنق فقال بابتسامه خبيثة:

- بصراحة انا كنت قاصد.. فاكرة آخر مرة واحنا فى عربية محمد لما قولتى آه ومالة يببقوا أصحاب؟

... أضايقت منك أوى وحسيت انى مش فارق معاكى و مش غيرانة عليا

واتوقعت انك تفهمى ده وتحاولى تكلمينى تقوليلى أى حاجة لكن انت معبرتينيش طول الأسبوعين اللى

فاتوا

قلت بعصبية متوترة :

- يعنى كنت عاوزنى اقول ايه قدام محمد وسماح يعنى .. أقولك متكلمهاش تانى ومتردش عليها ..

أختك وخطيبها يقولوا عليا ايه

قال بهدوء وبساطة:

- يقولوا عليكى بتحبينى

أبتعدت من أمامه هاتفة بحنق:

- أنت مستفز

لحق بي وقبض على معصمي ليديرني إليه مجدداً قائلاً :

- وانتِ خوافة .. خايفة ليه هه .. خايفة تعترفى بالحب ليه ؟ .. فاكرانى بلعب بيكى .. فاكرانى بتسلى

..مالك يا منى مرعوبة منى ليه كدة!

هظلت دموعي غزيرة وأنا أهتف من بينها بغصة وحيرة لا أعلم مصدرها :

- معرفش .. انا كده .. انا عمرى ما اتعاملت مع رجالة ..ومش عارفة اللى انا فيه ده صح ولا غلط ..

مش عارفة أصدق الأفلام والمسلسلات اللى بشوفها واللى بتقولى أن اللى انا فيه ده عادى وصح ولا

أصدق حاجة جوايا مش عارفاها بتقولى ان ده غلط وان ربنا غضبان عليا

أقترب منى أكثر وهو يحسم الأمر هامساً ويمسح على شعري:

- سيبيلى قلبك وانتِ عمرك ما هتندمى ..أوعدك ، بحبك والله العظيم بحبك

وضمني إليه فى غفلة منى فدفعته قائلة بارتباك :

- ايه ده يا سماح انت ازاى تعمل كده؟

أرتسمت على وجهه أمارات التعجب:

- وفيها ايه .. هو أحنا مش بنحب بعض

- بس مش بالطريقة دى

: سماح :

- او مال ايه .. هنحب بعض من بعيد لبعيد

قلت متعجبة:

- يعنى هو ده الحب من وجهة نظرك!؟!

قال ببساطة:

- لا مش هو ده الحب طبعاً لكن الحب ده نبتة لازم نرويهها

- يعنى انت توافق لاختك بكدة؟

- ايه يا منى الكلام القديم ..أنتِ من أيام الابيض واسود ولا أيه؟

قلت بحرج :

- لو سمحت بلاش تريقة .. انا كدة

: سماح:

- وانا بحبك فى كل الاحوال بس خاليكى متفتحة شوية عشان نقدر نفهم بعض
- اللى انا اعرفه ان الحاجات دى بتحصل بين المتجوزين بس
- سامح بتعجب:
- حاجات ايه .. انا كنت عاوز اخذك فى حضنى بس !
- بس انت مش جوزى عشان تحضنى
- قال ساخرأ:
- انت آخر مرة شوفتى فيها فيلم كانت أمتى؟
- قولتك متريش عليا

أستخدم سامح كل أساليب التأثير الممكنة و معها كل أسلحته وفي النهاية قال وكان الأمر لم يعد يعنيه:  
 - خلاص يا منى براحتك انا مش هقرب منك تانى لحسن تفنكرى انى مش عاوز منك غير كده وبس ..  
 ممكن نرجع القاعة بقى ؟

( ٩ )

- مفيش خروج بعد كده أنت فاهمة ولا لاء ؟ .. عشان تبقى بعد كدة ترجعى بيتك نص الليل كويس يا هانم
- أنا كنت فى فرح وماما سمحتلى أتأخر
- شوفى بقى .. أنا صبرت عليكى كتير لكن توصل لحد انك ترجى البيت نص الليل لا اأحمدى ربنا ان امك واقفة بينا
- حاولت أمتى قدر المستطاع الدفاع عنى ووقفت بوجه أخى طارق تقول برجاء :
- خلاص يا ابنى مش هتعمل كده تانى معلى حقك عليا أنا
- أسمعى يا ماما من هنا ورايح البت دى مالهش خروج تانى إلا لما الدراسة تبدأ وانت المسؤلة قدامى
- .. كبيرها أوى تروح عند "حياة" جارتنا وبس سامعانى ولا لاء؟
- اندفعت نحو غرفتى أبكى وبداخلى يتمزق ألماً "معقولة الليلة الرومانسية دى تنتهى النهاية البشعة دى،
- انا عارفة محدش هيقدر على طارق ده ابداء، لو مكنتش ماما موجودة وخاف بابا يصحى كان مد ايده عليا ،كان أيه بس اللى جابه عندنا النهاردة كان يوم منيل"

لم أجد متنفس منذ هذا اليوم إلا زيارات صديقتى "حياة" والجلوس على الأترنت لفترات طويلة وأخبرت سامح بالهاتف بما حدث فأعطانى بريده الألكترونى وأصبح كلامنا كله من خلال برامج المحادثة الكتابية فقط فلقد أصبح من الخطر الكلام حتى لا يستمع أحدا إلينا

فى هذه الفترة توطدت علاقتى بـ"حياة" ووثقت بها أكثر وقصصت عليها تفاصيل علاقتى بسامح من البداية وحتى ذلك اليوم وكان مما قصصته عليها حديث دار بينى وبين سامح على برنامج المحادثة وأنا أسألها بسذاجة "هو كدة حرام؟"

سامح :

- وحشتينى يا منى قلبى

- وأنت كمان

- أنا قولت نتكلم دلوقتى أكيد الناس عندك نايمة

- اه فعلا كده احسن

- أعملى قبول للطلب دة وغمضى عينيكى

ابتسمت عندما ظهرت صورته أمامى على شاشة الحاسوب وكانت المرة الاولى التى آراه منذ حرمت

من الخروج فكتبت بسعادة:

- ايه ده انت جبت كاميرا؟

سامح :

- عمرى ما فكرت أستعملها قبل كده.. بس واضح ان معاكى هستعمل حاجات كتير أوى

- أول مره أشوفك من أسبوعين.. ايه ده انت كنت نايم ولا ايه

سامح :

- اه يا حياتى نمت شوية أول الليل علشان اعرف أسهر معاكى براحتى

ثم استدرك بخبث وهو يميل للأمام ليووجه الكاميرا عن قرب وكأنه يقترب منى:

- آاه يا ما نفسى السهرة دى كانت تبقى فى بيتنا

- هو حد مانعك.. فى ايدك تخلى علاقتنا رسمى

سامح :

- والله يا حبيبتى ده يوم منيا لكن أنت عارفة لسة فاضلى شهرين وأخلص الجيش ويدوب هدور على

شغل آجى اقولهم ايه بس

كتبت بتأفف:

- حاول تستعجل شوية يا سامح انا خلاص مش قادرة على الحبسة دى

سأل بنظرات مكتسحة:

- وحشتك يا منى؟

- اه

قال بعد تنهيدة طويلة حارة :

- مش قادر انسى الثانية اللى خدتك فيها فى حضنى .. بدمتك مش نفسك تيجى فى حضنى تانى

كتبت بخجل وتوتر :

- سامح قولتك مبحبش الكلام ده

قال حانقاً:

- ليه هو انت بتكسفى من الكتابة كمان هو انا شايفك يعنى ولا حتى سامع صوتك

كتبت معترضة:

- لا برضه مش هينفع

سامح معاتباً:

- يا منى أى اتنين بيحبو بعض بيقولوا الكلام اللى مش عاجبك ده .. انت كده مبتحبنيش

ثم ظهرت علامات الحزن الممزوج بالغضب على وجهه وتابع :

- انا عمال اثبتك حبي وانت مش عاوزة حتى تديني ريق حلو .. انا بجد مبقتش متأكد من مشاعرك ..  
بصى يا منى لو حاسه انك أتسرعتى فى العلاقة دى قولى متكسفيش وأوعدك اننا هنبقى اخوات  
حتى لو كان قلبى هيموت عليكى حتى لو اتعذبت فى بُعدك لكن مقدرش اكمل بالشكل ده وانا شايفك  
حاطه حاجز بينا دايما

بلهفة كتبت بسرعة:

- متقولش كده والله بحبك ومقدرش استغنى عنك

- اللي بيحب حد بياخده كله على بعضه مش بياخد حاجة ويسيب الثانية علشان كدة انا عاوزك كلك  
على بعضك علشان بحب كل حاجة فيكى لكن انت عاوزة صوت سامح قلب سامح من بعيد لبعيد وده  
مش حب يا منى دى أنانية

حزنت لرؤيته حزينا ولكلماته الأكثر حزنا فكتبت:

- لا يا سامح متزعش منى كدة.. أنا والله مش عارفة اعمل آيه علشان ارضيك  
قال مؤكداً :

- قولتلك قبل كده سيبيلى قلبك اسمعى كلامى هتحسى بالحب الحقيقى

- حاضر هحاول

قال بتصميم:

- مش بالكلام

- طب اعمل آيه؟

أضاف بعض النعومة الى كلماته :

- متحطيش بينا حواجز انت ملكى وانا ملكك

باستسلام كتبت :

- حاضر

فقال بجرأة :

- منى شغلى الكاميرا بتاعتك .. نفسى أشوفك بهدوم البيت أكيد زى القمر

أنتهيت من سرد تفاصيل ما حدث بيننا من حوار فى تلك الليلة على أذن " حياء " التى أنتفضت على  
أثر سماعها سؤالي الأخير الساذج " هو كده حرام ؟" فقالت بأنفعال:

- أنت عبيطة ولا بتستعبطى؟ .. لسه بتسألنى هو كده حرام ولا لاء ، طبعا حرام .. حرام جدا والموضوع  
كله من أوله لآخره حرام .. أوعى تعملى كدة أوعى تجاربه وكويس أنك اتهربتى ومشغلتيش  
الكاميرا.. هو انت فاكرة انه عاوزك تفتحي الكاميرا علشان يشوف جمال عيونك !.. انت آيه؟  
معنديش عقل ، الواد ده مش بيحبك يا منى .. الواد ده عاوز منك حاجة معينة مش أكثر من كدة  
هتفت معترضة بخفوت:

- يا سلام ! .. يعنى هو هيتعب نفسه كل ده علشان عاوز منى أنا الحاجات دى ؟ .. طب ليه ما الحاجات  
دى كتيرة فى الشوارع وهو ألف واحدة تحب تصاحبه

لم تصدق حياء سذاجة حديثي وقتها ونظراتها نحوى كانت عاجزة لأبعد حد وكأنها ترانى قد وقعت فى  
فخ محكم وقد أنزلق إليه دون ارادتي فحاولت أن تقصيني قائلة:

- لا يا ماما الصنف ده بيحب يصطاد اكثر ما بيحب يشتري جاهز

لما يروح يشتري جاهز مش هيحس بأى مكسب أهى واحدة بايعة نفسها للكل .. لكن لما يصطاد واحدة  
كانت بتخاف ولد يقولها ازيك .. يحس بانتصار ويرضى غروره ومش بعيد يكون عامل عليكى رهان  
قلت بأنزعاج:

- رهان يعنى آيه



حياة:

- معرفش الله أعلم .. صحصحي كدة للناس وراقبي ربنا قبل ما تراقبي أى حد تانى

كلما زادت صلابتي كلما زاد عناده وظل يبحث بشتى الطرق عن وسيلة تذيب صلابتي الواهية تلك وتبعد خوفاً منه عن مسار رغباته.. وظل الوضع على ما هو عليه مجرد حديث كتابي فقط حتى انتهت العطلة الدراسية وبدأ العام الدراسي الثانى بعد أن نجحت بتقدير مقبول وسماح كذلك وأنهى هو فترة خدمته العسكرية وعمل مع أبيه فى نفس المكتب الهندسي وكان يوم السبت هو اليوم المثالى للمقابلات وكانت دائماً المقابلات تكون جماعية فى البداية ثم تنفرق فى اتجاهات مختلفة ومن شدة أهتمام سماح وبحثه عن طرق كثيرة يذيب بها جسورى نسي أن له أختاً يراها بعينه تتأبط ذراع خطيبها وتميل عليه بميوعة وهى واثقة أن أخيها فى عالم آخر!

وكانت ضمن هذه المقابلات ..مقابلة فى السينما التى دخلنا إليها معا ولكن عندما انطفت أنوارها انشغل كل شاب بفتاته.. كان فيلم عاطفي رومانسي بنسبة مئة بالمئة حتى أنني انفعلت جدا مع الأحداث وتخيلت نفسي مكان البطلة وسامح هو البطل وهما يتبادلان الغرام .. ودبت مع الكلمات المخدرة "حبيبي يا عاشق يا حر زى الطير.. شاور هقول حاضر للحب قلبى أسير" وأخذت تراودني نفسي كثيراً

" إذن هذا هو الحب فعلا .. البطلة والبطل يتعانقان بشكل حميمي ، يعنى سماح معاه حق ولا ايه؟.. هو ده الحب فعلا؟! ايوه هو قالى كده الحب فيه كل حاجة ..أهو البطل والبطلة لسه متجوزوش ورغم كدة بيحصل بينهم كل حاجة وفى آخر الفيلم اتجوزها ومقالتش عليها حاجة وحشة ، يعنى انا فعلا متعصبة أوى معاه وممكن يكون معاه حق"!!!

وكان سماح قد قرأ أفكارى فى تلك اللحظة فمد يده يعبث بيدي فلم يجد ما كان يجده فى السابق من صد

فعلم أن الطريق بات مفتوحاً أمامه وأن الفيلم فى وقت قصير جدا أثمر بنتيجة معي أكثر من كل محاولاته فيما مضى ... فحاول أن يتناول أكثر فأنتفضت مكاني وكأني كنت أحلم وأبعدت يده وأنا أتزحزح بعيداً عنه .. فكان العقاب منه سريعاً وقام منتفضاً وبدل مكانه مع سماح.. لم تتوقف دموعي فى الوقت القصير المتبقى من الفيلم حتى انتهى وقد اتفقتنا سابقاً على الذهاب إلى مكان آخر بعد انتهاء فترة عرض الفيلم

ولكن سماح أكمل عقابه وأستاذن وانصرف بدون تبادل كلمة واحدة معي تحت سماح بي جانباً بعيداً عن محمد متسائلة بدهشة لتغير أخيها المفاجيء:

- فى ايه يا منى ماله سماح؟

قلت بدموع حبيسة :

- انا خلاص يا سماح مش عارفه ارضيه

وعرفت سماح كل ما حدث فى داخل القاعة السينمائية وحاولت أن تقنعني بالبقاء معهما ولكني رفضت وانصرفت

محمد :

- فى ايه يا سماح حصل ايه؟

سماح :

- تعالى واحكيك واحنا ماشيين

أستمع محمد إلى سماح وهى تسرد عليه تفاصيل ما دار بين سماح ومنى وقد كان تعليقه غريباً ومن الواضح انه تسرع به :

- معاها حق هي كده بنت محترمة  
سماح بصوت عالي ونظرات حادة:  
- نعمممم يا سى محمد يعنى انا بقى اللي مش محترمة  
أحتوى محمد الموضوع وعالجه سريعاً:  
- لا يا حبيبتي مش قصدي أحنا حاجة تانية احنا مخطوبين وهنتجوز قريب  
- اه افكرت  
محمد بخبت:  
- طب بقولك ايه طالما مشيوا .. ما تيجي  
سماح بدلال :  
- لا يا سيدى المرة اللي فاتت ربنا ستر  
محمد :  
- متقلقيش انا خلاص بقيت حريف

قاطعني سماح لمدة طويلة بعد هذا اليوم فحاولت كثيرا الإتصال به بكل الطرق وعندها كان يجيب  
بإقتضاب شديد :  
- أنتِ اللي خالتيني ابعدي عنك  
حاولت أن أجلب عاطفته بكلمات الحب عن طريق الرسائل لكن مهما كتبت له كان كل مرة أجابته  
واحدة

- مش بالكلام  
كانت وحدتي لا توصف حتى و أنا بين الناس ،قلبي منشق نصفين بين حبيبي وبعده عني وبين خجلي  
وضميري والشئ الذي أعرفه بداخلي والذي يؤكد صحة صدى له  
والذي زاد من وحدتي أكثر غياب سماح المتكرر عن الكلية والمحاضرات ، فقد كانت سماح تأتي نادراً  
جداً وعلاقتنا اصابها الفتور وحتى عندما التزمت سماح بالحضور قبل امتحانات نصف العام كانت غير  
طبيعية بالمرة ، ليست هذه سماح التي أعرفها أبداً..! ، دائما في شرود وتفكير وقلق وفي يوم ميلادها  
جلبت لها هدية بسيطة :  
- كل سنة وانتِ طيبة يا سمس  
سماح بحزن:

- وانتِ طيبة يا منى  
- قوليلي بقى العربية الحلوة دي هدية بابا ولا محمد؟  
سماح :

- محمد

قلت متعجبة:

- وزعلانة ليه كدة.. المفروض تفرحي  
سماح بشرود :  
- أفرح !؟!

اجتاحني قلق شديد وأنا أرى نظرات الضياع بعينيها :

- مالك يا سماح احكيلى .. ده انا صاحبتك الانتم مالك يا حبيبتي فضفضى معايا  
بدأت دموعها تنساب رغماً عنها :  
- أسكتي يا منى سيبنى في حالي  
مسحت على يدها بحنان قائلة:

- لو مقولتليش انا طب هتقولى لمين اتكلمى يا سماح فرجى عن نفسك  
سماح ببكاء وصوت مخنوق :
- سماح مش هيعرف ؟
- غاص صوتي فى حزن شديد :
- سماح ! .. هو سماح بقى بيكلمنى أصلا من يوم خروجة السينما  
سماح بقلق:
- أو عدينى الكلام ده يبقى سر بينى وبينك

( ١٠ )

لم أشعر بنفسي إلا وأنا أضرب على صدري من شدة الانفعال والألم:  
- ينهار أسود بتقولى ايه يا سماح  
سماح ببكاء:

- ارجوكى يا منى كفاية.. انا فى اللى مكفينى
- معقولة ... طب و هتعملى ايه دلوقتى
- جففت سماح دموعها وتكلمت بأصرار:
- لازم يوافق يتجوزنى مفيش حل تانى
- صعقت من عبارتها:
- يوافق !! يعنى ايه هو مش عاوز ولا ايه

عادت سماح إلى بكانها وهى تقول:  
- بقاله فترة بيتهرب منى وكل ما أفتح معاه موضوع الجواز يقولى مش فاضى ويأجل الكلام لبعدين  
لكن انا المرادى مش هسكت انا هروحله بكرة ولازم يحدد موقفه معايا .. مش هو كان بيقولى  
(حبنا نبتة لازم نرويهها ) أهى النبتة كبرت وبقت شجرة وفروعها لفت حوالينا ومينفحش حد يسبب  
التانى

شردت بعيداً والكلمات تتردد داخلي (حبنا نبتة لازم نرويها ) .. ! ياه .. كان سماح دايماً يقول  
الجملة دي معقولة .. معقولة هو كان يقصد كدة معقولة سماح يطلع هو كمان كده .. معقولة!؟

بعد مرور عدة أيام توجهت لزيارة جارتى حياء وكنت قد قرأت إعلان معلقاً فى الكلية عن أن بعض  
الأسر الطلابية سيقومون ندوة دينية ثقافية والحضور مفتوح لمن يرغب فشعرت برغبة قوية لتوجيه  
دعوة لـ حياء فى عزم صادق على التقرب منها أكثر وقد هوت سماح من عليائها بنظري ، وعدتني  
حياء بحماس فاتر بالحضور فألححت عليها أكثر وطلبت منها أن تصحبني إلى هناك لأضمن حضورها  
ووافقت

أما هناك داخل شقة محمد الخاصة والقريبة جداً من الجامعة كانت هناك معركة دائرة بين محمد  
وسماح التى كانت غاضبة للغاية:

- يعنى أيه الكلام ده؟

محمد بتأفف:

- يعنى مش هينفع كل ما تشوفينى تكلمينى فى موضوع الجواز ده .. أنا زهقت  
سماح بذهول:

- دلوقتى زهقان منى يا محمد.. فإكر لما كنت تتمنى بس نظرة رضا ولا نسيت  
قال بضيق:

- شوفى يا بنت الناس لو فضلتى كل ما تشوفينى تعملى الفيلم ده يبقى انت كدة بنتهى علاقتنا..  
سماح أقتربت منه ووضعت يدها على يده وتكلمت بتوسل:

- أنت مش وعدتني اننا هنتجوز قبل الامتحانات  
أبتعد عنها قانلاً :

- مش هينفع يا سماح

سماح بتوسل أكبر :

- ليه؟

محمد بتأفف:

- بصى يا سماح انا لحد دلوقتى مخلقتش أى وعد معاكى ... خطوبة وخطبتك شبكة وجبتك شبكة  
مفيش بنت فى مصر تحلم بيها ... طلبتى عربية هدية عيد ميلادك جبتك .. عاوزة أيه تانى؟

سماح برجاء:

- عاوزة نتجوز .. نكتب كتابنا طيب

محمد ببرود:

- أنت بقيتى زنانة أوى على فكرة .. جواز أيه وبتاع أيه .. هنعمل أيه بالجواز يا حبيبتي ما أحنا كده  
حلوين

لظمت وجهها وصرخت :

- يعنى أيه مش هتجوزنى...

أخدها بين ذراعيه مهدناً :

- أهدى بس يا حبيبتي .. أنت طلبتى حاجة وأنا معملتهاش؟ .. لو عاوزة أجيبك نجمة من السما  
أجيبك..

دفعته عنها هاتفة :

- انا مش عاوزه نجمة أنا عاوزاك تسترني

محمد بسخرية:

- أسترك أيه بس ، أيه الكلام القديم ده؟!

أنتحبت وبكت بشدة :

- ده جزاتي يا محمد .. ده جزاتي اني حبيبتك تضحك عليا وتخدعني طب راعي أنى أخت صاحبك

..ياريته ماكان صاحبك ياريته ما كان دخلك بيتنا

محمد بسخرية وبرود:

- وانت كنتي متخيلة واحد زى اخوكى ده هيصاحب مين يعنى غير واحد شبيهه

سماح بصراخ:

- أحرص متكلمش على اخويا كلمة واحدة

محمد :

- أخوكى مين ده اللي اتكلم عليه يا ماما .. أخوكى اللي كان عاملنى بنك التسليف بتاعة .. أخوكى اللي

كان بيقد طول الليل يحكيلى حواديت ازاي أوقع البنات .. وأدينى اهو طلعت تلميذ شاطر

تفطر قلبها وكادت تختنق :

- بقى بتعمل فيا كدة علشان حبيبتك

قال وهو يلوح بيديه بحركات مسرحية ساخرأ:

- لالا لا متصدقيش نفسك أوى كدة .. أنت اللي كنتي معندكيش مانع من الأول ولا نسييتي

صرخت سماح :

- انا كنت فاكراك بتحبني مكنتش اعرف انك ندل

محمد باستهزاء:

- يا سلام طب ماهي صاحبتك بتحب أخوكى ... لاء وأييه أخوكى ده الأستاذ كمان .. رغم كدة مش

عارف يطول منها حاجة .. يبقى يا أموره انا اللي ندل ولا أنت اللي...

وضعت كلتا يديها على رأسها وأخذت تبكي بشدة :

- يعنى طلعت فى الآخر انا اللي مجرمة

أقترب منها وأمسك يديها وتكلم بنعومة:

- سمسة يا حبيبتى ليه بس كدة .. ليه دخلتينا فى المتاهات دى ما احنا كنا حلوين وعاشين حياتنا

كويس

نظرت له نظرة حقد متسائلة من بين دموعها:

- أنت ازاي بتحط عينك فى عين اخويا وانت نيتك قدرة كدة من ناحية أخته؟

محمد بتعجب:

- زى ما انت بتحطى عينك فى عينه بالظبط وانت بتبقى لسة فى حضن صاحبه

خرجت من شقته والحد يملأ قلبها ووقفت أمام السيارة وقبل أن تفتح بابها تذكرت أنها كانت ثمن

علاقتها الملوثة ووقفت مترددة ثم حسمت أمرها:

- لاء مش هسيبها .. يعنى أيه .. هياخد كل حاجة ببلاش وانا هطلع من المولد بلاحمص

أستقلتها وقادتها بسرعة عالية لا تكاد تفرق بين خطوط الطريق ودموعها وهي يتردد فى عقلها جملة

محمد

(طب ماهي صاحبتك بتحب أخوكى لاء وأييه أخوكى ده الأستاذ كمان .. رغم كدة مش عارف يطول

منها حاجة .. يبقى يا أموره انا اللي ندل ولا أنتى اللي ..)

وبدلاً من أن توجه طاقة الكره تلك تجاه محمد وجهتها تجاهي وأخذ شيطانها يردد لها جملة واحدة

"منى مش أحسن منك مش لازم تبقى أحسن منك "

أنتبه سامح من عبثه على جهاز حاسوبه الشخصي على صوت طرقات باب غرفته فقال منادياً:  
- أدخل

دخلت سماح بابتسامة زائفة وهي تقول:

- مساء الخير

قال بعبوس:

- عاوزة أيه يا سماح؟

تصنعت الجدية قائلة:

- عاوزة أتكلم معاك شوية .. ممكن

ترك ما كان يفعل وأستدار لها:

- نعم عاوزة ايه

- بجد يا سماح أنت بتحب منى ولا لاء

سماح بضيق:

- وأنت مالك بتدخلى ليه فى خصوصياتى

سماح تخلط صوتها بالأهتمام:

- أنت اخويا ولازم أهتم بأمورك

سماح بتأفف:

- وبعدين بقى ..خلصى عاوزة ايه من سؤالك ده

وضعت يدها على كتفه بحنان:

- عاوزاك بس متضايقش لما تعرف أنها نسيبتك

أنزعج بشدة وهو يقول:

- أيه نسيبتى ..أنت بتقولى ايه وعرفتى منين .. هى اللى قالتك كده؟

قالت بشفقة:

- هى مقلتش بالظبط يعنى بس أى واحدة بتحب واحد لما يبيعد عنها بتبقى مضايقة .. زعلانة ..

مخوفة

لكن منى شايفها ولا على بالها

صمت سماح لثوان بتفكير ثم قال:

- معقولة .. انا مكنتش عامل حساب كدة أبدا

قالت بفضول:

- يعنى ايه مكنتش عامل حساب كده .. هو انت كنت قاصد تبعد عنها

سماح بتفكير:

- بصراحة آه .. كان ليا هدف كدة بس اللى بتقولى عليه ده بوظلى كل حاجة

تسانلت بلهفة:

- هدف ايه؟

كاد أن يسترسل فى الحديث لكنه تذكر أنه يتحدث إلى أخته فقال بانزعاج:

- أيه ده وانت مالك انت

سماح باهتمام:

- متخابيش عليا ده انا اختك ولو طلبت مساعدتى مش هتأخر أنت أهم عندى منها.. قولى بصراحة  
أنت بتحبها ولا لاء  
أجاب بعصبية:  
- مش عارف

- يعنى ايه مش عارف ماهو يا بتحبها يا لاء  
قال بتردد:

- بصراحة.. أنا فى الأول كنت حاسس انى ممكن أكون بحبها .. لكن أول ما ابتدت تسيبنى امسك أيدها  
وبقينا نخرج مع بعض وانا بقيت احس انها زيها زى أى واحدة سهلة وبقت متفرقش معايا

وعندما سمعت سماح عبارة (بقت متفرقش معايا ) لمعت عيناها بانتصار وقالت:  
- يعنى بتبعد عنها دلوقتى علشان ناوى تسيبها؟

أجابها بتردد قلق :

- لاء ..أنا بس شايفها كدة عين فى الشرق وعين فى الغرب فقولت أبعدها عنها شوية كدة أخلى قلبها  
يغلى شوية وتأنب نفسها على صدها ليا فلما أرجعها تبقى زى العجينة أشكلها فى أيديا زى ما أنا  
عايز

وساعتها متقدرش تقولى لاء أبدا علشان هتبقى عارفة اللى هيحصل بعدها  
لكن اللى انت بتقولى عليه ده معناه ان الطريقة دي كمان فشلت معاها ولازم ألحق قبل ما تنساني  
خالص

شعرت بقلبها يعتصر بداخلها (هى دي بقى الخطة اللى علمتها لمحمد وأهو نفذها معايا يا سماح  
ونجحت نجاح باهر ولازم أساعدك علشان تنجح كمان معاها علشان مبقاش لوحدى الآقى حد تختلط  
دموعى بدموعه وذنبه بذنبي هى مش أحسن مني فحاجة )  
- أيه مالك سرحانه فى أيه؟

أنتبهت سماح :

- هه لا مفيش بفكر فى مشكلتك

أمسك هاتفه وفتح الرسائل وظل يكتب رسالة طويلة

سماح :

- بتعمل أيه

قال دون أن ينظر لها:

- بيعت رسالة لمنى .. مش أنا اللى أتسى كدة بالساهل يا سماح  
(سامحيني ليس بيدي ..عندما أراكي حبيبتي لا أملك نفسي فأنا أشعر أنك زوجتي ..قطعة مني ..  
فقررت أن لا أضايقك بعد الآن وأبتعدت عنك ولكنى لم أستطع ..قلبك لى وقلبي لكى)

كان سماح يعلم مداخلى جيدا الرومانسية والتضحية ، وعندما انتهى وقرأت سماح الرسالة أيقنت أنني  
لن أتحمّل الفراق بعد هذه الرسالة وسأعود إليه بمجرد رؤيته  
نظرت لسماح نظرة شيطانية ونفثت فى سمعه مقترحة بحماس:  
- أسمع يا سماح منى دي صاحبتى وأنا عارفاها كويس بصراحة مبتجيش إلا بالأمر الواقع  
عقد بين حاجبيه قائلا :

- تقصدي ايه؟

سماح :

- أصل بصراحة كده منى بعد ما كانت معاك فى السينما .. قعدت تكلمنى وتحكىلى وتعيط وتقول انا مش عارفة بصدده ليه انا مش عارفة انا بعمل كدة ليه انا بحبه وعاوزاه أكثر ماهو عاوزنى بس مش عارفة ليه لما بيكون فى حد معانا بقفش كده وبيبعد عنه يمكن لو لوحدنا يبقى عندى الجراة نظر لها سماح بشك:

- منى قالت كده..

أومات برأسها إيجاباً فأخذ يفكر فى كلامها بصوت عال:

- يعنى هى بتصدنى علشان مش لوحدنا!!

تابعت سماح وهى تعمل على أفتاعه بتلك الأكاذيب:

- أنت عارف يا سماح لما كانت بتيجى هنا وانت مش موجود وكنت بسببها وادخل المطبخ كنت برجع القيه فى اوضتك .. واخدة هدومك فى حضنها وبتبوسها وبتشم ريحتك فيها بشوق ولما كانت بتشوفنى كانت بتتلخم وتخرج بره وكان بيبقى وشها أحمر أوى كأنك انت اللى كنت فى حضنها مش هدومك

أبتسم سماح ونظر لأخته وقال لها ساخرا بتوجس :

- أنا كنت فاكرك بتحبى صاحبتك

عبثت سماح بشعرها وقالت بلامبالاة:

- أنا مش قصدى حاجة وحشة والله انا بس عاوزاكو اترجعوا لبعض وبعدين يعنى أنت مش هتأذيها لكن هى منى كده مبتجيش إلا بالأمر الواقع خصوصاً لو محدش شايفها.. صدقتى

لم يجد شيطان سماح فرصة أكبر من هذه لأفتاعه بمجاراته شيطان أخته فأفتعه بالفكرة بسهولة مستخدماً جملة (أنت مش هتأذيها انت بس هتخاليتها تاخذ عليك )

نظر إلى أخته وقال بشرود:

- هتخاليتها تيجى هنا أمتى

أبتسمت فى مكر:

- انت اللى هتخاليتها تيجى

- أزاى؟

سماح بثقة:

- زمان رسالتك عاملة عميلها .. أول ما هتشوفك بعد بكرة عند باب الكلية هتنسى كل حاجة .. خد

معاك عربيتى وفهمها أنى تعبانة فى البيت ومحتاجة أشوفها ضرورى

سماح بتسائل:

- طب وماما

سماح بأبتسامة نصر:

- هقعنها تروح تزور جدتك وكريم أخوك فى المنصورة .. هى كانت قالتلى من فترة ان جدتك بقت

كويسة وكفاية بقى كدة كريم لازم يجى يعيش معانا

رفع حاجبيه متعجباً وقال :

- ياه ده انت مجهزة كل حاجة أهو

- علشان تعرف بس غلاوتك عندى



## ( ١١ )

فاجأتني حياء بمرورها ببיתי لتصبحني هي للندوة بدلاً من انتظارها لي ببيتها وبمجرد ان رأتها والدتي حتى شاركتها فرحتنا قائلة بسعادة كبيرة :

- هشام ابني جاي من السفر أول الشهر علشان يتم موضوع جوازه  
سعدت حياء جدا بالخبر فهي تعلم مدى تعلقي بهشام وحبى له وشوقى لعودته إلى الوطن ولقد كانت على يقين من أنه سيستطيع ملء الفراغ الكبير الذى أشعر به ببيتنا وفى حياتى بصفة عامة بروحه المرحه وعندما تسائلت والدتي عن موعد انتهاء الندوة أجابتها حياء مطمئنة أياها بأنها ستعيدنى بيدها إلى البيت كما أخذتى منه فلا داعى للقلق

وفى داخل قاعة الندوات شعرت حياء بالتوتر المفاجيء والمشوب بالفرحة الذى ظهر بقوة على ملامحى وحركاتى وأنا أمسك بالهاتف بيدي وأقرأ رسالة وصلتنى للتو

حقيقة الندوة كانت أكثر من رائعة وتعرفت بداخلها على فتيات يظهر عليهم الألتزام الدينى وقالت احداهن لي بود وتعجب:

- معقولة أنتِ معانا فى سنة تانية.. أول مرة أشوفك!!

لم تخرج حياء من القاعة بعد انتهاء الندوة حتى جعلتنى أتبادل رقم هاتفى معهن فلقد حرصت جدا أن تكون لي صحبة صالحة تعيننى على الخير وأستبدلهم بصحبة سماح .. وحدثت لـ حياء مفاجأة أخرى حيث وجدت صديقة قديمة لها كانت قد فقدت أثرها لفترة طويلة وجمعتهما الأقدار فى هذه الندوة وعلمت منها أنها تم عقد قرانها على أحد معيدين الكلية وان زفافهم قريب  
جلسنا معاً فى الكافتريا بعض الوقت ولم يكن هناك محاضرات هذا اليوم ، فقلت لها وأنا أحاول ألا أظهر السعادة والترقب المرتسمان كلوحة زاهية الألوان على وجهي بوضوح :  
- انا مش عاوزة أروح دلوقتى لو عاوزة تمشى أنتِ أمشى أنا قاعدة شوية  
حياء بتساؤل :

- ليه انتِ معنديش محاضرات

قلت بتلعثم:

- أصلى مستنية جماعة اصحابى

- مين دول

أجبت بتردد:

- سماح

لم تقتنع حياء بكلماتي وأصرت على البقاء معى أو عودتى معها للمنزل كما وعدت والدتي .. أصابتنى

خيبة كبيرة وأنا أتحسر على اللقاء الذي لم يكتمل وخرجت بتردد بصحبتها من باب الجامعة ووقفنا للبحث عن وسيلة مواصلات تقلنا إلى البيت وعيني تدور حولي وكأنني اتوسل حتى رؤيته من بعيد دون لقاء حقيقي حتى سمعته يناديني من مكان قريب :

- منى

ألتفتت هي الأخرى بتوجس نحو مصدر الصوت وفي نفس اللحظة ومالت على أذني قائلة بهمس:  
- مين ده أنت تعرفيه؟

قلت بتلعثم:

- آه ده .. ده سامح أخو سماح صاحبتي  
أقرب هو منا في هذه اللحظة بابتسامة جذابة:

- صباح الخير

أجبت به بخجل :

- صباح النور

حياء بحذر:

- وعليكم السلام

أشرت نحوها بتلعثم معرفة أياها له وقلت:

- أعرفك يا سماح دي حياء صاحبتي وجارتي

مد يده للسلام بتلقائية قائلاً :

- أهلا وسهلا

بالطبع لم يكن يعلم أن حياء لا تصافح الرجال ففوجيء بها تنظر إلى يده الممدودة ثم تنظر إليه وتقول ببرود:

- أهلا بيك .. آسفة مبسلمش

شعر سماح بالأحراج ومسح بيده على شعره بينما نظرت شذرا وحاول سماح تغيير مجرى الحديث مديراً دفته نحوى قائلاً :

- ايه يا منى أنت كنتي ماشية؟!!

وقعت في موقف لا أحسد عليه فقلت بارتباك :

- آه .. قصدي لاء ... انا كنت بوصلها

نظرت لي حياء بدهشة وهي تلمح مدى تأثيره في إلى تلك الدرجة فتابع سماح حديثه قائلاً ببساطة:

- طيب يلا نوصل صاحبتك مع بعض وبعدين نروح مشوارنا

ثم أشار إلى السيارة وقال موجه حديثه له حياء :

- أفضلي نوصلك في سكتنا

أبتسمت له حياء بابتسامة صفراء وهي تقول بهدوء:

- سورى مش بركب عربيات مع حد معرفوش..

حاول سماح أن يمزح قائلاً:

- خلاص نتعرف

حياء باستفزاز:

- مبتعرفش على ولاد

نظر لها قليلاً بتأن وعلى ما يبدو كان يقيما على أنها أحد زوار كوكبنا من الفضاء الخارجي فقدرتها

على " الرخامة " تفوق البشر ! ثم قال ساخراً ومشككاً:

- مبتتعرفش على ولاد خالص..

ثم بنظر الى ملابسها الفضفاضة قال باستخفاف وكأنه قد حدد للتو الكوكب الذي تنتمي إليه :

- ليه حرام؟

قالت حياء باستفزاز أكبر:

- بالظبط كدة أى أسئلة تانية؟

سامح ببرود :

- حرام ليه بقى

ثم تابع باستخفافه المعهود:

- آاه .. علشان الموضوع صح !

فأجابته وكأنها قد حددت هى الأخرى درجة البرود الذى يتحدث به فقررت أن تصل بالدرجة إلى

التجمد الكامل وقالت بنظرة استخفاف أكبر وببرود مماثل:

- لاء علشان رسولك الكريم بيقول " لأن يطعن أحدكم فى رأسه بمخيط من حديد خير له من أن يمس

امرأة لا تحل له " .. عارف حضرتك يعنى أيه لا تحل له؟

تغير وجهه وقال بحنق:

- عارف طبعا انتِ فاكراى جاهل ولا ايه

قتلنى التوتر وانا أتابع تلك المعركة الباردة الساخرة الدائرة أمامى فقمتم بتغيير مجرى الحديث وأنا

أقول له :

- هى سماح فى العربية ؟

قال سماح وهو ينظر لحياء بحدة:

- لاء سماح تعبانة وكانت عاوزة تشوفك

- تعبانة مالها .. طب هى فين؟

بنفس النظرات الحادة قال:

- فى البيت .. هتيجى تشوفها ولا هتسيبها كده

ألتفت إلى حياء وتكلمت برجاء:

- لازم اروح اشوفها شكلها تعبانة أوى

شعرت حياء باختناق وهى ترى ضعفى أمامه إلى هذا الحد فقالت بعصبية مكتومة وقد ذابت ثلوجها

دفعة واحدة:

- بقولك ايه يا منى زى ما خدتك من بيتك هرجعك بيتك تانى

شدت على قبضتها وأنا أقول بصوت منخفض :

- أوعدك مش هتأخر هشوفها بس .. دى تعبانة وعاوزة تشوفنى

حياء بانفعال:

- اللى تعبان بيودوه للدكتور ولا بيودوه مستشفى

قلت باستعطاف :

- دى صاحبتى لازم اظمن عليها

حياء بسخرية :

- بسيطه كلميها فى التليفون

سامح كان يتابع المناقشة بيننا ومنتظر النتيجة وكأنه متأكد من أنتصارى فى النهاية .. فأخرجت

هاتفى من حقيبتي وحاولت أن أتصل بها مراراً وتكراراً ولكنها لم ترد بالطبع وهنا قال سماح مصطنعاً

التأثر:

- أصلها تعبانة أوى وصوتها رايح خالص  
قالت حياء بجمود وهى تضغط مفاتيح هاتفها القابع دوما براحتها :  
- بسيطه .. مليني رقمها يا منى  
وضعت الهاتف على أذنها وماهى إلا ثلاث رنات فقط وأجابت سماح بصوت خالى من الأوجاع :  
- ألوو

مدت حياء يدها بالهاتف نحوى وقالت باستفزاز وهى تنظر إلى سماح قائلة :  
- واضح انها مبردش عليكى انت بس

تناولت الهاتف من يدها وتحدثت إلى سماح وحياء تتابع الموقف بتربق وسماح ينظر لها نظرات  
عدائية للغاية حتى أنهيت حديثى معها وقد دمعت عيني لما وصلنى من صوتها المتعب وقلت بتأثر:  
- دى شكلها تعبان أوى  
حياء بحسم :

- شوفى يا منى من الآخر كدة .. زى ما أخذتك بيتك هرجعك بيتك تانى .. أنسى  
قال سماح بانفعال مفاجىء :

- هو حضرتك بقى وليت أمرها ولا أيه...  
قالت حياء وكأنها تقر واقعاً ببساطة :

- أيوا بالظبط كده أنا وليت أمرها  
توقعت أن يثور إلا أننى تفاجأت به يضحك فجأة وبدون أسباب وكأن مبالغتها قد أعجبته :  
سيطر على ضحكته فى ثوان ثم نظر نحوى وقال بلهجة أمره تفوح منها رائحة التهديد وهو يهم  
بالانصراف:

- يالا يا منى هتيجى معايا ولا لاء..

تهديده أتى بثماره على الفور فقلت سريعاً وبنظرات متوسلة وأنا أهم بالانصراف معه :  
- معلىش انا مش هتأخر.. ماشى؟

ساعتها أستدعت حياء كل الحزم بداخلها وأمسكتنى من يدي وقالت بتوعد حقيقى :  
- بصى يا منى لو أمك سألتنى منى فين هقولها اللى حصل ده ماشى ؟  
هتفت بها بفزع:

- ايه .. ليه طيب؟

لم تهتم حياء بوجود سماح فى ذلك الوقت ولكن كل ما شعرت به هو خوف حقيقى تملكها لا تعرف له  
مصدر سوى أنقباض شديد بقلبها وقالت:

- منى.. انت عارفة انى معنى قسمى كويس ... أقسم بالله .. والله.. والله.. لو أمك قابلتني وأكيد  
هتقابلني لهقولها أنت مرجعتيش معايا ليه وانت عارفانى يا منى لما بحلف بالله

سقطت أدرعي وانكسر أملى الأخير فى استعادت قلب سماح و انصعت مرغمة لرغبة حياء وذهبت  
معها وفى سيارة الأجرة هتفت بها بحقن :

- كده تخرجيه بالشكل ده

حياء براحة كبيرة:

- ايووون .. أخرجيه وأخرج اللى خلفوه كمان

- متكلميش عليه كده .. أرتحتى أهو أخرج ومشى .. زمانه زعل منى حرام عليكى

حياء:

- يا منى وعسى أن تحبوا شيئاً وهو شر لكم والواد ده شكله الشر ذات نفسه

- خلاص أرتاحى ..أدينى مشيت معاكى غصب عنى .. خلاص

وهكذا فشلت خطة سماح فلم أذهب للفتح الذى كانت تنصبه لي بينما عادت والدتها بصحبة أخيها الأصغر وجدتها لتقيم معهم بالمنزل وبذلك فقد استحال مخططها إلى ركام .

( ١٢ )

مر أسبوع بعد هذا الموقف وفشلت كل محاولات حياء للحديث معي فلقد كنت غاضبة منها وبشدة وفى بداية الأسبوع التالى بدأت اتصالات غريبة تأتى لرقم حياء من أرقام غريبة غير مسجلة لديها وهى فى العادة لا ترد على أرقام غير مسجلة ولكن مع الاتصالات المتوالية والتي سببت لها بازعاج شديد اضطرت للرد أخيرا وبجفاء وقسوة قائلة:

- أيوه ... نعم

المتصل :

- ياه ده أنت رخمة على طول بقى مش معايا انا بس

قالت حياء بحدة:

- مين حضرتك

المتصل :

- كمان رخمتى على ناس كتير لدرجة مش فاكرة انا مين فيهم

حياء:

- لو مقولتش انت مين وعاوز ايه وجبت رقمى منين هقفل السكة

المتصل :

- ايه ده ايه ده هو انا بكلم وكيل نيابة

حياء:

- أوف اللهم طولك ياروح ..أخلص

المتصل :

- خلاص خلاص هقولك ..بصراحة من غير لف ولا دوران أنا عاوز أعبرلك عن مشاعرى

هتفت بانفعال قبل أن تغلق الهاتف بوجهه :

- مشاعرك دى تروح تقولها لخالتك

بعد قليل أتتها رسالة نصية من نفس الرقم فحوها (يا جامد أنت يا شرس) ..ملحوظة.. (أنا معنديش خالة)

حذفت حياء الرسالة ولم تعرها اهتمام كأى رسالة معاكسة لا أكثر ودون أن تهتم بمعرفة هويته ،

ولكن لكنه لم يتوقف عن الاتصال ولم يمل من عدم ردها ومر أسبوع ثانى وثالث ومازالت ثورتى

تتحكم بي وأتجنب اللقاء بـ حياء قدر المستطاع وهى أيضا كفت عن محاولات التصالح معي فقد

انشغلت بالتواصل مع صديقتها نهلة التى صادفتها فى الندوة بعد طول غياب .. كانت نهلة هى وزوجها

مهتمين بالنشاط الدعوى فى الكلية عن طريق الندوات الثقافية وحاولت أشراك حياء معها بدعوتها لأكثر من لقاء .. تحمست حياء لأفكار نهلة واندمجت معها أكثر

و يوما ما كانت فى الجامعة بصحبة صديقتها نهلة وزوجها الذى كان يشرح داخل أحد المدرجات الشاغرة أهمية العمل الدعوى داخل الجامعة لأنه أكثر مكان تتعرض فيه الفتيات للفساد الأخلاقى وخصيصاً فتيات الفرقة الأولى  
لم يصمت هاتف حياء أبدا وظل يتصل بشكل مزعج للغاية فقامت هى بتشغيل خاصية الصامت ولكن ظلت أهتزازاته مزعجة أيضا .. مالت نهلة على أذن حياء وقالت بخفوت:  
- ردى بقى أنا اتروشت  
حياء :

- ده رقم غريب بقالة فترة مزهقتى  
نهلة :

- طب هاتى وانا أعرفه شغله  
أبتعدت نهلة قليلا حتى لا تزعج بقية الحضور وأجابت المتصل بسيل منهمر حانق من الأسئلة " أنت مين وعاوز أيه .. أنتوا ايه مفيش وراكوا حاجة .. مبتخافوش من ربنا "

المتصل بهدوء ورسالة:  
- ممكن أكلم الأنسة حياء .....  
نظرت لها نهلة باندهاش وهمست :  
- ايه ده .. ده قال أسمك الثلاثى يابنتى  
تعجبت حياء وتناولت الهاتف من يدها وتحت جانبا وقالت بحنق :  
- ألو نعم أنت مين وجبت أسمى منين  
المتصل بسخافة:  
- حتى اصحابك كمان رُحمة زيك  
زفرت بشدة :

- اللهم طولك يا روح .. يا تقولى انت عاوز ايه يا أما متصلش بيا تانى وتزعجنى كدة انا مش فاضية المتصل بنبرة أنتصار:

- بجد يعنى انا زهقتك .. طب كويس دى نقطة فى صالحى  
زفرت بقوة هذه المرة وقالت بعصبية:

- يا ربى ايه البنى آدم ده ، ممكن تخلصنى بقى حرام عليك هتخالينى أبيع الموبايل بسببك المتصل بثقة:

- لو بعنى الموبايل ولا حتى غيرتى الرقم هجيلك عند بيتكوا  
صممت حياء وقد شعرت بقلق وخوف حقيقى ثم قالت :  
- عند بيتنا ازاي يعنى أيه السخافات دى  
تابع بنفس بثقة:

- مش سخافات ولا حاجة وبالأمارة انت ساكنة فى.....  
لم تخف حياء بحسب وإنما نجح فى أن يصيبها برعب حقيقى ولكنها حاولت أن تبدو متماسكة وهى تقول بحذر :

- وبعدين؟  
المتصل :

- ولا قابلين ..هتسمعيني لآخر المكالمة ولا لاء

قالت بنفاد صبر:

- نعم خلصنى عاوز ايه

المتصل:

- بصراحة كده انا معجب بأخلاقك أوى عمرى ما قابلت بنت زيك

قالت بسخرية:

- اه حضرتك معجب بأخلاقى فقولك تبوظهاالى مش كده؟ خلصنى عاوز ايه

المتصل:

- عاوزك تطلعى بره المدرج

زاغت عينيها حولها قلقًا وقالت بريية:

- ليه؟

أجاب على الفور بثقة :

- لما تطلعى هتعرفى .. بسرعة لو سمحتى

نظرت حياء إلى نهلة نظرة سريعة فوجدتها قد عادت إلى الحضور واندمجت مرة أخرى فى المناقشات الدائرة مندمجة مع المناقشات .. شعرت بتردد هل تخرج لترى من هذا المتطفل أم لا .. وفى النهاية حسمت أمرها قائلة " أطلع ايه هو هياكلنى يعنى "

\*\*\*\*

خرجت حياء من المدرج وهى تتلفت باحثة عن شخص لا تعرفه... خطت خطوات للأمام لعلها ترى هذا المتطفل حتى سمعته يقول من خلفها :

- أقول صباح الخير ولا السلام عليكم

ألتفتت للخلف وقد اتسعت عينيها من المفاجأة وهى تقول بدهشة:

- أيه ده .. أنت؟!!

قال بأبتسامة عريضة :

- أيه رأيك فى المفاجأة دى

تسمرت مكانها كأنها تحولت الى تمثال من الجبس .. لم تتكلم وظل صامتا وهما ينظران إلى بعضهما البعض وفى النهاية قالت بجمود:

- عاوز أيه وبتضايقتى فى التليفون ليه ؟

حاول سامح الدفاع عن نفسه قائلا :

- أولا انا مكنش قصدى أضايقك فى التليفون ثانيا كل اللى عاوزه أنك متخديش عنى فكرة وحشة

قالت بأنفعال:

- كلام غريب وعجيب .. بتعمل كل ده علشان تقولى متخديش عنى فكره وحشة ..وده يخصك فى ايه

اصلا اخذ عنك فكره وحشة ولا لاء

قال بهدوء :

- حقيقى أنا مش عارف ..كل اللى فكرت فيه انى لازم أقولك أنى كويس والله ارجوكى متخديش عنى

فكرة غلط ..انا من جوايا كويس بس كل أنسان فيه الوحش وفيه الحلو

زاد أنفعالها وهى تقول :

- وحضرتك ترجمت كلامك ده فعلا لما فضلت كام أسبوع تضايقتى فى التليفون

- على فكرة انا مكنش قصدى أضايقك خالص ..أنا لما أتصلت أول مرة أتصلت علشان أقولك كده ولما

حسيت انى اتكلمت غلط حاولت أتصل تانى لكن انتِ مردتيش عليا من ساعتها

عمل حديثه على أستفزازها وقالت بعصبية :

- وانا مالي كويس ولا وحش..لو كنت بتقول كده علشان منى دى حاجة تخصها انا ماليش دعوى فى حكمها عليك

تابع بنفس النبرة الهادئة :

- انا بتكلم على حكمك أنتِ ..عاوزك تعرفى انى كويس ومتقوليش ليه علشان انا نفسى معرفش وعلى فكرة انا بقالى أسبوع باجى هنا وبشوفك وكل ما آجى اكلمك بتراجع

زفرت حياء محاولة كتم غضبها :

- أنت ايه يا أخى مش مكفيك اللي بتعمله فى منى كمان جاى تعملى غسيل مخ أنا كمان

قال محاولا تهدئة الموقف:

- أدينى فرصة أتكلم..أنا معملتش فيها حاجة وحشة ولا غصبتها على حاجة أستفزها أكثر فقالت بحدة:

- صح مغصبتش عليها فى حاجة مخلصتهاش تسبب كليتها وتخرج معاك انت وأختك ومش فارقة معاك انها ممكن تسقط ومستقبلها يضيع .. مخلصتهاش تركب معاكوا عربيات ومعملتش فى حسابك ان ممكن حد من أهلها يشوفها وتروح فى داهية.. وانت مالك تفكر فى كده ليه انت راجل عاوز تتبسط وخلص مجتث هنا تاخدها بطريقة غريبة ومريبة علشان تشوف أختك اللي انا واثقه انها مكانتش تعبانة ولا حاجة والله أعلم كان ايه اللي هيحصل لو سبتها تروح معاك

والاهم من كل ده وده انك خلتها تبعد عن ربنا وتسبب صلاتها وتتنازل عن مبادئها وتعيش على طول قلقانة ومتوترة وبتفكر يا ترى هترتبط بيها ولا بتلعب بيها ، وأنت هتغصب عليها ليه كفاية غسيل المخ اللي عملتهاها انت وأختك

ظل يستمع وهو ينظر للأرض كالطفل المخطيء حتى أنهت حديثها وتحركت فى اتجاه المدرج لكنه أستوقفها قائلا :

- لو سمحتى أستنى انا مقبلش أن حد يكلمنى كده وميدينش فرصة أدافع عن نفسى ويسببني ويمشى

..انت بتتكلمى كده كانى أنا الغلطان لوحدى .. يعنى صاحبك مش غلطانة.. يعنى أنا عملتها سحر وخالتها تتغير كده ولا هى معدهاش عقل تفكر بيه؟..مبادئه أيه اللي بتتكلمى عنها.. منى كانت

بتسمع كلامى وبتتأثر بيه من أول لقاء بينا .. منى لو كانت قبلت أى راجل غيرى وقالها الكلام ده كانت هتحبه برضة ..هو أنتِ فاكدة أنها بتحبني انا؟.. لاء دى بتحب الاهتمام بتحب انها تتحب ولو قعدت مع

نفسها وفكرت شوية هتلاقى كلامى صح ، رغم كده انا منكرش انى غلطان وانى طول عمرى كنت بتصرف بطيش بس لازم أعقل بقى ولازم الاقى اللي يساعدى على كده

حاولت أن تنهى هذا الحوار السخيف :

- أسمع يا ابن الناس ربنا يهديك.. لو سمحت بلاش تضايقتى فى التليفون تانى أما بقى بخصوص منى فأنا هقولها اللي حصل ده وأعتقد أن كده يبقى الموضوع أنتهى بينك وبينها

أوما برأسه موافقا وهو يقول:

- موافق قوليلها وفعلا يبقى كده الموضوع أنتهى بينى وبينها .. بس ما أنتهاش بينى وبينك نظرت له بأندهاش وهتفت منفعة:

- أفندم.. موضوع ايه اللي بينى وبينك؟ أحنأ مفيش بينا مواضيع

سامح:

- أو مال يعنى انا كنت بتصل بيكى كل ده ليه وجيت النهارده ليه..علشان آجى أسمع رأيك فىا وأمشى قالت بتأفف:

- يارب نخلص



سامح:

- قد كده بتكرهيني؟ ..أنا عاوزك تساعديني.. أنا زى ما أكون كنت ماشى فى طريق ضلمة وفجأة جيتى أنتِ وفتحتى النور وشوفت كل اللي مكنتش شايفة ..أنا محتاج لواحدة زيك ترجعنى لنفسى اللي فقدتها من سنين  
قالت ساخرة:

- تصدق شكلى أتأثرت أوى ..لحظة بس أطلع المنديل، أنت ايه يابنى فاكرنى ايه..كل الفيلم ده علشان تقنعنى بالاسطوانة المشروخة دى.. يالا كمل وقولى أنك حبيبتى من أول نظرة ولا أقولك أستنى لما اجيبك الكامنجة علشان تعرف تغنى عليا كويس  
نظر للأعلى ثم عاد بنظره إليها قائلاً:  
- شكلك كده هتتعيبنى أوى لحد ما تفهمينى صح

نظرت له بتقزز واسدارت لتعود أدراجها فاصطدمت بصديققتها نهلة التى خرجت للتو من المدرج تبحث عنها ويتبعها زوجها ولقد كانت ملامحها أكثر من شارحة للموقف فقال الدكتور أحمد زوج نهلة بصرامة وهو ينظر إلى سامح بحدة :  
- فى حاجة يا أنسة حياء؟.. لو حد بيضايقك قولى  
حياء:

- لا ابدأ يا دكتور مفيش موضوع سخيف كده وخلص خلاص

\*\*\*

كنت فى غاية السعادة وأنا أعانق أختى هشام الذى عاد للتو من غربته وأبته شوقي لتواجهه بيننا كما كنا فى السابق وهو يحتضننى بشوق وحب ومرح كعادته وأمى على الجانب الآخر تتمسك بصدر قميصه وتبكي فرحاً .. دلف هشام إلى غرفة أبى ليسلم عليه وجلس معه قليلاً ثم خرج إلينا وحده  
يجلس فى المنتصف بيننا وهو يربت على رأسى مداعباً ويقول :  
- أزيك يا بت يا منى وحشتينى أوى ..والله كبرتى ده انا كنت سايبك مقروضة  
هتفت معترضة أشاغبه :

- متلغبطش بس علشان خطيبتك يدوب أكبر منى بكام سنة بس  
ضحك وهو يتوجه بالحديث لأمى:

- بجد يا ماما منى كبرت بقى وعاوزين نفرح بيها  
نهضت أمى لتعد المائدة بسعادة وهى تقول:

- والله أيدى على كتفك يا هشام يابنى  
حاولت تغير مجرى الحديث وأقول:

- ها يا هشام ناوى تعمل الفرحة أمتى  
ضرب كف بكف وهو يقول بنفاد صبر:

- هو بأيدى يعنى.. حمايا هو اللي واقف فى الموضوع.. بنته الوحيدة بقى ومش عاوز يسيبها  
عادت أمى إليه قائلة بثقة :

- ولا يكون عندك فكر يا حبيبي.. بكره هروح أزورهم وانا ليا كلام مع أمها  
نهض هشام وقبل رأسها بمرح قائلاً:

- يا سلام عليكى يا ست الكل صحيح مفيش أحن من الام يا ناس  
قلت بشغف:

- اروح معاكى يا ماما بقالى كتير مشوفتش منال  
ردد ممازحا:

- اروح معاكى يا ماما بقالى كتير مشوفتش منال  
علت ضحكاتنا لأول مرة منذ زمن فى هذا البيت فخرج والدى من غرفته متأففا وقال بخشونة:  
- وطوا صوتكوا شوية مش عاوز وجع دماغ.. مبحش الهرجلة فى بيتى  
عبس هشام وهو يقول باقتضاب :  
- حاضر يا بابا

### ( ١٣ )

فى منزل منال خطيبة هشام كان جميع النساء يضعن الطعام والمنزل ملىء بالسعادة ابتهاجاً بموافقة  
والد منال على موعد الزفاف بعد ضغط من منال ووالدتها ووالدتها ولقد كنت أضع معهن الطعام على  
المائدة ويدي تتلمس ملابسي الجديدة التى أحضرها لي هشام كهدايا ولقد كانت جميعها محتشمة  
وفضفاضة ذات ألوان هادئة ورقيقة يعلوها حجاب يغطى منطقة الصدر، كنت فى طريقي عائداً إلى  
المطبخ فتوقفت مبتسمة ومستمتعة عندما استمعت إلى صوت ضحكات هشام المرتفعة القادمة من  
الصالون مختلطة بضحكات والد منال الهادئة يليهم صوت ضحكات رجولية صاخبة للغاية قبل أن  
يدوى صوت والدة منال من بين الضحكات وهى تقول بتبرم موجهة حديثها لأخى:  
- قوله يا هشام يابنى أحسن واجع قلبى أوى .. كل ما أجيبه عروسة يقولى مش وقته لما الصغيرة  
تتجوز الاول  
هشام :

- ايه يا عم الشيخ مالك واجع قلب امك ليه .. طب الصغيرة هتتجوز اهي لما نشوف بقى هتتججج بأيه  
تاتى

"الشيخ" !!.. ومتى أصبح " أدهم " شيخاً كما نعته أخى منذ قليل ؟ .. لقد تعجبت للغاية عندما خطفت  
نظرة سريعة إليه عندما دخلنا بيت منال .. لقد تغير تماما عن آخر مرة رأيته فيها منذ سنوات فى حفل  
خطوبة هشام ومنال .. نبتت له لحية خفيفة وواظب على الصلاة فى المسجد وأصبح يوقظهم لصلاة  
الفجر وزيادة على هذا .. لقد أصبح مرحا للغاية عما سبق ! ، سمعت من منال منذ قليل ونحن نعد  
الطعام فى المطبخ بأن أخيها أدهم قد تركته خطيبته عندما أصرت هى أن يحلق لحيته ولكنه رفض  
بشدة فتعاضمت الخلافات بينهم لشهور وفى النهاية حدث انفصال هادىء للغاية .  
أنتبهت فجأة عندما لاحظت خروجهم من غرفة الصالون فتظاهرت بتعديل الأطباق على المائدة ..  
وخرجت منال ووالدتها من المطبخ وبدأ الجميع يلتفون حول المائدة وهنا سمعت صوت والد منال يقول  
لأدهم  
بتعجب :

- ما تيجى يا أدهم واقف ليه  
أرتفع حاجبى بدهشة عندما سمعت أدهم يقول موجه حديثه لـ هشام :

- بقولك ايه يا هشام ما تيجى ناكل فى الصالون علشان البنات ياخدوا راحتهم  
عبس وجه هشام وهو يخطف نظرات الأسى نحو منال التى تظاهرت بالعبث بطبقها وكأن الأمر لا  
يعنيها وفى لحظات تدخلت والدته قائلة بحسم :  
- أقعد يا أدهم مفيش حد غريب والبنات مش مضايقة وواخدين راحتهم

وأثناء تناول الطعام حاول هشام فتح الحديث عن تفاصيل الزفاف والمتطلبات المادية وخططه نحوها ،  
توجست وأنا أنتظر ردود فعل والد منال ووالدتها وأخيها ولقد جاءت كلماتهم واحدة تقريبا وتحوى  
نفس المضمون "أحنا أسرة واحدة يابنى متشلش هم ، هات اللي تجيبه يا هشام يابنى المهم البركة ،  
أعظم النساء بركة أيسرهن مؤنة" ، أبتسمت ونظرت إلى والدتي فوجدتها منشرحة الصدر والتفت إلى  
هشام فوجدته مازال يخطف النظرات إلى منال ولكنها هذه المرة بهجة وسعادة أما نظرات منال له فقد  
كانت كمن تقول له بفخر " مش قولتلك "

وفى اليوم التالى مباشرة أنهمك هشام فى وضع لمساته الخاصة بالطلاق فى شفته الخاصة بدأ التجهيز  
للزواج على قدم وساق وزادت زيارات منال ووالدتها لنا وانشغلت معهم وغرقت بتفاصيل إعداد  
زواجهم وتلهيت تماما عن مشكلتى الخاصة ، انقضت الأيام سريعا وهاتفنتى منال لأذهب معها فى الغد  
لاختيار فستان الزفاف ووافقت بحماس شديد وقالت بأن أدهم سيذهب معنا ليصطحبنا بسيارته نظرا  
لانشغال هشام فى تجهيز آخر ما تبقى فى شفته .

فى اليوم التالى انتهيت من ارتداء ملابسى وهاتفنت منال مرة بعد مرة ولكنها لم تجب على الهاتف  
وبعد دقائق حدثتني على عجلة من أمرها وكأنها كانت تخوض معركة ما وانتهت منها للتو قائلة :  
- معلىش يا منى أدهم أخويا مكنش راضى يجى معنا لوحدنا لما عرف أن هشام مش هيجى ويقالى  
نص ساعة عمالة أعمل فى مداولات مع هشام فى التليفون لحد ما وافق اخيرا يفضي نفسه ساعة  
واحدة بس .. يالا اجهزى بسرعة.  
ابتسمت وأنا أغلق الهاتف متممة بسخرية :  
- ايه خايف على نفسه من الفتنة ولا أية !

وفى سيارة أدهم ساد جو من المرح وهشام يتبادل النكات والضحكات معنا ومن وقت لآخر يرسل  
مشاعره لمنال عن طريق بعض الكلمات الخفية التى قطعها عليه أدهم قائلا:

- ايه يا هشام راعى وجودى يا أخى

لوح هشام بيده معترضا وهو يقول:

- يا عم دى مراتى أنت ناسى أننا كاتبين كتابنا ولا ايه

قال أدهم بمشاكسة:

- أنا بقى بعترك خطيبها .. لما تبقى فى بيتك أبقى قولها براحتك

ربط هشام على كتف أدهم بتهديد مصطنع :

- بقولك أيه ركز فى الطريق ملكش دعوى بينا متخالينيش أدعى عليك تتجوز واحد أخوها رخم زيك  
كده

قالت منال بابتسامة :

- معلىش يا هشام ما انت عارف أدهم غيور أوى

قال هشام بمرح:

- أنتِ هتقوليلى؟ .. ده طلع عينى قبل كتب الكتاب.. فاكرة لما كنت بتصل بيكى ..تقوليلى أيوة يا أستاذ  
هشام

علت ضحكات أدهم الصاخبة أختلطت بها ضحكات هشام وابتسامة منال بينما كنت أنا أتابع الحديث بملل شديد ودهشة من تصرفات أدهم الغريبة والمتملكة نحو أخته .  
بشق الأنفس استطعنا العثور على فستان مناسب لحفل الزفاف ولقد تعلقت به منال فور رؤيته وكأنه كنزها الصغير التي كانت تبحث عنه وهو كان كنزا بالفعل بتفاصيله الرقيقة والرائعة في آن واحد ولكن أدهم وهشام هتفا دفعة واحدة :  
- شوفى غيرواده عريان  
تدخلت صاحبة المكان قائلة بلباقة :  
- فى حل وسط.. الفستان ممكن يتقفل بطريقة معينة وهيبقى أحلى كمان

\*\*\*\*\*

حاولت سماح أن تعيد الكرة مرة أخرى وتوددت إلى أخيها لكي تعرف سر هدوءه المفاجيء ولماذا يغلق أى حديث عني بمجرد أن تبدأ سماح بفتحه وهذه المرة أجابها بحسم :  
- أنا قررت أتجوز يا سماح  
قالت بتوتر :  
- هتجوز منى ؟  
قال متعجباً:  
- ومالك أتخضيتى كده ليه  
رفعت كتفيها بلا مبالاة زائفة وهى تقول:  
- ولا اتخضيت ولا حاجة بس يعنى انت كنت بتقول عمرى ما هتجوز واحدة خرجت معايا وسمحتلى ألمسها  
قال بشرود:  
- مش انت اللى عرفتيها عليا؟.. وبعدين أنا قولت قررت أتجوز مقولتش أنى هتجوز منى  
- أو مال هتجوز مين ... ياسمين ؟  
قال بابتسامة ساخرة:  
- هو أنا مفيش فى حياتى غير منى وياسمين  
قالت بحيرة :  
- انا مشوفتلکش حد تانى من ساعة ما خلصت الجيش  
قال بجديّة:  
- أنا قررت أتغير يا سماح وبصراحة كدة أنا مينفعينيش فى التغير ده غير واحدة بمواصفات معينة..  
المواصفات دى ولا هى فى منى ولا هى فى ياسمين  
- أنا مش فاهمك بس على العموم ياسمين أهلها شاريناك ومش هيكلفوك حاجة وأنت محتاج ده  
ثم تابعت بتلعثم :  
- معنى كلامك ده أنك خلاص صرفت نظر عن أنى أجيب منى هنا فى البيت ؟  
نظر لها نظرة مطولة وقال:  
- هو أنت ليه كل شوية تفتحى الموضوع ده .. فى حاجه انا مش فاهمها .. ساعات بحس أنك مستفيدة  
بس مش عارف أزاى  
قالت بعصبية :  
- خلاص يا سماح.. أنا كان قصدى مصلحتك لكن هطلعنى غلطانة خلاص براحتك  
أرادت أن تغير مجرى الحديث بعد صمتت لثوان وهى تستشعر نظراته المتشككة وقالت :

- مقولتليش بقى مين اللي عليها العين؟

أجابها بتان :

- لما أخذ منها الموافقة هبقى أقولك

قالت باندهاش:

- أيه ده هي مش موافقة؟.. بقى فى واحدة متمناش تتجوز أخويا ..مش مصدقة!

ضحك رغما عنه وهو يقول:

- دى بقى متمناش تشوف أخوكى أساسا

\*\*\*\*

بمعرفته لجميع مفاتيحها استطاع أن يعيدها إليه مجددا واستمرت المقابلات بينهما كما كانت بالسابق بشقته الخاصة واستمرار بالخطوبة الى ما لا نهاية ، وفى إحدى المقابلات الحميمة تلك وبعد أن نفضت يدها من أخيها بقرار زواجه المفاجيء ، بدأ سماح فى دس الأكاذيب فى أذن محمد عني أنا وأخيها وأن علاقتنا أصبحت تماما مثل علاقتها ب محمد وبدون ارتباط رسمي من أى نوع وأن سماح يتكتم الأمر حتى لا يفضح علاقته بي فيستطيع التوصل وقتما شاء ، لكن الغريب أن محمد لم يصدق سماح وكذب حديثها فاشتعلت النيران بقلبها واستماتت باقناعه بالأمر واستغلت دخان المخدر الذى عبق المكان من حولهما وانحرف رغباته وسطوتها واستطاعت أن تقنعه بأنها لا يوجد مانع لديها لإقامة علاقة ثلاثية فقط ليتأكد بنفسه صدقها ! ، لم يستطع محمد الرفض أمام تلك الوليمة المقدمة له على طبق من ذهب دون تكلفة وقال بنبرة ممطوطة من أثر المخدر:

- وليه لاء ..ماشى .. حد يقول للمزاج لاء

\*\*\*

وقبل أيام قليلة من زفاف أخى هشام ، ذكرتنى والدتى بأنى لم أدعو جارتنا "حياء" ووالدتها لحضور الحفل فقررت الذهاب إليها هي ووالدتها لدعوتها و جلست معها فى غرفتها وقد كانت :حياء" على ما اعتدته منها مرحة ومتسامحة معى ورغم ذلك شعرت بأنها مترددة ومتوترة وكأنها تود مصارحتى بشيء ولكن تخشى الصدمة التى ستسببها لي فتعود وتصمت من جديد إلا أنها فى النهاية حدثتنى متسائلة عن تطور علاقتي بسماح وكأنها تختبر كيف هى مشاعرى نحوه الآن فأجبتها بتردد وحيرة:

- الأول كنت بحس أنى هتجنن عليه وكده بس بقالى فترة مشفتهوش وحاسة عادى..مش مهتمة زى الأول

- يعنى أنتِ مش بتحبيه يا منى ولا بتحبيه فهمينى؟

قلت دون تفكير:

- لا طبعا بحبه .. بس مش عارفة فى أيه

وفجأة ففزت فكرة إلى ذهنى وقلت لها بحماس :

- أنا هعزمه على الفرغ

أبتسمت حياء بسخرية وهى تقول:

- وهتقوليلهم أيه بقى .. واحد بحبه ولا البوى فرند بتاعى

- تعرفى يا حياء لو مكنتيش جارتى كنت قولت أنه أخوكى

قالت حياء ساخرة:

- شوفى بقى يا منى ياختى أنا صحيح أخواتى ميتخيروش عن اخواتك ومش بطيقهم بصراحة بس

مش للدرجادي

دفعتها بخفة معترضة على حديثها عنه ولكني تابعت بنشوة تملكنتي وقتها :

- أنا هعزمه .. الفرخ فى قاعة والناس هتبقى كتير وزحمة محدش هيسأل ، هيسألوا على مين ولا مين

زفرت حياء وهى تقول متعجبة:

- أنت بقيتى مجرمة والله .. لاء انا مش موافقة طبعاً .. وهو لو فيه شوية عقل مش هيوافق لأنه طبعاً مش هيعرف يكلمك قدام أهلك .. يعنى من الآخر مش هيوافق علشان مالوش مصلحة .

حاولت حياء أقناعى وتخويفى ولكننى اتخذت الأمر تحدى معها وقلت له بأنه سيأتى لرؤيتي ولو من بعيد ثم ينصرف كأي عاشق حزين وكأني أحاول فقط أن أثبت لها حبه لي وتضحيتها من أجلي بأي طريقة كانت .

وبالفعل هاتفته ودعوته لحفل زفاف هشام ثم عاتبته متسائلة:

- مش بتسأل عليا ليه؟

قال ببرود:

- هو أنتِ يعنى اللى بتسألنى

- المفروض الرجل هو اللى يسأل مش البنت

قال بمرواغة:

- بس أنتِ بتعزمينى بقلب جامد .. مش خايفة من أهلك؟

قلت مدافعة وقد كنت قد نسيت سماح تماما وتذكرتها للتو:

- لا ما أنا هعزم سماح برضة وطبيعى أنك تيجى معاها

قال رافضاً:

- طب وأنا كده هاجى أعمل أيه .. أبارك وأتفرج وأمشى .. لالا ماليش لازمة

قلت بأحباط:

- لا لازم تيجى متكسفينش قدام صاحبتى

- صاحبتك مين

- صاحبتى اللى كانت معايا اليوم اللى جيت تاخذنى فيه من الجامعة لما كانت سماح تعبانة

شعرت بنشاط بنبرة صوته بشكل مفاجىء وهو يقول بعث :

- ااااه ومالها بقى صاحبتك ؟

- قالتلى أنك مش هتوافق تيجى علشان ملكش مصلحة

فقال بعناد وحسم :

- طب أنا هاجى بالعند فيها

\*\*\*\*

كن حفل الزفاف فى غاية الروعة ومنال تتألق بفستانها الأبيض يعلوه حجاب صغير من نفس اللون أضاف إليها لمحة ملائكية للغاية ، كانت قاعة الزفاف تمتاز بموقع يطل على النيل مباشرة مما شجع حياء على الأبتعاد عن الصخب قليلا ، كان منظر النيل الهادىء وسكونه الصاخب يبعث بداخلها السكون والتأمل حتى أنها لم تدرك كم قضت من الوقت تتأمل فيه وتستمتع بالهواء العليل وصوت زغاريد النساء قادم إليها من بعيد ، ولكن هادم اللذات أقتحم عليها تأملاتها بكلماته المستفزة قائلا:

- الله .. الله.. سايبه الناس كلها وجاية تسرحى هنا .. أيه بتحبنى ولا ايه؟  
لم تكن فى حاجة للألتفات لترى محدثها " الجواب باين من عنوانه وصوته " فقالت ببرود:  
- وأنت سايب الناس كلها وجاى تضايقتى هنا

قال وكأنه لم يسمعها:

- بتحبنى النيل أوى كده؟

أجابته ساخرة :

- ااه هقولك اه بحبه هتقولى يا بخته.. هقولك لاء مش بحبه هتقولى يا عذابه ، قديمة أعب غيرها  
وقد كان رده عبارة عن ضحكات متواصلة بلا توقف حتى هداً أخيراً ثم قال :

- وحافظة كلامى كمان

قالت حياء بنفس النبرة الساخرة:

- اه حافظاه .. من أول "ايوا بغير" لحد "حبنا نبتة ولازم نرويها" .. يعنى من الآخر ريح نفسك وابعدي عني

علت ضحكاته أكثر وهو يقول بإعجاب:

- مش قولتلك هتتعينى

ثم تابع وهو يحاول استعادته مقاليد الحديث بيده مجدداً:

- بس على فكرة دى علامه كويسة أوى ..أصل محدش بيحفظ كلام غير لما يكون معجب بيه.. ومش بعيد يكون أعجاب بصاحب الكلام نفسه

قالت بنفاذ صبر :

- يا ابن الناس أبعد عني أحسن لك أنا معنديش أوبشن الأسطوانات دى خالص .. وبدل ما أنت قاعد تغنى على كل واحدة شوية ياريت تخلص موضوعك مع منى..وعلى فكرة لسه مامتها كانت بتقولى أن فى عريس كويس أوى ناوى يتقدملها فياريت بقى تحدد أنت ناوى تعمل أيه علشان تشوف مستقبلها مع واحد تانى يكون بيحبها

قال سامح بجدية:

- بغض النظر عن أتهامك ليا .. لكن انا فعلا كنت ناوى أصارحها بكل حاجة علشان متفضلش متعلقة

بيا وأهو الحمد لله أنا لما دخلت دلوقتى شوفتها مبسوفة وكويسة وواضح أنها نسيتمنى

نظرت له حياء بطرف عينيها وهى تقول:

- لو كانت نسينك مكنتش عزمك .. ولا ايه ؟

أجابها بخبرة وثقة:

- لا هى عزمتمنى بس علشان تثبت لك انى بحبها وهاجى علشان أشوفها وبس

تعجبت حياء للغاية من موقفى وكيف أتى لى أن أحكى له ما دار بيننا من مناوشات كلامية بخصوص دعوته للزفاف ؟ ثم قالت بتشكك:

- يعنى أنت جاى علشان تشوفها وبس !؟

ضحك بطريقة طفولية وهو يقول بعناد:

- لاء جاى علشان أغيظك  
تركت المكان وغادرت على الفور بدلا من أن تلقى به فى مياة النيل الباردة لتتخلص من أستفزازه  
الدائم لها

\*\*\*\*

وخلال الأسبوع التالى مباشرة حدثت مصادمات كثيرة بيني وبين والدتى وطارق وهشام بعد أن زارتنا  
والدة منال وعرضت على والدتى طلب أدهم للزواج بي ، قائلة :ورغم حماس الجميع للموافقة  
وخصيصا هشام ، رفضت بشدة وببكاء مرير وعندما لجأت لصديقتى حياء أقترحت أن أعرض  
الموضوع على سامح مقترحة:

- طب ايه رأيك تقويله على موضوع العريس ده .. والله لو كان بيحبك هيتقدمك لكن لو كان غير كده  
هتعرفى من كلامه  
قلت بعند:

- ماشى هكلمه وهحاول أقابله وهتشوفى انه هيجى يتقدملى تانى يوم  
حياء بشك:

- أتمنى

هاتفته على الفور وطلبت رؤيته للضرورة القصوى واتفقت معه على موعد بعد عدة أيام ، انهيت  
الاتصال والتفت إلى حياء وقلت بدهشة:

- أول مرة يقولى خالينا نتقابل فى الكلية علشان متأخرىش على محاضراتك  
قالت حياء ساخرة:

- سبحان الله أخيرا أفكر أنك طالبة وعندك محاضرات

كنت سأهم بالرد عليها ولكننى تذكرت فجأة حلم يراودنى منذ أيام ويفزعنى بشدة فقصصته على حياء  
قائلة:

- شوفت نفسى فى أوضة كلها قانورات ومقفول عليا ومش عارفة أخرج وبصوت بأعلى صوتى وفى  
بره الأوضة عقرب وحية منعى من الخروج وفجأة الحيطه اتكسر جزء منها وشوفتك وبعدين شفت  
سامح واقف وراكى

حاولت حياء طمأنتي وطلبت مني المحافظة على أذكار الصباح والمساء وأن أتوخى الحذر فى مقابلتى  
المرتقبة مع سامح ومن شدة قلقها من هذا الحلم ظلت تهاتفنى كل يوم تسأل عن أحوالى برغم  
انشغالها اليومى مع صديقتها نهلة فى تنظيم ندوة جديدة خلال أيام داخل الكلية .

\*\*\*\*

كانت حياء بداخل المدرج مع صديقتها نهلة وهى تعلم أننى فى هذه اللحظة أجلس على أمتار منها فى  
الكافتريا بصحبة سامح أخبره عن العريس وما حدث من عائلتى وأنا أبحث عن أى بادرة للغيرة على  
ملامحه ولكنه هادىء جدا وفور أن انتهيت من حديثي قال متسانلا ببساطة :

- هو بيشتغل ايه؟

أرتفع حاجباى بدهشة عارمة وأنا أقول بشحوب:

- ده رذك؟!!

قال ببرود:



- وفيها أيه؟.. عاوز أظمن عليكى

حاولت أن أغضب ، أن أثور فى وجهه ولكنى وجدت نفسى أقول بانكسار وخفوت:

- كلامك ده مالوش غير معنى واحد .. انك كنت بتتسلى بيا .. انك مش بتاع جواز تابع بنفس النبرة الباردة:

- بصى يا منى انا فعلا أعجبت بيكى ومش عارف لو كنت حبيتك فعلا ولا لاء .. لكن تجاوبك معايا خلانى أبصلك بنظرة مختلفة

شعرت بكلماته تصفنى فقلت بحسرة:

- مش أنت اللى أقنعتنى ولا نسيت كلامك .. ولا نسيت زعلك منى لما كنت بصدك قال بجديّة:

- مفكر تيش انى بختبرك؟ بشوفك تنفعى زوجة تشيل اسمى ولا لاء قلت بغضب:

- أنت حقير

أحتقن وجهه وقال مهدداً:

- متخاليش علاقتنا تنتهى بأسلوب مش كويس .. أنا لو كنت حقير كان زمانك بتتحايلى عليا علشان اتجوزك ولو ليوم واحد

لم أفهم ماذا يقصد بكلماته وهممت من بين دموع الإنكسار والمهانة اللذين شعرت بهما فى تلك اللحظة الكاشفة:

- مش فاهمة؟

صمت قليلا وهو يستعيد هدوءه من جديد ثم قال بود:

- مفيش داعى نتكلم فى الحكاية دى .. المهم دلوقتى

- دلوقتى ايه؟ خلاص دلوقتى انا طلعت مستاهلش أشيل أسمك .. دلوقتى طلعت فاشلة فى الاختبار.. كل ده علشان صدقتك .. أستغلّيت طبيبتى وسذاجتى وضحكت عليا

أوما برأسه وكأنه يؤكد كلامى وهو يقول ببساطة:

- معاكى حق انا فعلا استغلّيت طبيبتك وسذاجتك بس لو رجعتى لنفسك شوية هتلاقى انك مدتيش لنفسك فرصة تقولى فيها لاء ولو مرة واحدة وتصمى عليها.. كل مرة قولتى فيها كلمة لاء معملتيش بيها ..

ورغم كده انا بعترف انك بنت محترمة وانى ملمستش منك غير إيدك ويوم ما حضنتك فى الفرح غصب عنك

لكن انا يا منى فى الآخر راجل شرقى عاوز أحب وأتحب .. لكن لما آجى أتجوز هدور على واحدة تقفل الباب فى وشى من البداية.. متحطش نفسها فى أماكن شبهه وبعدين تقول غصب عنى

هطل الدمع الغزير من مقلتاى وهو ينهى كلماته .. لم تكن دموع الفراق .. كنت أبكى نفسى وما وصلت إليه من انحدار بسبب ضعفى وترددى وسذاجتى وعنادى .. بكيت تفريطى فى حق نفسى وأهلى و

كذبي عليهم وخيانتي لهم.. ولا بد أن يكون الجزاء من جنس العمل .. وها أنا الآن أتجرع كأن الخيانة والمهانة نقطة نقطة وأرتشف الذل رويدا رويدا .. ها أنا قد وصلت للنهاية الطبيعية .. من تعجل شىء

قبل أوانه عوقب بحرمانه.

فكرت أن أنتقم منه وأخبره بفضيحة أخته بتشفى.. لا .. تكفى الخيانة إلى هذا الحد .. لن أفضحها والأيام كفيّلة بتسديد جميع الديون

حاول سامح معالجة الموقف قانلا :

- أنا آسف يا منى .. حقيقى انا آسف من قلبى

لبنى الدوار وشعرت بروحى تنفر منى هاربة وأطرافى تتخاذل فتناولت الهاتف واتصلت برقم حياء

فهى الأقرب لي الآن واحتاج دعمها بشدة .. لم ينصرف وهو يسمعنى أحدثها وعندما أنهيت المكالمة قال مبرراً:

- شكك تعبانة .. هفضل معاكى لحد ما صاحبتك تيجى وظل واقفا بجوار مقعدى بصمت حتى أتت حياء بخطواط سريعة وملاحها شاحبة وقلقة وهى تنظر لى بتفحص وكأنها كانت تعلم بنتيجة المقابلة من قبل .. ومن الوهلة الأولى علمت ماذا حدث وطلبت من سامح ان يغادر بجمود فأخبرها بأنه سيكون بالجوار لو احتاجت إليه .. غادر سامح ببطء وهو ينظر خلفه ربما يساوره أحساسه بالندم على ما قال أو ما فعل أستطاعت حياء أن تهدىء من روعى وتدفعنى للنهوض من كبوتى تلك ومواصلة حياتى بشكل صحيح هذه المرة وأن الله سبحانه وتعالى قد أختار لي الأفضل

بعد ثوان من اختفاء سامح عن الأنظار فوجئت بسماح قادمة نحوى شعرها مشعث قليلاً وخطواطها مترنحة ، جلست بجوارى فهالنى ما آراه فيها من شحوب ونسيت ما كان بينى وبين أخيها فالتفت إليها بجزع متسائلة عما أصابها ففاجأتنى قائلة وهمس حتى لا تستمع حياء التى كانت تقف قبالتنا بحاجبين منعقدين بشك وقالت بوهن :

- ألحقينى يا منى حاسه أنى هموت .. وقعت واقعة جامدة من شوية وشكلى كده بنزف ! أصيبت بالحرج من شدة همس سماح فاستدارت تولينا ظهرها قليلاً بعد أن قرأت الصدمة على وجهى وسماح تتابع بهمس ميت :

- أنا اتجوزت محمد فى السر بعد اللى حصل بينا لكن حملت غصب عنى ومكنتش أعرف .. ومن شويه وانا جايه هنا وقعت وقعة جامدة حسيت بعدها بنزيف ومش قادرة أقف على رجلي حاولت تخطي صدمتى وقلت بشحوب :

- طيب يالا نروح مستشفى ولا نشوف دكتور همست على الفور:

- لالا دكتور ايه ومستشفى ايه ساعتها أهلى هيعرفوا انى كنت حامل واروح فى داهية ظهرت الحيرة على وجهى فقالت مستدركة بضعف وانكسار:

- أنا كنت بقابل محمد فى شفته .. ومعايا مفتاح الشقة .. هى قريبة من هنا خالص .. ممكن تيجى معايا أغير هدومى وبعدين أمشى أنت .. معلىش يا منى وصلينى بس للشقة محتاجة حد يسندنى وجميلك عمرى ما هنساه.

أشدت حيرتى لثوان أخرى ولكنى لم أستطع خذلانها وهى مريضة وتحتاجنى فقررت مساعدتها ، تحركت من مكاتى أساعدها على النهوض فالتفتت حياء إلينا بنظرات متسائلة فقلت على الفور أطمأنها :

- حياء انا هوصلها بيتها بس علشان تعبانة شوية وهرجعك على طول والبيت قريب خالص من هنا مش هتاخر عليك

عرضت حياء عرضاً لا يقبل المناقشة بأن تأتى معنا وعندما همست لها بأن الأمر خاص جداً ورأت أمارات الرفض واضحة على ملامح سماح بشكل غريب ، قالت بحرج مختلط بالقلق:

- هاوصلكوا وارجع تانى على طول علشان نهلة مستينانى . وعندما وصلنا إلى هناك وأسفل البناية تنحت بي حياء جانباً وهى تقول بحيرة:

- ايه يا بنتى هو ده بيتهم !؟

- لاء ده بيت جوزها

قالت بحيرة أكبر :

- هى اتجوزت امتى ؟

- هقولك بعدين .. خالينى بس اوصلها فوق الأول وارجعى انت الجامعة وانا شوية وهبقى عندك

أنهيت عبارتي وقبل أن استدير وجدتها تقبض على معصمي والقلق بنهش وجهها وحركاتها وشاردة وكأنها ترى مشهد ما في عقلها وقد علمت بعد ذلك أنها استعادت الحلم الذي قصصته عليها في السابق فأمتدت يدها إلى حقيبتي وأخرجت هاتفى منه خفية وجعلت رقم هاتفها يتصدر شاشة على وضع الأستعداد ودسته في يدي وهي تقول بريبة وحذر:

- أنا مش مرتاحة يا منى وحاسة أن فى حاجة غريبة بس عموماً خلى التليفون فى أيدك ولو حسيتى بأى حاجة أضغطى اتصال .. فاهمانى

أبتسمت لشدة قلقها علي وشعرت المبالغ فيه وأومات برأسي بتفهم وأنا أربت على يدها وأعود إلى سماح التي كانت تستند إلى ثلاجة المياة الغازية المقابلة للبنائية التي تقطن شقة محمد بها، مشت بجوارى بخفة على عكس الوهن الذي كان يعترئها منذ قليل وصعدنا إلى الشقة وقد كنت أظن في تلك اللحظة أن حياء قد غادرت وعادت إلى نهلة ولكنى لم أكن أعلم أن الخوف كان يلتهمها وهي تقف أسفل العقار تتخيل أبشع ما يمكن حدوثه، فتمشى خطوة وتقف الأخرى ثم تنظر للأعلى ثم تكتف يديها فوق صدرها وهي تدعو أن يكون ما بقلبها الآن مجرد وساوس لا أكثر ، مضت لحظات طويلة في عمرها قليلة في عمر الزمن ، وفجأة أعلن هاتفها عن اتصال من هاتفى وعندما أجابتنى بلهفة كان ردى أشبه بالقذائف الحارقة ، همسة ضعيفة بصوتى وكأنه أتى من أعماق بئر سحيق وبكلمة واحدة " الحقينى "

أنهمرت دموعها دون وعي وهي تضغط الهاتف الذي كان مازال موضوعاً على أذنها وقد تبين لها مدى بشاعة موقفها في تلك اللحظة وهي تخطو خطوات متعثرة نحو البنائية مجدداً وهي تفكر ، هل تصعد إلى نفس الطابق الذي رأت أضاءته عندما دخلنا المصعد، حاولت الاتصال بي مرة أخرى ولكن الهاتف أصبح غير متاح ، وعندما اقتربت من مدخل البنائية مر بجوارها رجلاً يقصد نفس الاتجاه وهي يتحدث في الهاتف على عجلة من أمره قائلاً

- خلاص يا سماح أنا تحت البيت أهو وطالع على طول .. متأخرتش ولا حاجة انتوا اللي جيتوا بدرى هاجمها الحلم مرة أخرى بقسوة والمشاهد تمر بعقلها تذبحها ودون تفكير وجدت نفسها تبحث عن رقمه في هاتفها دون منطقية و بدموع تهطل دون أرادة وما أن أجابها حتى هتفت ببكاء :

- ألقنا يا سامح .. أرجوك بسرعة

اجابها بفزع متسائلاً عما بها فأرشدته إلى العنوان دون تفاصيل والذي كان من نعمة الله علينا أنه في الجوار ولم يكن قد ابتعد كما قال سابقاً قبل أن يغادر.

ألتفتت إلى مدخل البنائية فوجدته مازال واقفاً يتحدث إلى حارث العقار وبجوارهم رجلاً أشيباً يبدو أنه قد تخطى العقد الخامس من عمره ، الحديث كان حانقاً وعندما اقتربت قليلاً سمعت الرجل الأشيب يهدد محمد بأنه سوف يتحدث إلى أبيه عما يفعله في شقته في البنائية من استقدام فتيات إليها وان الجيران مستنكرين أفعاله تلك وبشدة ، أستمر الحديث الحانق بينهما ومحمد يحاول ترضية الرجل حتى لا يخبر والده وهاتفه لم يتوقف عن الرنين ، رفعت حياء رأسها إلى السماء بدموع وهي تستند إلى الجدار وتدعو أن يستمر الحديث حتى يأتي سامح .

دقائق أخرى مرت في عمرها قليلة وفي عمر الزمن طويلة حتى استطاع محمد تهدئة الرجل فانصرف مغادراً البنائية بصحبة حارس العقار الذي ذهب معه ليعده له السيارة للمغادرة وشق محمد طريقة إلى المصعد ، أنارت شاشة المصعد بنفس رقم الطابق مما أكد لها هو اجسها فسقط قلبها بين قدميها وهي تعدو لمنتصف الشارع منتظرة قدومه وهي تعيد الاتصال به مجدداً فأجابها بانفاس لاهثة :

- أنا عند الكافتريا أهو على أول الشارع .. أشربت برأسها للأعلى تراقب زاوية الشارع لدقيقة كاملة كافية لقتلها حية ، حتى رآته أتى من بعيد يعدو وهو ينظر يمناً ويسرة حتى وجدها في منتصف الشارع تماماً تنتظره وتشير له أن يسرع ، وبمجرد أن وصل إليها انحنى مستنداً إلى ركبتيه وهو يلهث بقوة قائلاً بأنفاس متلاحقة:

- فى ايه .. و أيه اللي جابك هنا

لم تشعر إلا وهي تجذبه الى البناية وتجرى به الى المصعد وهي تهتف به:  
- ألحق منى يا سماح .. أختك خدتها هنا ومحمد جه من شوية  
لم يستطع أن يفهم منها شيئاً وهو يهرول بجانبها هاتفاً:  
- محمد .. سماح ! انا مش فاهم حاجة ..!!

لقد كانت لحظة مجنونة بكل المقاييس ، فليس من العقل أن تستعين به وهو من هو، ولكن هذا ما حدث  
وكان المنطق لم يعد له وجود . وعندما وصلا إلى الطابق المنشود وكان هو قد استرد أنفاسه فتوجه  
بتلقائية تجاه اليمين إلى شقة محمد الذى كان يعرف بها مسبقاً نظراً لصدافتها الطويلة ، وأخذت  
حياء تدق الباب بشدة وقلبها يكاد يتوقف من فرط الأنفعال ولم يكن لديها فى كل الاحوال حل آخر.

( ١٥ )

فتح محمد الباب وبدأت على وجهه علامات الذعر حينما رأى سماح أمامه مباشرة ، دخلت حياء سريعاً  
ودلف هو خلفها بدهشة وحيرة وما أن خطا بقدمه للداخل حتى شاهد سماح تخرج من الممر المؤدى  
للغرف الداخلية وهي ترتدى منامة شفافة تبدى أكثر مما تخفى وفوق شفيتها ابتسامة لعوب ، وعندما  
وقع نظرها على سماح تجمدت مكانها وشحب وجهها فصار كالأموات ولطمت خديها وهي تنطق  
بأسمه بهلع ، تجمد محمد مثلها تماما وبعينيه نفس النظرة المذعورة بينما اندفعت حياء تجاه مقعد فى  
الزاوية فوقه حقيبتى وهاتفى ، لم تنتظر كثيراً فهزلت مجدداً ولكن هذه المرة إلى الممر الذى ظهرت  
منه سماح ، دفعتها ومرت بجوارها تفتح كل غرفة تجدها وأخيراً وجدتني فى أحدهم ملقاة على فراش  
الغرفة وتغطيني ملاءة السرير وعندما اقتربت منى اكتشفت أننى غائبة عن الوعي وعارية ! ، حاولت  
تمسيد وجهى لأستفيق بيدان مرتعشتان وهي تستمع إلى الصراخ الآتى من الخارج وسماح تصرخ :

- والله أنا مراته يا سماح .. انا مراته ..

وتوسلات محمد ليتركه وسيصلح خطأه وسيتروجها رسمياً وبأنه لم يكن يعلم بأنها ستخدرنى له !،  
ظل صوت الضرب والصراخ والتوسلات وحياء تموت فى كل دقيقة تمر عليها بالداخل بجواري وانا لا  
أستجيب ولا أفيق ، وأخيراً سمعت باب الشقة يصفع بقوة بينما زادت صرخات سماح المتحشجة  
وكأنها تختنق ، خرجت حياء من الغرفة فرأت سماح يخنقها وصوت صرخاتها ينخفض شيئاً  
فشيئاً ، ولون الحياة يختفى من وجهها مع صوت حشرجتها المتألمة ، فاندفعت إليه محاولة قبضته  
التي كانت وكأنها قد ماتت على عنقها ، وعندما يأسست من تخليص عنق سماح أنهارت تماماً وظلت  
تصرخ فيه دون وعى:

- أنت اللي عملت فيها كده أنت السبب .. أقتل نفسك قبل ما تقتلها وتجبلنا مصيبة كلنا.. حرام عليك هتضيعنا معاك

بدأت قبضته ترتخي وبدأت سماح تهوي إلى الأرض وهي لا تستطيع التنفس فمالت حياء نحوها وحاولت أنعاشها وهي ترجوها أن تقول لها ماذا فعلت بي ، نظرت لها سماح بضعف وهي تتنفس بصعوبة وقالت :

- هتفوق كمان ساعة

ثم تحاملت على قدميها وأسرعت الى غرفة أخرى وأغلقتها خلفها بقوة وظلت تصرخ وتبكي من وراء بابها وأخيراً خرج صوته من حلقة كالأموات العائدة إلى قبورها متسائلاً:  
- حصلها حاجة؟

بكت حياء وهي تقول بلوعة :

- مش عارفة .. بس مفيش أثر لحاجة

جلس على أقرب مقعد وكان قدمه رفضت أن تحمله ، جلس وكأنه يسقط من السماء ودفن راسه بين كفيه وأخيراً بكى ، بكى بحرقة وظل يبكي حتى تحول بكاءه الى شهيق طويل ثم يعود فيبكي بصوت منخفض ، أنهارت البقية الباقية من أعصاب حياء ولم تعرف ماذا تفعل ، كيف تواسيه وهو الجاني الحقيقي ، ولكن كل جاني وراءه دوافع ، ربما تكون من وجهة نظره دوافع قوية لكنه فى النهاية إنسان .. يخطيء ويصيب ويتعلم من الاخطاء ، ولكن هل نترك دوافعنا وحقنا على من ظلمونا تجعلنا نظلم غيرنا دون سبب .. فنتغلق دائرة الظلم علينا إلى ما لا نهاية!؟

هدأ الوضع قليلاً ولكن بعد مرور الساعة اشتعل مرة أخرى عندما أستفقت من غيوبتي ووجدت نفسي عارية ، لم يتوقف صراخي وضربي لوجهي وصدري وحياء تمسك بيدي محاولة طمأنتى بثقة واهية وصوت مرتعش بأنه لم يحدث ما أخافه ، فلقد تدخل سماح فى الوقت المناسب .

ساعدتني على ارتداء ملابسى وأنا اترنج وأسندتني إلى كتفها وخرجنا من الغرفة ، وجدناه مازال واضعاً يديه على رأسه فى صمت مطبق كأنه تمثال أشارت لى حياء أن أصمت فهو فى حالة لا تسمح له بكلمة عتاب من أى نوع، ناولتني حقيبتى وهاتفى وخرجت بي من الشقة واسندتني إلى المصعد وقبل أن تضغط الزر توقفت يدها فى الهواء بتردد وكأنها قد تذكرت شيئاً .. لقد خشيت أن تترك سماح بالداخل معه وحدها فيعيد كرتة فيقتلها فى لحظة غضب ، همست لى أن أنتظرها هنا ولا أتحرك حتى تعود وعادت للداخل مجدداً متوجهة إلى الغرفة التى دخلتها سماح وقد ارتدت ملابسها وجلست خلف الباب منتظرة مصيرها المحتوم طرقت حياء باب الغرفة وهمست بحزم وهي تسمع أنفاس سماح المتلاحقة من الجهة الأخرى :

- أفتحى الباب متخافيش .. تعالى معانا .. لو سبناكى معاه هيقتلك

أطلت نظرة رعب من عينيها المتورمتان من أثر البكاء وقامت لتفتح باب الغرفة ومنها مهولة إلى خارج الشقة وكأن الشياطين تلاحقها، مرت بي ولكنها لم تستخدم المصعد ، هبطت تقفز الدرج بهستيرية واضحة.

ألقت عليه حياء نظرة أخيرة وهو مازال على جلسته المتصلبة دافئاً رأسه بخزي بين يديه وفي عالم آخر لا يشعر بما حوله ، تركت الباب مفتوحاً وأخذتني وغادرنا المكان وتركاناه خلفنا مثل ما نترك الأموات فى قبورهم ونصرف فى صمت ونحن ندعو لهم بالرحمة.

\*\*\*

أخذتنا أقدامنا إلى أقرب مسجد أطلت مأزنته بشموخ من بعيد تنادينا إلى الراحة والسكون ، لم يتواجد بمصلى النساء إلا امرأتان وانصرفا مباشرة بعد انتهاء الصلاة ، حكمت لى حياء ما حدث بإيجاز ثم ساد

صمت مطبق ذابل بذبولي وشردت بحيرة لا أعلم لماذا تفعل بي سماح ما فعلت ، بماذا أديتها لتهلكني بتلك الطريقة البشعة وتقدمني لقمة سائغة لعشيقها ، ماذا لو لم أضغط على الهاتف عندما شعرت بالدوار بعد تناولى للعصير الذى قدمته لي وأنا أتصورها نوبة سكر جديدة ؟ ، ماذا لو لم يستجيب سامح لنداء حياء ، وهل انقذنى بالفعل أم أنهما قد تأخرا ؟ ، وكيف ستأكد ؟ ، هطلت دموعى غزيرة بقلب مرتعد فشعرت بيدها تلتف حول كتفى لتضمنى إلى صدرها ونحن جلوس ، تربت على رأسي وتهدىء روعى ، شعرت بصدرها يختلج وكأن كلمات ما تتردد فى الخروج وأخيراً شق صوتها الخافت صمت المكان بهدوء وهى تقول متوترة:

- لازم نروح لدكتورة علشان نطمئن عليك

ذبحتنى نبرتها الخائفة ولكنى أنا أيضا كنت بحاجة للشعور بأنى بخير ،للشعور بالأمان ، أنتظرنا ساعة أو أكثر ثم اتجهنا إلى أقرب مركز طبي وأملنا متعلق بالله الستير وعندما حدثنا الطبيبة نظرت لنا بريبة و بنظرات متفحصمة مقيمة فعالجتها حياء باقتضاب قائلة :

- أنا أختها الكبيرة وعاوزه أطمئن عليها مش أكثر

مرت الدقائق ثقيلة للغاية وبرغم من أنها لم تتعدى الثلاث دقائق إلا إنها مرت كالدهر ، شعرت بأنى أحمل مستقبلي بين يدي وأخشى عليه من السقوط ، وأخيراً نطقها الطبيبة بروتينية معتادة:

- كله تمام مفيش داعى للقلق .. أختك صاغ سليم

خرجنا من عند الطبيبة وكأنا قد ولدنا من جديد وقد سترنى الله بستره ، أتجهت بي حياء إلى أحد الكافتريات الشاغرة قليلاً واقتربت منى بمقعدها وهى تتنفس وكأنها قد حرمت التنفس طويلاً وأمسكت بيدي وهى تميل نحوى تنظر لي بجدية قائلة:

- شوفتى يا منى ربنا سترنا ازاي .. رغم كل التفريط رغم كل شىء ربنا سترنا .. لازم نبدأ من جديد بقى .. أرمى كل اللى فات ورا ظهرك وأنسى كل الناس دول وأبدأ من جديد .. أفتحى صفحة جديدة مع ربك وعاهديه انك مش هتخالى حد حبه فى قلبك مهما كان أكثر من اللى خلقتك وسترك .. أبدأ مع ناس محترمة أبدأ مع راجل زى أدهم .. صدقيني هينسيكى سامح وكل اللى حصلك معاه

قلت بدموع وبصوت مرتعش:

- مبحبوش .. مبحبوش

شعرت وقتها بأنها قد استحالت إلى أحد عملاء المخابرات وتنوى تجنيدى وغسل مخى وهى تقول بنبات مستغلة كل نقط الضعف التى تعرفها عني وعن سامح :

- صدقيني هتحببيه .. ده راجل بجد وبيخاف عليكى .. اعلمى كدة مقارنة سريعة بينه وبين سامح ..

واحد مكنش يفرق معاه سمعتك ولا دراستك ولا أى حاجة .. وواحد مرديش يخرج معاكى انت واخته إلا فى وجود أخوكى

واحد كان بيدخل عليكى أوضة صحبتك ويقعد يهزر معاكوا .. وواحد كان عاوز يطلع ياكل بره علشان

تقعدى براحتك رغم وجود أمك وأخوكى وأهله .. صدقيني يا منى هتحببيه ...أعملى خطوبة طويلة

واتعاملى معاه وهتشوفى ولو يا ستى محبتيهوش أبقى افسخى الخطوبة

الموقف لم يكن يحتمل العناد فأومأت برأسى أوافقها وعندما عادت بي إلى والدتي فى المساء بشرتها

بمواقفتى لتسد أى طريق للتراجع وكأنها تلقي بهمومى على كتف غيرها فلقد بذلت أقصى ما فى

وسعها بل وعرضت نفسها بتهور إلى أن تلقى نفس مصيرى الذى كنت سألقاه لولا ستر الله علينا ، بل

توجهت بعدها إلى منزلها لتنام يومين كاملين لا تنهض إلى للصلاة فقط ثم تعود لتنام من جديد ، نامت

كما لم تنم من قبل ، ولا تسألوا عن عائلتها فهم لا يختلفون كثيراً عن عائلتي ! ، ولم تستيقظ إلى على

مكالمتي عندما كنت أخبرها بتحديد موعد حفلة خطبتي على أدهم ! .

\*\*\*

الحفل كان رقيق ورائع وعائلي فقط ، والتف الجمع حولي بسعادة، نظرت نحو أدهم بريبة واحتقن وجهي عندما سمعته يقول لوالدته:

- لو سمحتي يا أمي لبسيها الشبكة.. أنت عارفة .. انا مش هينفع  
أقربت حياء وانحنت نحوي متسائلة ماذا حل بي قفلت لها بعصبية هامسة:  
- يقول لأمه لبسيها انت الشبكة .. هو خايف يلمنى ولا ايه؟

شدت حياء على يدي هامسة:

- يابنتي علشان انت مش مراته ومش عاوز يمسك ايدك علشان كده .. الله يخاليكي اضحكي شوية  
الناس مركزين معاكى شكلك كأنك مغصوبه عليه  
أبتسمت بعصبية أنظر حولي ، أقتربت والدته لتمسك بيدي وهي تفتح علبة الذهب باليد الأخرى وقبل  
أن تمس خاتم الخطبة ظهر أخى هشام وهو يصيح بشغف وابتسامه مشاكسة عريضة ممسكاً بيده  
المأذون قائلاً:

- أستوووب العريس هو اللي هيلبس الشبكة.. بس بعد كتب الكتاب

علت الزغاريد من حولي بينما تجمدت مكاني وقد أدركت الآن لماذا كانت والدتي تبحث عن بطاقتي  
الشخصية وصورتي بالأمس ، لقد وقعت بمكيدة ما ! ، ألنفت إلى أدهم لعله يعترض إلا أنني وجدته وقد  
تألق وجهه أضعافاً مضاعفة ووالده يخرج من جيب سرواله صوراً شخصية لأدهم وقد بات واضحاً أنه  
أحد المشاركين في تلك المفاجآت التي هزنتني وجعلت مقعدى يبتلعنى وبات أمرى محتوماً بموافقة  
الجميع ، شعرت بدوار خفيف ووالدته تحتضننى وتبعتها منال ثم والدتي التي بكت على كتفى بدموع  
فرح أصابنتي بالخرس ، وتم عقد القران بسرعة شديدة وأنا مصابة بالذهول .. لقد أصبح زوجي على  
حين غرة !، كتمت شهقة خافتة صدرت مني رغباً عني عندما أمسك بيدي ورفعها إلى شفتيه وقبلها  
بحنان ثم قال وكأنه قد تبدل لشخص آخر في ثوان معدودة:

- مبروك يا حبيبتي ربنا يجعلنى نعم الزوج الصالح ويجعلك نعم الزوجة الصالحة ليا واقدر أسعدك  
ثم قبل جيبني أمام الناس .. ما هذا ؟ ! إنه قليل الحياء !

شعرت حياء بيد والدتها تجذبها نحوها وتقبلها وهي تقول باكية بطيبة شديدة:

- ربنا يابنتي يرزقك الزوج الصالح يارب

أستعت عينيها وهي تنظر إلى دموع والدتها قائلة بمشاكسة:

- خلاص يا ماما خلاص أمسحى دموعك عاوزة الناس يقولوا عليا معنسة ولا أية ؟

( ١٦ )

اليوم التالي مباشرة كان يوم الجمعة وهو اليوم الذي تذهب فيه حياء إلى مقراة أسبوعية للقرآن في  
أحد المساجد القريبة ، أخبرتني والدتي بموعد قدوم أدهم زيارتنا فأومأت برأسي بلامبالاة ووقفت في  
النافذة متسائلة ماذا ستكون طبيعة علاقتي به وكيف سأستطيع التواصل معه وأنا لا أعرفه بل وأخافه

! ، وعندما التفت برأسي إلى منزل حياء القابع أمام بيتنا مباشرة وجدته يقترب من باب البناية بابتسامة صغيرة ويدلف للداخل بخطوات واسعة ، أتسعت عياني غير مصدقة ، ماذا جاء به إلى هنا وماذا يفعل في منزل حياء ، شعرت بالنار تضرم في قلبي وعدت للداخل ملتقة هاتفى وهاتفتها بوجه محتقن وما أن سمعت صوتها يرد بهدوء حتى انفجرت بها بانفعال غير مبرر :  
- سامح بي عمل أيه عندكوا يا حياء ؟  
أجابتنى مازحة:

- مين ياختى .. سامح مين .. أنت شاربة أيه على العصر !  
أجبتها بعصبية شديدة:

- أنت هستعبطى .. أنا لسه شايفاه داخل عندكم  
نبرة صوتي جعلت مزاحها يطير في الهواء وأجابتنى بنبرة قلقة:  
- أنا مش في البيت يا منى أنا راجعة من المقرأة وقربت أدخل شارعنا أهو  
هدأت قليلاً وأنا أشرب برأسي وأميل بجزعي للأمام أنتظر ظهورها عند المنعطف والهاتف مازال على  
أذني أستمع إلى أنفاسها المتعثرة ، بدأت تتضح صورتها وهي تتقدم بخطواط واسعة ووجه شاحب  
متوتر فتابعته متسائلة :

- بردة مقولتيش جاي عندكوا يعمل أيه يا حياء ؟ .. مش معقول متعرفيش !

- والله ما أعرف حاجة ربنا يستر .. أفضلي دلوقتي  
أنهيت الاتصال وتابعته بنظري وهي تدخل بنايتهم وتتم حانقة . طرقت حياء باب شقتهم فإذا  
بوالدتها تفتح لها الباب بوجه احتلته علامات البشر والسرور وجذبتها لتخضع قليلاً وتهمس لها :  
- مبروك يا حبيبتي .. جالك عريس زي القمر .. والله ده كل البنات هتحدك عليه  
خاص قلبها بين أضلعها وهي تهمس بحق :

- عريس ايه وبتاع ايه .. مين ده اصلاً ؟  
جذبتها والدتها لتدخل بها غرفتها ثم أغلقت الباب خلفها واستدارت إليها قائلة بحماس:  
- أول ما جه أعتذر أنه زارنا من غير معاد لأنه مكنش عارف يوصل لرقم التليفون علشان يتصل الأول  
.. وقال انه شافك في الجامعة وأعجب بيكي وجه يدخل البيت من باب  
زفرت بقوة وهي مازالت غير مصدقة لتهوره ونظرت للأعلى وهي تتمم بداخلها " منك لله يا سامح "

ققرأت والدتها الرفض في وجهها فلكرتها بمرفقها وهي تقول :  
- ده من ساعة ما شافني وهو بيقلولي يا أمي .. وهيته عاجبة أبوكي .. عارفة يعني ايه؟  
قالت حياء بنبرة الساخرة:

- طب والله كويس على خيرة الله طالما بيقلولك يا أمي وعاجب أبويا هنعوز أيه تاني .. هنفترى يعني  
لكزتها والدتها مجدداً في اللحظة التي فتح والدها الباب بخشونة واقترب منها وقال :  
- أمك قالتك ؟

أومات حياء برأسها بصمت فقال متابعاً:

- أنا عرفت منه شوية تفاصيل عنه وخذت عنوانه وبياناته وقولتله هنسأل عليه ونبقى نرد .. اطلعي  
يالا أقعدى خمس دقائق كده تشوفيه ويشوفك

ما هذه الكارثة ياربي ! ، قالت بنزق وهي تشعر بأطرافها تكاد تتخلى عنها :

- لاء مبقدش مع حد لما تبقوا تسألوا عليه أبقي أقعد معاه

قال والدها بصرامة لا تقبل النقاش:

- خلصيني مش عاوز وجع دماغ .. اطلعي

لم يكن في المقدور أن ترفض دون ان تبدى سبباً منطقياً فرضت لرغبتهم وخرجت إليه تضغط  
أسنانها تكاد تهشمها، جلست بعيداً نسيباً عنه واستأذنت والدتها لتعد له مشروبة ، رفعت رأسها إليه



فرأت نظرت الإنكسار مازالت بعينه وكأنها قد أصبحت جزء من ملامحة، نظر إليها وقال بهدوء:

- أزيك يا آنسة حياء

- الحمد لله

وعندما اطمأنت أن والدها لن ينضم إليهم وقد بات الطريق خالياً لتعنيفه حاولت حياء أن تتكلم بصوت خفيض لا يسمعه إلا هو قائلة بانفعال:

- أنت حصل في مخك حاجة ولا ايه؟

أجابها بخفوت:

- ليه؟

- أنت ازاي تيجي هنا .. وأيه حكاية جاي تتقدملى دى .. قصدك ايه يعنى!؟

رفع حاجبيه مندهشاً وقال:

- هيكون قصدى ايه ... عايز أتجوزك طبعاً.. وزى ما قولت لوالدك داخل البيت من بابيه

زفرت بغضب وقالت وهى تحاول كتم غيظها:

- انت بتستهبل؟

قال بهمس:

- لاء بحبك

قالت بضيق:

- قولى هو بالنفر ولا ملاكى

- هو ايه!؟

- قلبك

قال بأنكسار:

- انا عارف قصدك ايه .. أنا مش هعرف افهمك دلوقتى .. و معاكى حق فى كل اللي بتقوليه عليا

دلوقتى .. بس والله انا محبتش حتى أحاول أكلمك قبل ما آجى البيت علشان أثبتك أنى جد معاكى وأنى

أتغيرت فعلاً.. وكمان خفت ترفضى دخولى بيتكم من الأساس علشان كده جازفت وجيت من غير معاد.

وقبل أن تجيبه دخل والدها مرة أخرى مرحباً به وجلس بجواره . نهضت هى لتدخل غرفتها بحركات

عصبية بينما أنهى هو جلسته سريعاً وانصرف فى أنتظار مكالمة من والدها !

لحقتها والدتها للداخل وهى تقول بوضوح منشرح :

- ها ايه رأيك .. زى القمر صح .. وشكله مؤدب وابن ناس

تنهدت وقالت ساخرة :

- اه فعلاً شكله مؤدب جداً!!!

- موافقة .. مش كده

قالت حياء وهى تداعب والدتها:

- بالله عليكى يا ماما .. انتِ عاوزة تجوزينى أسرع ما بتسلقى البيض؟

قالت والدتها بعبوس:

- عاوزة افرح بيكى قبل ما أموت .. وهو عيب يعنى يا بتاعة الحلال والحرام .

- خلاص يا أمى خلاص سيبينى بس أفكر وبعدين انتوا مش لسه هتسألوا عليه أستنى بقى يمكن يطلع

سوابق ولا حاجة

ألتفتت إليها والدتها بغيظ قائلة:

- نعم سوابق .. بقى ده شكل سوابق .. ده انتِ اللى سوابق

- ايه يا ماما من أولها كده هتقفى فى صفه .. أو مال لو وافقت واتجوزته هتعملى ايه .. هتتبنيه هو

وتطردينى من البيت !

- والله يا بنتى نفسى اطرديك بس على بيت عدلك

- أیه الأمهات دی یا ناس .. أو مال فین حنان الأم اللی بیقولوا علیه!؟

بعد مغادرة سامح انطلقت إلى منزل حياء والشرار يتراقص فى عینای ، رحبت بی والدتها وكأی أم طيبة عفوية أبلغتني منشرحة عن زيارة سامح وطلبه للزواج من ابنتها وانتهت كلماتها الفرحة قائلة :  
- لا وأیة .. زى القمر وابن ناس .. طول بعرض .. شاب یشرح القلب

أصتكت أسناني وأنا أقول بابتسامة صفراء:

- والله..مبروك یا طنط...عن أذنك ادخلها

دلقت إليها فى غرفتها على الفور وأنا أتأرجح بين غضبي وعدم فهمي لما يحدث وأغلقت باب غرفة حياء التى قابلتني بابتسامة متوترة وقالت:

- منى أقعدى وأفهمى لو سمحتى

كدت أن أنفجر فى وجهها هاتفة بغضب:

- أفهم أیه یا ست هانم ..عماله تطلعى فيه عيوب الدنيا .. كنتى بتطفشینی مش كده..عجبك لما شوفتیه مش كده..انت بقى الخضرة الشريفة اللی اختارها وسابنى علشانها.. طبعاً.. مش انا اللی مشيت معاه.. مش انا اللی أتنازلته وأنت الطاهرة اللی ملمسكيش ..هى دی الصداقة هو ده الالتزام؟! .. وانا العبيطة اللی كنت بقول جابت رقمه منين! .. أتاريكوا متفقين على الجواز .

لم أتوقف عن ترهاتي حتى أوفقتنى حياء بصرامة قائلة:

- أسمعنى یا منى لحد هنا وما أسمحش أبدا لأى حد فى الدنيا یقول علیا الكلام ده..وبدل ما انت داخله

تلقى الاتهامات جزافاً كده اسألنى واسمعنى وانت ترتاحى وتریحى

- اسمع ایه وافهم ایه ده جاي يتجوز .. عارفة یعنی ایه.. یعنی بیحبك

قالت حياء بسخرية مريرة:

- والله؟ بیحبنى ازای بقى .. بالاسلكى ولا نام وحلم بیا!؟

فركت يداي والدموع تنغزنى بمقلتای فأمسكت بيدي وهى تقول بجدية :

منى بعصبية:

- قولى لنفسك ..كنتوا بتتقابلوا من ورايا صح كان بیقولك ایه ها

أستعادت حياء صرامتها مرة أخرى وقالت بجدية:

- اهدى علشان اعرف احكيك كل حاجة

أجلستنى بجوارها وبدأت فى سرد ما حدث من الألف إلى الياء وأنا أستمع وعلى وجهي تجلت علامات

عدم التصديق والدهشة وأخذت أتمتم :

- سامح؟ معقول!؟!!

- أظن بقى كده عرفتى جبت رقمه منين .. وعرفتى أنى ماليش ذنب فى حاجة .. والمرة الوحيدة اللی

اتصلت بیه فیها هى المرة اللی طلبت فیها منه النجدة علشان نلحقك.. وصدقینى یا منى لو كان فى

بالى أى راجل تانى ثقہ كنت كلمته .. ماهو أصلاً مكنش منطقی أنى أستنجد بیه وانا خايفه علیكى من

أخته.. بعد اللی سمعته ده عاوزة بقى تصدقنى انى ماليش ذنب فى أنه یجى البيت صدقنى .. مش

عاوزة تصدقنى براحتك

وبدون كلمة أخرى أنصرفت فى هدوء ، كنت أحتاج إلى الخلوۃ بنفسى ولقد فهمت حياء ذلك فتركتنى

\*\*\*

تبددت أحلامى بالأنفراد بنفسى قليلاً عندما دخلت بيتى فنهرتني والدتي هاتفة:

- ایه ده یا منى .. كل ده عند حياء .. یا لا اجهزى أدهم زمانه جاي

وجدت نفسي أقول باستهزاء لم أكن أقصده:  
- أجهز ازاي يعنى يا ماما أقوم أفرش الأرض رمله  
غضبت والدتي ونهرتني بقسوة فاعتذرت لها ودخلت غرفتي بانسة لأبدل ملابسى. بعد قليل دخلت  
والدتي خلفى لتقف ناظرة إلى ملابسى قائلة بعدم رضى عن مظهرى:  
- ايه اللى انت لابساه ده يا بنتى ومالك لمة شعرك كده ليه  
قلت بعناد:

- والله بقى ده اللى عندى مش عجبه هو حر  
تنهدت والدتي قائلة بصبر:  
- ربنا يهديكى يا بنتى.. تعالى سلمى عليه  
خرجت إليه وصافحته سريعاً بينما قدم هو لي باقة من الأزهار المنتقاة بعناية فشكرته وانا أجلس  
امامه بينما استأذنت منه والدتي وانصرفت إلى المطبخ  
بدل مقعده واقرب يجلس بجوارى وقال بابتسامة عذبة:

- وحشتينى  
ابتلعت ريقى وقلت بخفوت غير مصدقة :

- هه .. شكرا  
قال أدهم بصوته الرخيم مازحاً:

- شكرا !  
- او مال أقول ايه؟

قال متعجباً:

- مينفعش أقولك تقولى ايه .. انت اللى لازم تقولى من نفسك  
لم أجبته وصمت لبرهة فقال محاولاً استجلاب رضاي مشيراً إلى ملابسى :  
- الطقم ده رقيق جدا عليكى .. حقيقى حلو أوى  
تعجبت وانا أنظر لملابسى ، فلقد انتقيت ملابس قديمة كنت قد تركتها من فترة طويلة فى خزانة  
ملابسى ، رفعت رأسى إليه فوجدته يتألمنى فتورد وجهى وقلت متممة:  
- تشرب عصير ؟

قال بهمس رجولى:

- لو من ايدك أشرب

لا أعلم لماذا استفزنى هدوءه ومعاملته الغريبة لى وكأنه يعرفنى منذ زمن وطرات ببالى فكرة فقلت  
من فورى :

- آه هعملهولك بنفسى بس انا مينفعش خالص أشرب حاجات مسكره .. أصل انا عندى السكر  
قال بدهشة دون أن يبدي انزعاجاً:

- معقوله .. ألف سلامه عليكى..

فتابعت ببساطة :

- الله يسلمك .. بس شكلى كده حالتى متأخرة يعنى هيبقى عندى مشاكل فى الجواز والحمل ربنا  
يصبرك بقى

أبتسم أدهم قائلاً بحنان:

- ربنا يصبرنى !.. ده أنا أفديكى بروحى يا منى انت بتقولى ايه

أنفعلت رغماً عني من حديثه الهادىء بغيظ مكتوم :

- فى ايه؟ .. أنت محسنى انك بتحبنى وبتموت فىا.

أبتسم بتعجب قائلاً:

- طب وفيها ايه .. آه بحبك انتِ مش مراتى ولا ايه؟
- ياسلام هو انا يعنى علشان مراتك تقوم تحبنى .. بس لمجرد انى مراتك أجاب بنفس الأبتسامة المندهشة قائلاً:
- أو مال يعنى احبك وانتِ مش مراتى ويبقى حبنا بيغضب ربنا وكان كلماته أصابت جرحاً برأسى فقلت مناقضة لنفسى ولتاريخى مع سامح دون تفكير:
- أنا مش بتكلم على حرام وحلال..أنا بتكلم انك مشوفتنيش غير كام مرة.. لحقت تحبنى أمتى؟ قال أدهم بصدق وتفهم إلا أن دهشته بقيت فى ابتسامته:
- متنسيش اننا فى بينا نسب من زمان وبسمع عنك كل خير .. أنتِ متعرفيش ماما ومنال بيتكلموا عليك ازاي .. عارفة لما رشحتك ليا .. كانت متوقعة أنى أرفض زى ما كنت بعمل مع ظاى عروسة بتجبهالى .. لكن اتفجأت لما قولتلها هستخير وأرد عليكى .. بعد الأستخارة حسيت أن ربنا حط حبك فى قلبى ..وبدون أسباب .. ولقيت نفسى بقولها تيجى تقابل والدتك وتحدد معاها معاد.
- وجدت نفسى أقول بشرود :
- طب وانا .. مسألتش نفسك انا بحبك ولا لاء
- أبتسم بتفهم قائلاً :
- أنا مش صغير يا منى ومش مراهق .. أنا عارف انك لسه بتاخدى عليا .. وبعد كلامك ده أتأكدت انك لسه محبتنيش ويكفينى انك وافقتى على جوازنا.. ده فى حد ذاته حاجة كبيرة عندى ثم تابع مردفاً بثقة وعينيه تلمع بعاطفة قوية:
- أو عدك أنى أخاليكى تحببى

\*\*\*

( ١٧ )

- وضعت والدة حياء يدها على كتف ابنتها وقالت بود :
- تعالى يا حبيبتى أقعدى جنبى .. أبوكى سأل على أهل العريس ولقاهم ناس مبسوطين رفعت حياء حاجبها قائلة بسخرية:
- بجد؟.. مبسوطين ازاي يعنى .. بيضحكوا كتير
- تغيرت نبرة والدتها فى لحظة وقالت زاجرة:
- بت انتِ انا مبهررش ..أظن كده مالكيش حجة
- رفعت كتفيها وقالت بمزاح:
- طبعا ماليش حجة طالما أهله بيضحكوا على طول هرفض ليه
- طب استنى بقى هناديلك ابوكى علشان تعرفى تتريقى كويس

جذبته حياء من يدها برفق وقبلت كفها قائلة برجاء:

- لا أبوس أيدك يا ست الكل أقعدى.. أنا أسفة بلاش أبويا أنتِ عارفة أنه مضطهضنى  
- ها طيب قولتى أياه؟

لم تجد حياء وسيلة بعد ذلك إلا الحيلة فهى تعلم والدها جيداً وقالت:

- ماما يا حبيبتى يرضيكى أتجوز واحد معرفش عنه حاجة .. طب أوافق ازاي دى تبقى موافقة على  
ميه بيضا

- خلاص لما يجى تانى أقعدى معاه زى ما أنتِ عايزة وأتكلمى معاه براحتك

-هو بابا هيسببني أفتح بوى ما انتِ عارفة وبعدين انتِ ايه اللى عرفك إنه هيجى تانى مش جايز لما  
شافنى هرب بجلده  
قالت والدتها مؤكدة:

- لا يا حبيبتى ده كل يوم يتصل بأبوكى وبالنسبة لموضوع أنكِ عاوزة تتعرفى عليه ده مالكيش دعوة  
سببها عليا أنا هخاليكى تتكلمى معاه براحتك المهم تطلعى بنتيجة وتخلصينا  
- طب ممكن بس تأجليها شوية.. مش فاضية اليومين دول  
- خلاص يا حبيبتى أبوكى اتصل بيه وحدد معاه معاد  
- فى ايه يا ناس .. هو انا أياه .. هوى .. سراب .. شبح محدش شايفنى  
قالت والدتها وكأنها لم تسمعها :

- هو كان عاوز يجيب معاه أبوه وامه وقال بالمرّة نقرأ الفاتحة بس أبوكى قاله لا تعالى لوحدك ولو  
حصل قبول أبقى هاتهم المرّة اللى بعدها  
تمت حياء بداخلها بغل " منك لله يا سامح " قبل أن تقول بابتسامة صفراء:

- والمحروس جاي أمتى

- قال هايجي بعد صلاة الجمعة

- يا سلام على الإيمان والتقوى !!

\*\*\*\*

لم تخبرني حياء وقتها عن تلك المقابلة التى كانت تنوى عن طريقها أن تجعل سامح يخرج من بيتهم  
ولا يعاود مرة أخرى وكنت أنا أيضا أتحاشاها منذ أن عرفت بتقدمه لخطبتها وكان الموقف كان صفقة  
لكرامتى المهذورة ، وجاء يوم الجمعة ليتألق منزل حياء كأى منزل مصري يستعد لإستقبال عريس  
تمت الموافقة عليه ضمناً من قبل أهل العروس.  
دخلت والدتها غرفتها لترى هل ارتدت ملابسها أم لا وقد حان الوقت المرتقب فأتسعت حدقتها بعدم  
رضى قائلة:

- ما تلبسى حاجة عدله .. ايه اللى انتِ مهباه ده

- يوه يا ماما .. فى ايه

- يابنتى غيرى الأسدال الاسود ده.. الراجل يقول عليكى ايه رايحة تعزى

- تحبى ألبس البنى ولا الكحلى؟

قالت والدتها باستهجان:

- بنى ايه وكحلى ايه .. هو انتِ عندك أسدالات غير الاسود.. يابنتى عندك هدوم كثير محتشمة برضة  
وشيك

- ماينفعش يا ماما يا أما الاسدال الاسود .. يا أما البنى أو الكحلى اللى هما مش عندى أصلا ..ها

أختارى

أرسلت والدتها تنهيدة قوية وقالت باستسلام:

- ربنا يهديكى أقول ايه بس .. لو مكانتش مرات اخوكى هنا...  
قاطعتها حياء متسائلة:

- آه صحيح هى ايه اللى جاييها النهاردة.. جاية تتفرج؟

- بتحشر نفسها فى كل حاجة.. إذا كان اخوكى نفسه مجاش

- طب كويس انها جات يارب العريس يعجبها... أهو نبقى ضربنا عصفورين بحجر واحد

سمعت والدتها صوت باب شقتهم فقالت على الفور :

- هروح اشوف مين .. شكله هو

خرجت والدتها لتدخل على أثر هالة زوجة أخيها بابتسامة عريضة هاتفة بطريقة طفولية:

- يالا بسرعة يا حياء العريس جه

قلدتها حياء بشكل ساخر قائلة:

- والله.. هيه هيه العريس جه جه

قطبت هالة حاجبيها وكتفت ذراعيها فوق صدرها وهى ناظرة إلى حياء بمكر قائلة:

- جبتيه مين ده يابنتى ده قمر

ثبتت حياء حاجبها فى المرأة وهى تقول بجدية ساخرة:

- بصى روى الميدان لفى شمال فى يمين هتلاقى محل أخضر فى احمر أدخلى هتلاقى منه حوالى

اتنين تلاتة خدى واحد منهم قبل ما يخلص

أجابتها هالة ببطء وهى تتأفف من طريقة حياء الساخرة :

- انت بتقولى فيها ..ده صحيح مبقتاش نشوف رجالة كدة الأيام دى

- طب كويس أبقى فكرينى أقول لجوزك الكلمتين دول لما اشوفه

انتفضت هالة مدافعة:

- انا بهزر .. أنت هتقوليلوا بجد ولا ايه

رفعت حياء حاجبها وهى تقول بتهديد ساخر:

- خلصى يا هالة روى شوفى هيشرب ايه بدل ما حماتك قايمة قاعدة كدة

- دى ماما عاملة حلويات النهاردة مخصوص علشانه

- وماله خاليه يتغذا علشان اللى هيحصله

قالت هالة بتساؤل :

- أيه اللى هيحصله ؟

قالت حياء بلا مبالاة:

- لا متاخدش فى بالك .. لما يخلصوا كلام وسلامات وطيبات أبقى قوليلى

أنصرفت هالة إلى المطبخ بينما خرجت هى من غرفتها واقتربت ببطء من باب الغرفة التى يجلسون

بها لتستمع إلى بعض مما يدور بينهم من حديث ووالدتها بالداخل تقدم له الحلوى التى صنعتها.

- والله ده كتير يا أمى تعبتى نفسك ليه

- تعبك راحة يابنى كل بقى متكسفش أيدي

- هو انا أقدر يا أمى ده انت الخير والبركة

زمت حياء شفيتها وهى تتمتم بداخلها " آه يا منافق " ثم أرهفت سمعها لتستمع له وهو يقول

لوالدها:

- بقولك ايه يا عمى انا مش عاوز اطول فى الموضوع ..عاوز مفيش لخطوبة .. نكتب الكتاب على

طول بعد أذنك

قال والدها بود:

- أیه یا بنی انت مستعجل كده لیه مش لما العروسة تقول كلمتها الاول

- البركه فيك بقى يا عمى تقنعها

- والله يا بنى انا ممكن اغصب على ولادى فى أى حاجة إلا الجواز

خرجت والدتها من الغرفة فوجدتها تقف عند بابها تستمع إليهم فقالت لها بهمس :

- أبوكى فاكرك مكسوفة ميعرفش أنك بجحة

همست لها حياء فى أذنها ممازحة:

- لو قولتلى أسم الجامع اللى لقتينى عنده والله مش هزعل خالص واروح اقعد عنده تانى لحد ما

آلقى أمى الحقيقية .. أنا مش عارفة عبد الحليم حافظ زعل وأتأثر ليه لما عماد حمدى قاله أنا مش

ابوك

دفعتها والدتها للداخل وهى تقول بخفوت:

- طب خشى بقى يا أموره لما نشوف لماضتك دى قدام ابوكى

طرقت حياء الباب ودخلت وهى تقول بأدب :

- السلام عليكم

نهض سامح من فوره ومد يده ليصافحها ثم تذكر أنها لا لن تفعل فترددت يده قليلاً ثم أعادها إلى

جانبه مرة أخرى وهو يرد السلام فنظر لها والدها بتوعد خفى وهو يقول ببطء تشم منه رائحة الأمر :

- ما تسلمى.. مكسوفة ولا ايه

أطرقت وهى تقول بنفس النبرة الهادئة :

- معلىش يا بابا أصلى مبسلمش على رجالة زى ما حضرتك عارف

تأفف والدها وهى ينظر إليها باستنكار وهو يقول باستهزاء:

- بطلى بقى جهل وتشدد

جلست بهدوء وكأنها لم تسمع شىء فقال سامح بإحراج:

- ازيك يا أنسة حياء عاملة ايه؟

- الحمد لله

تنحنح وهو يقول بحرج أبلغ:

- باباكى قالى انك عاوزة تسألينى على حاجات معينة .. أتفضلنى

رفعت رأسها والتفتت إليه وقد نوت أن تنفذ فيه أحداث فيلم أمير الانتقام حرفياً وقالت بجدية :

- حضرتك بتصلنى؟

- اه الحمد لله بصلنى

- فى المسجد؟

أزرد ريقه وهو يجيب بتردد:

- لا .. لما بكون فى الشغل بصلنى هناك ولو كنت فى البيت بصلنى فى البيت

اومات برأسها غير عابئة وهى تراه بدأ يفرك يده بتوتر متوقفاً ما تنوى فعله به وقالت:

- حافظ قرآن قد ايه؟

قال بتعثر:

- يعنى.. الصور الصغيرة..

رفعت حاجبها وهى ترى احمرار وجهه قائلة بتصحيح:

- أسمها صور قصيرة

تدخل والدها عندما لاحظ العرق الذى بدأ يتجمع على جبين سامح قائلاً لها باستنكار:

- أيه الأسئلة دى .. هو جاى يتجوز ولا داخل الأزهر

تدخل سامح قائلاً بتوتر:

- سبها ياعمى تسأل براحتها  
باغته حياء بسؤالها التالى قائلة:  
- حضرتك تعرف اسم مرادونا بالكامل؟  
نظر لها والدها بدهشة بينما ابتسم سامح متعجباً وقال بثقة:  
- اه طبعا ..

وانتظرتة حتى انتهى من سرد اسم مرادونا بالكامل ثم باغته قائلة:  
- ممتاز.. تعرف بقى أسم النبى عليه الصلاة والسلام بالكامل  
فوجيء بالسؤال فقال على الفور:  
- ايه .. اه طبعا اسمه محمد بن عبد الله  
- بس؟

تعثر سامح ومسح عرقاً وهميا وهو يسمعها تقول وكأنها تؤدبه :  
- مينفعش يا أستاذ سامح نعرف أسامى لاعبين الكورة بالكامل ومنعرفش أسم نبينا.. ولا ايه؟  
وهنا أنتفض والدها الذى كانت قد نفذت طاقة التحمل لديه ونهض قائلاً بعصبية :  
- انا هقوم بدل ما دمي يتحرق اكثر  
وبعد أنصراف والدها حانقاً نظر سامح إليها معاتباً وهو يقول بخفوت:  
- بتحرجيني كده ليه؟  
قالت بجدية :

- أنا مش بجرجك.. أنت جاي عاوز تتجوزنى وأنا أى حد بيجى يتقدم لى بسأله الأسئلة دى .. مش  
ذنبى بقى أنك مش مذاكر  
قال وعينيه متعلقة بوجهها الراض له :  
- بس ده ظلم .. أنت عارفة أنى لسه فى البداية ..  
نظرت إليه وقالت :

- أنا أسفة يا سامح.. كل اللى بيحصل ده تمثيلية مالهاش لازمة.. أنت وأنا عارفين أنه مينفعش .. أنت  
ليك حياتك وأنا ليه حياتى .. بعد أدنك يا سامح أحترم رغبتى ومتخاليش أهلى يضغطوا عليا أكثر من  
كده  
قال بتصميم:

- بس انا مش هياس .. انا مبعرفش اليأس  
نهضت على الفور وهى تقول :  
- ياريت متياسش فعلا من نفسك وتحاول تتغير فعلا.. بس علشانك أنت

أنهت حياء المقابلة وبعد انصراف سامح أعلنت رفضها بقوة وحدث فى بيتها حروب طاحنة لأقناعها ،  
مرة بالترغيب ومرة بالترهيب ومرة بحرمانها من الخروج نهائياً ولكنها لم تتراجع وظلت ترفض  
بشكل قاطع دون أن تشير لسبب رفضها الحقيقي حتى لا تزج بي فى الموضوع فتسوء سمعتى لديهم  
وفى النهاية اضطر والدها إلى الأتصال بسامح والأعتذار له عن غباء ابنته ورفضها للزواج منه .

\*\*\*

لم يمر وقت طويل على صفة سامح لى بطلبه الزواج من حياء صديقتى حتى صُفعت مرة أخرى عندما  
استقيظت فزعة من نومى على صوت صرخة والدتى التى شقت سكون الليل ، لقد مات أبى ، مات؟! ،  
وهل كان حيا! ، حاولت ان أظهر الحزن على وفاته أمام الناس ، حاولت أن أبكى ، قلت لنفسي لقد  
أصبحت يتيمة لابد وأن تبكى الآن ، ولكن دون جدى ، جاهدت لأشعر بغيابه .. فهل كان حاضراً من  
البداية .. لا



مر أسبوعاً كاملاً على وفاته وبدأ أخى طارق يأخذ سلطته ويتقلد شئون ملكه الجديد فى منزلنا وأتى هو وزوجته واحتلا غرفة أبى وانتقلت أمى لتقطن بغرفتى بسكون وكان أمر طردها من غرفتها أمراً عادياً كانت تتوقعه ، كنت سأذهب إلى منزل هشام فأنا لا أطيق الحياة معهم لولا خوفاً على أمى التى ظهرت عليها الشيخوخة وزادت سنوات عمرها دفعة واحدة وانحنى ظهرها قليلاً وقد اكتفى من أعباء الزمن ، وقد أكتفى من موت زوج قاسى لىأتى بعده خليفة أقى ، تراجعت عن فكرتى تلك وبقيت بجوارها ولكنى لم ابق وحيدة تماماً ، فلقد كان أدهم يأتينى يومياً ليطمئن على أحوالى ويسألنى عن ما أحتاجه وهو يؤكد على أننى أصبحت زوجته ومسؤلة منه بشكل كامل ، ولكن مشاعرى نحوه ظلت محايدة ، لا أحبه ولا أكرهه ، متخبطة بين الماضى والحاضر وكأننى أطفو ولا أشعر باتزان حقيقى يعيدنى إلى أرض الواقع، كنت فى دنياي الخاصة ولا أعلم شىء عن الضغوط التى تتعرض لها حياء وبالطبع لم اعلم وقتها عن المكالمة التى جانتها من صديقتها نهلة فى صباح أحد الأيام تطلب منها الحضور للجامعة لأمر هام لا يحتمل التأجيل ، رفضت حياء متعلقة بانشغالها فلقد كانت فاترة عن أى عمل جماعى فى ذلك الوقت ولكن نهلة أصرت عليها الحضور وعندما ذهبت وجدت أحمد زوج نهلة ينتظرها هناك معها وكأنه كمين ! .

أقبلت نهلة نحوها وقبلتها بينما رحب بها زوجها ولقد كانت مفاجأة لم تتوقعها حياء أبداً عندما بادر أحمد قائلاً:

- أنسة حياء طبعاً أنا آسف جداً أنى بتدخل فى أمورك الخاصة لكن غضب عنى .. الأستاذ سامح لجالى علشان أتوسطله عندك أنا ونهلة واحاول اقتعك تديله فرصة نظرت له حياء ببلاهة غير مصدقة وتعثرت الكلمات على شفيتها قليلاً قبل أن تقول بدهشة:  
- هو حضرتك تعرفه منين ؟

- أنت ناسية أنه شافنى معاكى أنا ونهلة يوم ما جالك هنا .. ومن المقابلة دى عرف أنك تهمنى .. ده كمان كان فاكراً أنك قريبة نهلة علشان كده فكر فىا .. وقالى أنه معملش كده غير لما السكك كلها أتقفلت فى وشه

زفرت حياء بقوة وقد شعرت باختناق شديد ، فهو يحيط بها من كل اتجاه دائماً لا يسمح لها بالتنفس وقالت بضيق:

- لو سمحت يا دكتور الموضوع ده أتقفل .. حضرتك يمكن متعرفش التفاصيل كلها قال بثقة:

- أنا مش هتناقش كثير ولا هحكى فى تفاصيل بس عاوز أقولك أنه لما جالى حكالى على كل التفاصيل وهو مش عاوز منك حاجة غير أنك تسمعيه مرة واحدة بس

تدخلت نهلة قائلة بحماس:

- بجد هو شكله فعلاً مش هيتنازل ومصمم يتكلم معاكى .. أنت مش بتديله فرصة خالص يا حياء .. يا ستى اقعدى معاه مرة واحدة واسمعيه وبعدين ابقى ارفضيه لو عايزة .. بطلى بقى دماغك الناشفة دى عقدت حياء ذراعها فوق صدرها وأشاحت بوجهها بعبوس فقال أحمد معاتباً:

- لازم تعرفى أنى مش هقبل عليكى اللى مقبلوش على أختى .. وانا لو مكنتش لمست فيه الصديق والأصرار مكنتش دخلت نفسى فى حكاية زى دى .. ولا كنت هعرضك لموقف زى ده وأسألى نهلة قالت نهلة مؤكدة:

- بجد والله كلامه صح .. هو قال مش عاوز غير أتكلم معاها وجها لوجه مرة واحدة ولو مصدقتنيش هختفى من حياتها نهائى

ثم استدركت سريعاً:

- أنت هتيجى معانا نادى النقابة ورجلنا هتبقى على رجلك مش هتبقى لوحك

نظرت حياء إلى طريقة نهلة الحماسية هي وزوجها في الحديث فحاولت أن تضع شرطاً تعجيزياً لعلهما يتراجعا وقالت:  
- طيب ماشى بس على شرط أنتوا هتبقوا المسؤولين قدامى دلوقتى أنه يختفى من حياتى تماما بعد المقابلة دى  
فاجأها أحمد وهو يقول بثقة:  
- أتفتنا

\*\*\*\*

( ١٨ )

وصلت حياء لنادى النقابة فى الميعاد المسبق تحديده وهاتفت نهلة التى خرجت لاستقبالها على البوابة ، من أول خطوة على سلم النادى شاهدت سامح والدكتور أحمد يجلسان على طاولة بجوار السور المطل على النيل ويتمازحان ويضحكا سوياً كأنهما صديقان منذ زمن بينما همست لها نهلة مشاكسة:  
- أنا مكنتش أعرف أنك جامدة كده ، الراجل أول ما عرف أنك وصلتى مبقاش على بعضه قالت حياء ساخرة وهي تقلد طريقة نهلة المشاكسة:  
- مابقاش على بعضه أراى ما هو حته واحدة أهو يا كذابة ضحكت نهلة بخفوت وهما يقتربا من الطاولة ، نهض أحمد بابتسامة وتبعه سامح بتوتر قلق وقال الأول بفخر:  
- أيه المواعيد المظبوطة دى ، أتفضلى

أقلت السلام على الجميع ولاحظت أن أحمد يمسك بيد نهلة وهو يستدير نحوهما قائلاً:

- طيب يا جماعة أحنأ على التراييزة اللى جمبكوا دى

أستوقفته حياء وهى تقول بتصميم :

- آيه ده يا دكتور أحنأ متفتناش على كدة .. خالىكوا معانا هنا

قال أحمد بجدية وحسم:

- كده مش هيعرف يتكلم على راحته.. وبعدين التراييزة أهى وراكى على طول

وافقت حياء على مضض ولكنها أشرتطت بعند أن يجلسوا على طاولة موقعها لا يطل على النيل

،وعندما جلسا تكلم بعد لحظات قائلاً:

- تحبى تشربى آيه؟

قالت بانفعال:

- أنا مش جاية أشرب .. أفضل قول آيه الحاجة المهمة أوى كده اللى خالتك تلف اللفة دى كلها

علشان توصلى

قال سامح بجدية:

- بلاش النبرة اللى كلها قسوه دى .. خلى بينا ولو نقطة تفاهم واحدة

- أحنأ مفيش بينا ولا نقطة تفاهم وأنت عارف كده

رفع حاجبيه قائلاً بهدوء:

- ولا حتى نقطة ثقة؟.. أنا صحيح معرفتكيش من مدة طويلة بس المدة الصغيرة دى عرفت فيها أنت

أمتى بتتقى فى الناس وأنا متأكد أنك بتتقى فىا

ثم تابع مردفاً :

- على فكرة أنت تعبتينى أوى من ساعة ما شوفتك .. أنت متعبة بجد .. عارفة أنا عملت آيه علشان

أعرف أوصل للدكتور أحمد وأعرف أقنعه ؟

قالت ساخرة:

- أنت هاتقولى.. ما أنا عارفة لما بتحط حد فى دماغك آيه اللى بيحصل ..ومنى صاحبتى أكبر دليل على

كده ..البنت المسكينه كانت فىن وأنت خلتها فىن

قال معاتباً:

- وأنا جاى النهاردة علشان كده .. علشان أثبتك أن القديم أنتهى

- مش فاهمه وضح

مال للأمام فى مواجهتها وأتكأ على مرفقيه مستنداً إلى حافة الطاولة وقال ببطء:

- هحكلك على حاجات تثبتك أنى أغيرت من بعد أول مرة شوفتيني فيها

أنصتت إليه وهو يقص عليها كل ما دار بينه وبين أخته سماح وكيف قامت سماح بتهيأت الجو

بافتعالها المرض حتى يستطيع هو أن يأخذنى معه لمنزلهم وكيف فشلت الخطة عندما رفضت حياء أن

أذهب معه وأنه فكر بعد هذه المرة جدياً أن يقطع علاقته بي نهائياً إلا أنه كان بحاجة للقائى مرة

واحدة فقط ليعرف منى معلومات أكثر عن حياء بشكل غير مباشر، الدهشة والفرع كانا عنوان ملامح

وجهها وهى تستمع له وما يقوله عن حقارة أخته التى رأت نبذة عنها يوم أن انقذتنى معه من شقة

محمد وتأكدت أنها لم تكن المرة الأولى التى تحاول فيها سماح إيدانى بتلك الطريقة.

قرأ سماح ما يدور فى ذهنها ورُسم على قسامت وجهها فقال بتمهل :

- متستغربيش أوى كده .. سماح زمان لما كنت بنجح فى المدرسة وبجيب مجموع عالى كانت

بتقطع على الشهادة بغيره مالهاش أى مبرر .. هى كده طول عمرها بتغيير من أى حد أحسن منها وبببقى

عندها رغبة أنها تأذيه وخصوصاً أن محمد حسسها بكده وقالها بصراحة أن منى أحسن منها

قالت حياء على الفور:

- عرفت ازأى

أجاب بابتسامة منكسرة :

- ماهو أنت متعرفيش اللي حصل بعد اليوم المشؤم وبعد ما فوقت من صدمتى فى أختى وصاحبى دورت عليه وجبته من تحت الارض .. كان صاحبى بقى وعارف لما بيعوز يستخبي بيروح فين قالت بقلق:

- عملت فيه ولا فيها حاجة ؟

لمعت عينيه بابتسامة أمل مفسراً قلقها بطريقة خاطئة وقال:

- متخافيش .. انا كان كل همى أنى أخاليه يسترها وأجبرته انه يكتب عليها رسمى أصله كان كتبها ورقة عرفى

- أجبرته ازاي يعنى

- ماهى دى بقى فائدة ان اللي يغدر بيكى يبقى صاحبك أوى .. بتبقى عارفة عنه كل حاجة .. وعارفة ازاي تلوى دراعه .. طبعا محدش فى بيتنا يعرف حاجة .. وخاليته يجى يستعجل معاد الجواز بنفسه وبعد فترة بسيطة كده عملوا تمثيليه انهم مش طايقين بعض وطلقها .. انا كنت متأكد انه مش هيسيبها على ذمته كتير وطبعا انا مستبهاش غير لما حكنتلى كل حاجة .. من ساعة ما محمد قالها كلمتين خالها تحقد على منى .. لحد ما أخذت منى معاها الشقة .. وحضرتك روحتى معاهم بقلقك المعهود على كل الناس اللي حواليكى وعلى فكرة هى أكدتلى ان محمد ملمسهاش ولا لحق حتى يشوفها قالت وقد أحتل صوتها نبرة متوترة لتذكرها ما حدث وما مرت به فى ذلك اليوم:

- أنا أتأكدت بنفسى من كدة ومرتاحتش غير لما الدكتور طمنتنى وتابعت قائلة بحنق:

- وبعدين انا مش فى طبيعى الفلق على اللي حواليا زى ما انت فاكتر .. انا كنت قلقانة على منى بس علشان صاحبتى

قال بابتسامة ثقة:

- مش حقيقى .. وأكبر دليل على كدة أنك أنقذتى سماح من أيدى بكل جهدك ومسبتيهاش بعدها معايا فى الشقة لوحدها وخفتى عليها .. وبدليل كمان انك كنتى مترددة تمشى وتسببنى فى الحالة اللي كنت فيها ساعتها .. وبدليل كمان أنك جيتى النهاردة علشان تريحي ضميرك من ناحيتى...صح؟

أرسلت تنهيدة طويلة تخرج بها ما يعتمل بصدرها من ألم تلك اللحظات وقالت:

- عموما اللي حصل ده أكبر درس ليك وليها .. محدش بيتعلم ببلاش والحمد لله انك أتصرفت بحكمة وعرفت تلم الموضوع من غير ما أهلك يحسوا بحاجة

قال وكأنه أستعاد زمام المبادرة فى يديه:

- أنا كنت مضطر أحكيلك الكلام ده عن أختى .. أولاً لأنى عارف أنت شايفها ازاي وكلامى مكنش هيفرق كتير .. ثانيا علشان أثبتلك أنى أتغيرت وبحط أسرارى بين أيديكى علشان تتأكدى .. شوفتى بقى ان مكنش هيفرق اننا نقعد على الترايبزة اللي على النيل ولا لاء .. كده ولا كده القاعدة مكنتش هتبقى رومانسية

ثم تابع بنبرة حماسية شغوفة :

- لكن لو وافقتى على الجواز هتشوفى الرومانسية اللي بجد .. هتشوفى سماح لما بيحب بجد بيبقى ازاي ..

ها قولتى أية؟ وأرجوكى متقوليش لاء !

صمتت قليلا ثم قالت بهدوء:

- ممكن أجابوك عليك بسؤال .. لو انا مش موجودة فى الصورة ومنى جات قالتلك انها عرفت أن علاقتكم من الأول كانت غلط وانها ثابتت وبقت حاجة تانية .. هتصدقها وتثق فيها وتتجوزها؟ عقد بين حاجبية وهو يقول ببطء وتفكير:

- بصراحة يمكن أصدقها بس هخاف أتجوزها

ثم تابع مستدركا أضاءت نقطة بعقله :

- أنا عارف أنت سألتى السؤال ده ليه .. بس انا حاجة ومنى حاجة

- تقصد يعنى أنك راجل وهى بنت؟

قال وكأنما يقر واقعاً:

- مش كده وبس .. دى واحدة هديها أسمى وشرفى يعنى لازم أبقي متأكد أنها هتصونهم

- بس أنت متأكد أنك أول واحد فى حياتها

- بس مش هبقى متأكد أنى آخر واحد .. اللى تفرط مرة تفرط ألف مرة .. وبعدين الراجل مختلف عن

البنت .. مفيش مقارنة

لوحث بيدها وهى تقول متعجبة:

- غريبة أوى يعنى البنت اللى تغلط مرة واحدة فى حياتها مع واحد بتحبه حقيقى تبقى منبوذة ..

والراجل ده نفسه هو اللى يبقى مش واثق فيها .. لكن الراجل اللى هو أصلاً كان السبب واللى ياما

غلط يبقى عادى لازم نصدقه ونوافق عليه .. مش شايف ان المنطق ده غريب أوى

أنفعل هاتفاً وهو يعود بظهره للخلف :

- أنت بتتلككى علشان ترفضى .. دى مش نقاش .. أنت أصلاً مش قادرة تبصلى وأنت بطلعى أسباب

مش منطقية للرفض

نظر حوله فوجد أحمد ونهلة ينظران إليه وبعض من رواد النادي على طاولة قريبة فشعر بالأحراج

وعاد يميل للأمام مجدداً مطرقاً يوبخ نفسه دون ان يدرى أنها ابتسمت لتصرفاته الطفولية تلك وهى

تسمعه يعتذر بخفوت لا يخلو من الانفعال المكتوم:

- انا أسف خرجت عن شعورى .. بس انا عاوز أقولك أن منى مكنتش صغيرة ولا أنا ضربتها على

أيديها وأنا مكنش قصدى .. هى جات كده معايا .. أفهميني .. شاب زىي لما بنت تقعد تضحك وتهزر معاه

من غير مناسبة هيعمل أياه .. لما توافق تركب معاه عربية بعد ما عرفت أسمه بساعتين هيعمل ايه غير

انه هيفتكرها سهلة .. وبما انها بقى حكتك كل التفاصيل وحضرتك حفظتى كل كلامى .. أفتكرى لما

قعدت معاه فى البلكونة لوحدنا ومسكت ايديها وقربت منها .. كل اللى هى عملته انها اتكسفت ..

حتى لما حاولت تقوم ومنعتها قعدت بسهولة .. أنا كنت مستنى منها تصرف شديد لكن محصلش ..

ويمكن هو ده اللى نرفزنى لما سماح دخلت علينا .. أنا عارف انك هتغلطيني عارفة ليه .. علشان عمرك

ما هتحمسى بمشاعر الراجل فى الوقت ده .. حتى لو كنت قديس واتساهلت معايا كدة كنت برضه هقول

عليها سهلة ومينفعش أنتمنها على بيتى

قالت حياء بشكل قاطع وقد تغير وجهها لحديثه عني بهذا الشكل :

- وانا كمان يا سماح عاوزة راجل أنتمنه عليا وعلى ولادى .. عاوزة راجل زى ما هو واثق فيا وانا فى

بيته أبقي انا كمان واثقة فيه وهو برة البيت .. راجل بيغض البصر وبيتقى الله فى بنات الناس حتى لو

البنات دى سهلة زى ما بتقول .. علشان يربى ابنه على كده لو شافه بيبص لواحدة مهما كانت مين

الواحدة دى وبتعمل أياه .. عاوزة راجل حبنى وعاوز يتجوزنى علشان بيدور على واحدة ملتزمة تكمله

ويكملها .. حلمها هو حلمه .. الجنة .. مش مجرد عاوز واحدة محترمة صدته ورخمت عليه فقال بس

هى دى ..

انت حلمك غير حلمى .. انا عاوزة فرح أسلامى لا فيه رقص ولا اختلاط .. أنا عاوزة راجل من اهدافه

أن ولاده يبقى منهم صلاح الدين ومحمد الفاتح .. أنت كل حلمك انك تحب وتتحب وتعيش فى تبات

ونبات وتخلف صبيان وبنات .. الموضوع مش موضوع انى مصداقك ولا لاء ولا بحبك ولا لاء

.. الموضوع أكبر من كده بكثير .. مثلاً أنا أتمنى ألبس النقاب اللى مش عارفه ألبسه بسبب رفض أهلى

لكن انت هتقولى الدين مش مظهر .. وانت مش عارف ان المظهر هو اللى بيحافظ على الجوهر .. زى

الموزة لما تشيل قشرتها بتبوظ وتسود ومينفعش تاكلها .. مظهرها هو اللي بيحافظ عليها .. فهمتنى ؟

فرك كفيه بعصبية واضحة فى حركاته وقال:

- كده وصلتنا لطريق مسدود ، انا عادى خاليكى عاديه زيي مطت شفيتها بأسف وهى تقول :

- هى دى الحياة اللي بتمناها يا سامح واللى مش هلاقيها معاك .. أنت رفضت منى علشان خرجت معاك كام مرة .. لكن انا برفضك علشان كل حياتى اللي جاية أعيشها صح .. أربى ولادى صح .. أختار زوجى على أساس ثابت مش هيتغير .. مش على أساس الرومانسية اللي بتتغير وتقل بعد الجواز لما الراجل يشبع من الست .. ويمكن الأساس ده هو اللي أحر ارتباطى لحد دلوقتى لأنى لسه ملقتهوش قال وهو يحاول السيطرة على أنفعالاته:

- متكريش ان مشاعرك أتحركت ناحيتى ومش هتعرفى تنسينى ومش هتلاقى حد يحبك قدى قالت بثقة:

- غلطان ، وأنا متأكدة أن من ترك شيئا لله عوضه الله خيرا منه

وأنا رفضتك لله يا سامح ومتأكدة ان ربنا هيعوضنى الأحسن واللى هيحبنى أكثر منك مليون مرة وفى الحال

قال بوجوم:

مكنتش أعرف ان احلامك كبيرة أوى كده مكنتش اعرف ان دماغك فيها كل ده للمستقبل كنت فاكرك مجرد بنت محترمة وخلص .. أوعدك أحققلك رغبتك و مبصش لواحدة غيرك ولوحكاية الفرح الاسلامى ده مهمة أوى كده ممكن نعمل فرحين واحد لأهلك وواحد لأهلى وهسيبك تربى ولادك على طريقتك

قالت بابتسامة متفهمة:

- يبقى انت لسه مفهمتنيش .. لازم تبقى رغبتنا أحنا الاتنين مش رغبتى لوحدى .. ولازم دماغ الاب تبقى زى دماغ الأم وطريقتهم تبقى واحدة وإلا عمرنا ما هنتفق أبداً وهيبقى جواز فاشل ثم أعتدلت فى جلستها وقالت منهية حديثها:

- انا خلصت كلامى ويارب تكون اقتنعت .. وياريت توفى بوعدك وتختفى فعلا من حياتى .. وبالمناسبة منى خلاص أتجوزت فياريت تختفى من حياتها هى كمان .. لو ليها عندك أى حاجة .. رقم .. إيميل .. صورة ياريت تتخلص منها

زم شفتيه بعدم رضا وهو يقول بضيق:

- من غير ما تقولى .. بمجرد ما سبتها عملت كده .. علشان تعرفى انى راجل بجد مش واحد صايع زى ما انت فاكرة

ابتسمت لطريقته الطفولية حتى فى حنقه وقالت بود:

- لو مكنتش واثقة أنك راجل بجد مكنتش جيت النهاردة .. أنت كويس يا سامح بس محتاج تغير حياتك .. الراجل اللي قتل ٩٩ نفس وكم لهم ١٠٠ بالعابد اللي قتله ، العالم نصحه انه يسبب أرضه اللي هو فيها لانها أرض فسق .. فلو انت حسيت انك مش عارف تتغير فى مكانك غيره .. شوف مكان تانى فيه صحبة سالحة تعينك وتقويك على نفسك

نهضت فجأة دون مقدمات فنهض بدوره وكأنه يحاول منعها وهو ينظر إليها محاولاً استخدام جميع أسلحته الجذابة كامل أخير وهو يقول بطريقته الخاصة التى يدرك جيداً تأثيرها على الفتيات :

- طيب مينفعش انت تبقى الصحبة السالحة .. هه ؟

ضحكت وهى تستدير لتغادروها تهز رأسها بتعجب وكأنها قد قرأت أفكاره قائلة :

- يموت الزمار وصوابعه بتلعب

عادت حياء منهكة ذهنياً وجسدياً من لقائهما مع سامح وكلها أمل وشوق لنوم عميق تستعيد فيه قوتها وطاقتها من جديد لتواجه الضغوط الى لم تنطفأ بعد ببيتها على أثر رفضها للزواج من سامح والمعاملة السيئة التي باتت تلقاها من والدها والكلمات الهامسة من من زوجات أخوتها بأنها تأخرت فى الزواج وأصبحت على مشارف العنوسة ومازالت تتدلل وترفض الخطاب لأسباب واهية ، بل وبعض الهمسات الشريرة التي تتهمها بشكل غير معلى بتعلق قلبها بأحدهم لذلك ترفض الزواج متعلقة بانتظارها للزوج الملتزم ، ولكن املها ذهب أدراج الرياح عندما وجدتني انتظرها فى منزلها وعلى وجهي تجمعت علامات البؤس الواضحة والضياع ، رغم ذلك لم تغلق باب صبرها بوجهي وأخذتني إلى غرفتها لتسمع مني وتخفف عنى كما كانت تظن إلا أنها تفاجأت بي أصدمها قائلة:

- فرحى بعد ثلاث شهور

أتسعت حدقاتها وهى تقول بعدم تصديق:

- أزاى.. مش كنتوا متفقين بعد تخلصي الجامعة؟

قصصت عليها ما دار فى بيتنا بالأمس وأن طارق أخى قد صمم على تقديم موعد زفانى لأسباب غير منطقية ومنها زيارات أدهم لنا وزوجته بالمنزل معنا برغم من أن زوجته لا تخرج أصلاً من غرفة أبى رحمه الله والتي أصبحت غرفتها وقت زيارة أدهم الأسبوعية والتي أصبحت شحيحة بناءً على طلبى له مدعية أن حالتى النفسية تتطلب العزلة وصمتى الدائم فى وجوده أنبأه بذلك فيكتفى بالاتصالات الهاتفية فقط ، ولكن طارق لم يرضى ، إنه متعجل لإخراجى من البيت فينتقل نصيبى من معاش أبى إليه بصفته المتحكم بالبيت الآن ، ولكن الحقيقة أن هذا لم يزعج حياء كثيراً فهى كانت تعلم مدى سوء علاقتى بأخى طارق ولكن الذى أزعجها حقاً عندما قلت لها باستسلام:

- عارفة يا حياء لما رفضت حصل أليه؟.. أمى قالت قدام طارق أنها موافقانى ومش عاوزة حد يغصب عليا .. لكن لما دخلت علشان أنام لقيتها نائمة فى سريرها بتبكي بصمت ولما سألتها مالك قالتلى خايف أموت واسيبك معاهم لوحدك يتحكموا فيكى وهشام مسافر ومحدث هيعرف يحامى عنك .. ساعتها يا حياء الدنيا أتزلزلت من تحت رجلي وقعدت أفكر طول الليل .. لقيت أمى كلامها صح .. هشام هيسافر ويأخذ مراته معاه ولو أمى جرالها حاجة هبقى لوحدى معاهم قالت حياء بانفعال يحمل الحنان بين طياته :

- هو ربنا أداكى علمه .. حد عارف مين هيموت قبل مين.. وبعدين يا ستى حتى لو لقدر الله حصل حاجة محدش هيقدر يضايفك ولا يتحكم فيكى زى ما أنتِ فاكرة.. أنتِ مكتوب كتابك وتقدرى فى أى وقت تتفقى مع جوزك على الدخلة وفى كام يوم تبقى فى بيته.. لكن تستلمى لرغباتهم كده وتروحي تعيشى مع راجل لسه مش مستعدة نفسياً تعيشى معاه .. ده أنتِ كده يا بنتى حياتك تبقى جحيم تنفست بعمق وقلت بلا مبالاة وقد أصبحت كل الخيارات واحدة :

- أنا كرهت البيت ده وبقيت عاوزة أخرج منه بأى تمن .. وبعدين الكلام ده مش هيفيد دلوقتى .. أنا قولتلهم الصبح أنى موافقة.. وخلص طارق قام بالواجب وبلغ أدهم وأهله وانتهينا ربتت حياء على كتفى وهى تقول:

- لا يا منى انا مش معاكى انا مش عارفة أنتِ ضعيفة أوى كده ليه.. هتبدأى حياة جديدة كده ازاى سقطت دمة من عيني بدون شعور وأنا أسألها دون اهتمام حقيقي :

- صحيح عملتى أليه مع سامح.. حددتوا معاد الخطوبة ؟

كان ولا بد من قطع الشك باليقين فقالت حياء على الفور:

- أنا رفضته يا منى والموضوع أنتهى خلاص

قلت باندهاش:

- مش معقول ..ليه.. لو علشانى لا

مسحت على شعري قائلة بعطف وهى ترى الألم متجسد بعيناي :  
- صحيح يا منى أنت جزء من الرفض لكن فى أسباب كتير مش وقتها دلوقتي  
وجدت نفسي أقول باستخفاف مر:

- غريبة الدنيا دي .. أنا اتجوزت واحد محبوبش واللى بحبه راح يتجوز صاحبتى اللى رفضته علشانى  
أمسكتنى من مرفقاي وهزتنى بقوة ومرح واه وهى تهتف بابتسامة رسمتها على وجهها بجدارة :  
- بطلى أفلام الحرمان اللى أنت معيشة نفسك فيها دي .. أفرحى بقى يا عروسة أفرحى ده أنت  
هتعيشى مع راجل بيتمالك الرضى ترضى .

\*\*\*

أنغلت على نفسي أكثر وفقدت التواصل مع من حولي ولم أستجب للتواصل معهم إلا عندما بدأت  
تجهيزات الزفاف وقبل العرس بأسبوعاً واحد ، كان الجميع فى غاية البهجة والسرور والسيارات  
تسابق بعضها البعض وهم فى طريقهم لترتيب أثاث منزل الزوجية ولكن فجأة أنتفضت فى مقعدى  
وطريقاً معتاداً يلوح لي شيئاً فشيئاً وأنا أضع يدي على قلبي أهدء انتفاضاته المتوالية لوقت طويل وأنا  
أردد بداخلى أننى فى حلم بل فى كابوس مزعج شعرت بى حياء بعد وقت ليس بالقصير وانتبهت  
نحوى وأنا أعتدل فى مقعدى فى الخلف وأسأل أدهم الذى كان يقود بنا قائلة:

- هى الشقة فى المنطقة دة ؟

أجاب أدهم بحماس مشتعل:

- آه عجبتك؟

فقالت منال معقبة :

- أنا عارفة آيه اللى خالك تاخذ شقة بعيد كده

- מבحبش الزحمة يا منال بحب الأماكن الهادية ما انت عارفة

مالت حياء نحوى متسائلة بهمس وقد كانت تجلس فى المنتصف بينى وبين منال بعد أن لاحظت

توترى :

- مالك يا منى .. فى حاجة؟

أجبتها هامسة بقلب منقبض :

- دى نفس منطقة سماح ونفس المربع تقريبا

أبتلعت حياء ريقها بصعوبة وهى تنظر من النافذة بوجوم ومفكرة فى تلك المفارقة العجيبة .. ياترى ما

الحكمة منها؟! .. ثم ضغطت يدي برفق هامسة فى أذنى:

- ولا يهملك كبرى دماغك .

عندما دخلنا شقة أدهم الجديدة خالفت كل توقعاتى فلم أكن أعلم أنه يمتلك هذا الحس الراقى فى الألوان  
وتناسقها وتوزيع الأضواء بها وكأنه يعمل فى مجال الديكور منذ نعومة أظافره ، لقد كانت رقيقة  
للغاية وذات ألوان هادئة ، وبالأخص غرفة النوم التى أعطت أنطباع مشرق حالم كغرف الأميرات  
وبعد يوم مرهق من العمل فى تنظيف الشقة وترتيب الأثاث عدنا إلى المنزل لتهااتفنى حياء بعد دقائق  
وتبشرنى بخير سفرها المفاجيء بعد أيام لأداء مناسك العمرة كهدية لها من السماء وفى الوقت  
المناسب تماما فلقد كانت تحتاجها وبشدة ، سعدت لسعادتها بتلك المنحة الربانية وحمدت الله أنها  
مازال أمامها وقت كاف لحضور زفافي .



كنت أرتدى ثوب الزفاف الأبيض وقدمى لا تقوى على حملى ومعدتى تؤلمنى للغاية ووجهى به من الشحوب ما يجعل الناظر إلي يظن أننى مساقاة إلى ذبحى لا إلى زفافى ، وبمجرد أن جلست مستسلمة بين يدي المزيّنة فى غرفتى بدأت الدموع بالهطول حتى أنها صرخت بى عدة مرات أننى أفسد ما تصنع بوجهى بدموعى ولكننى فشلت فى التحكم فانفجرت فى البكاء .

تركت المزيّنة أدوات التجميل من يدها بعصبية وهى تهتف :

- أنا كده مش هعرف اشتغل .. كل شوية تبوظى المكياج

همهمت زوجة أختى طارق بكلمات جريئة عن سبب دموعى وهى تضحك وتضرب كفأ بكف بينما ربتت منال على كتفى مهدئة وأخذت بيدي برفق إلى جانب من الغرفة وهمست لى شارحة بأنه لا داعى للخوف وتابعت بضحكة خافتة:

- كل اللى بتسمعيه ده ومخوفك .. تهويل ستات مش أكثر

كانت كلماتها مقتضبة ولم تساهم فى محو خوفى ولو قليلاً ، وعندها دلفت والدتى للغرفة وشقت

بصعوبة ممر بين النساء لتصل لى أنا ومنال فى الغرفة الضيقة وضعت منال يدها على كتف والدتى وقال بخفوت وهى تميل نحو أذنها:

- إيه رأيك يا طنط نخرج الستات دى كلها بره وحضرتك تقعدى مع منى شوية تفهميها أصلها مرعوبة أوى .. ماما عملت معايا كده قبل فرحى بيومين

أشاحت والدتى برأسها بخجل وهى تقول على عجلة من أمرها :

- متعودتش اتكلم فى الحاجات دى يا بنتى .. يبقى جوزها يفهمها بقى .. المهم دلوقتى استعجلوا شوية فرقة البنات اللى أدهم باعتها وصلت برة

أنهت الجزء الأخير من عباراتها بصوت مرتفع موجهة حديثها للمزيّنة التى جذبتنى إلى المقعد مجدداً

وبدأت تعمل فوق وجهى مسرعة بخفة وإتقان وأنا مغمضة عيناى ومتمحلة ألم معدتى وارتعاش

أوصالى حتى انتهينا، دخلت حياء إلينا فرحة سعيدة تتمم على زينتى لتأخذنى للخارج وهناك جلست

أشاهد تلك الفقرات الغربية التى كانت تؤديها الفتيات أمامى مستخدمة الأطواق المزيّنة بالثل والورق

الملون والدقوف ، فى البداية كنت متعجبة مما يحدث ومن الأناشيد التى كن يرددنها ولكن بعد فترة

ليست بالقليلة بدأت أتفاعل معهن عندما جذبتنى أحدهن فى المنتصف لتدور وترقص بى مما جعلنى

أضحك فى البداية ورويداً رويداً بدأت أعتاد رقصاتهن الخاصة وأتمايل معهن بابتسامة وعندما تعبت

عدت جالسة مجدداً وقد كانت والدتى تجلس بجوارى وتصفق بحماس لـ حياء التى كانت مستمتعة

للعناية بفرقة الأخوات تلك كما أسمتها وعندما استدارت ووجدت والدتى تبكى بفرحة جاءت لتجلس

بجوارنا وهى تربت على ذراعها بعطف قائلة وهى تلتقط أنفاسها :

- مالك يا طنط بتعطى ليه .. متعطيش علشان خاطرى

- من فرحتى يا بنتى .. ده انا كنت بحلم باليوم ده .. وبدعى ربنا انى ما اموتش غير لما اشوف منى

عروسة بستان الفرح

ثم تابعت وهى تنظر إلى حياء قائلة بحنان:

- عقبالك يابنتي .. أمك عاوزة تفرح بيكي هي كمان .. شدى حيلك بقى  
عقدت حياء ذراعيها فوق صدرها وهي تقول مازحة بحزن مصطنع  
- والله يا طنط شداه على الآخر بس مش لاقية حد يشد من الناحية الثانية  
- خاليكي كده هزرى كل ما تيجى سيرة الجواز وما انتيش حاسة بامك  
هتفت حياء بدهشة :  
- أعمل أيه طيب.. وانا ذنبي أيه؟

قالت والدتي تعاتبها:  
- أمك قالتلى انك بترفضى العرسان .. ولسه رافضة واحد ميترفرض  
تغير وجهي قليلاً ولكنى ابتسمت ثانية عندما سمعتها تقول بدهشة مصطنعة:  
- أمتى ده.. أنا مش فاكرة ان فى حد أتقدملى من أيام الملك "قوم وأعد"  
ضربتها والدتي على ذراعها بغیظ قائلة:  
- هو انا هخلص منك .. أنا عارفه انك مش هتدينى عقاد نافع  
فركت حياء ذراعها وهي تتأوه بألم مصطنع وهي تقول:  
- كل ده علشان قولتلك متعيطيش .. طب انا غلطانة عيطي!

\*\*\*

أنتهى الزفاف بين مؤيد ومعارض للفرح الإسلامى كما يسمونه عندما سمعنا أبواق السيارات التى لم  
تتوقف لحظة واحدة منذ توقفها أسفل منزلنا ، جمعت شعري بمساعدة الفتيات وارتديت الوشاح  
الأبيض فوقه وغادرت بمصاحبة بعض من عائلتي إلى بيت الزوجية .  
وعندما وصلنا إلى هناك وغادرت أسرتي ، بقيت معه وحيدة بقلب وجل وأنفاس مكتومة ، وقف ينظر  
لي بابتسامة ثم تقدم نحوى ولثم جيبيني قائلاً:

- مبروك يا حبيبتي

شكرته بابتسامة مضطربة ودخلت غرفتي لأبدل ملابسي بمنامة قطنية مريحة كالتى أرديها فى بيت  
عائلتي وعندما انتهيت توجهت إلى أحد الغرف التى كان ينتظرنى فيها لنأكل سوياً كما طلب منى قبل  
دخول غرفتي منذ قليل ، بمجرد أن رأيي أرتفع حاجباه تلقائياً قائلاً بدهشة :  
- أيه ده.. بيجامة؟!  
- وحشة ؟

أجاب باضطراب وهو يبحث عن كلمات مناسبة:

- لا حلوة طبعاً.. بس يعنى فى حاجات أحلى

بدأت بتناول طعامى متظاهرة بعدم الفهم قائلة ببساطة:

- لا أصل مبعرفش انام غير كدة

تخطى أدهم دهشته وبدأ يرفع بعض اللقيمات لأطعمى فى فمى بتصميم ولم يرضخ لرفضى الخجل أبداً  
فتناولتها باستسلام متحاشية النظر إليه مباشرة

لاحظ أدهم التوتر الذى أشعر به والذى يظهر جلياً على وجهي وحركات جسدى متحاشية التقاء أعيننا  
حتى أنتيهنا من الطعام ، فقال بهدوء:

- أكيد تعبانة وعاوزة تنامى

فانتفضت قليلاً وتشبثت يداى بالطاولة متممة:

- لاء أنا هقعد هنا شوية.. نام انت فابتسم بتفهم ونهض واقفاً ، ظننته سيذهب لينام وحده كما قلت له ولكنه تناول كفي وجذبني برفق لأنهض وهو يقول :  
- تعالى عاوزة اتكلم معاكى شوية  
سحبني خلفه بهدوء كالأطفلة التي تذهب للمدرسة فى أول أيامها بصحبة والدها وأخذنى إلى حجرة استقبال الضيوف وجلس بالقرب مني وجعل ينظرلى لثوان يدرس ملامحى وأنا قلبى يدق من شدة الخوف والرهبة ثم وضع كفه بحنان على وجنتى وقال:  
- أنا عارف أنك خائفة وقلقانة .. وبصراحة معاكى حق .. وكمان عارف انك لسه مش متعودة عليا  
وبتسألنى نفسك مليون سؤال .. وانا الحقيقة كان عندى أمل تكونى عندك استعداد تتقبلينى أكثر من كده النهاردة .

ثم نظر إلى منامنتى القطنية مبتسماً وقال مداعباً:  
- لكن البيجامة دى قطعت الأمل ده خالص  
بدأ قلبى يهدأ قليلاً ودقاته تتحسن شيئاً فشيئاً واللون يعود لوجهى بالتدريج عندما ترك وجنتى وتناول كفى مرة أخرى وهو يقول :  
- أنا قولتلك قبل كدة .. أنا مش صغير ولا مراهق .. أنا عارف كويس ان تحديد معاد الدخلة مكنش على هواكى بعد ما كنتى مرتبة نفسك بعد سنتين .. تعرفى .. أنا كمان أتفاجأت بالمعاد وكنت هرفض رغم أن الشقة جاهزة زى ما شوفتى.. لكن أنا كنت عاوز السننتين دول علشان تعرفينى كويس وتتعودى عليا .. بس قولت خلاص على بركة الله ماهى ممكن تتعود عليا برضة وهى فى بيتى

تنفست بعمق وقلت بخفوت:

- اللي اعرفه ان الناس بتتعود على بعض الأول وبعدين تتجوز مش العكس  
قال بحسم منهيأ للحديث:  
- أعتبرى نفسك لسه مكتوب كتابك  
قلت غير مصدقة :

- يعنى أيه؟

نهض واقفاً وهو يقول:

- يعنى بصراحة كده مش هقدر ألمسك وأنت مبتحبينش ومرعوبة منى .. أنا مش حيوان .. أسترخي  
بقي كدة وخدى راحتك فى بيتك.. ماشى  
نظرت إليه ببلاهة محاولة استيعاب انسانيته فجذبني ثانية وهو يقول ببساطة أفزعتنى وأخرجتنى من أحلامى :

- يالا بقى ندخل أوضة النوم ؟

وقفت بفرع هاتفة بصوت مبجوح :

- ليه؟!!

ضحك بمشاعبة ففهمت بأنه كان يتعمد إخافتى ثم قال :

- متخافيش كده ... أصل أنا كان من أحلامى أنى أصلى بزوجتى ركعتين فى أوضة نومنا ليلة البناء ..  
وانا بقى مستعد أتازل عن كل حاجة إلا الركعتين دول .. يالا أدخلى أتوضى وحصلينى  
ثم تركنى وهو يتجه نحو غرفة النوم ويتابع بمزاح ضاحك:  
- ده أنا هاهرىكى قيام ليل !

صلى بى ركعتين وخفف وكان صوته ندياً للغاية فى تلاوة القرآن ، بعد الصلاة جلس يدعو وطلب منى

أن أؤمن على دعائه ففعلت وأنا أشعر بسمو روحى وطمأنينة وراحة لم أشعر بهم من قبل ، وخصيصاً عندما خضع صوته داعياً:

- " اللهم احفظ لى زوجتى وبارك لى فيها وإن كتبت علينا الفراق يوماً فاقبضنى إليك قبل هذا اليوم" وألتفت نحوى بجسده كله واضعاً كفه اليمنى على جبينى داعياً:

( اللهم إني أسألك من خيرها ومن خير ما جُبلت عليه وأعوذ بك من شرها ومن شر ما جُبلت عليه) وفجأة ضحك ضحكات عالية أدهشتنى وهو يقول :

- عارفة يا منى .. مرة واحد صاحبى نسى الدعاء ده وبعد ما حط أيده على جبين زوجته بقى مش عارف يقول أيه.. فقال " سبحان الذى سخر لنا هذا "

أختلطت ضحكاتى بضحكاته رغباً عنى لثوان حتى هدأنا فأمسك يدي بحنان وقبلها وقال :  
- تصبى على خير

خرج من الغرفة ومعه غطاء خفيف واستلقى على أريكة مريحة فأغلقت الباب جيداً وغرقت فى فراشى ذاهبة إلى سبات عميق ، لأستيقظ فى الصباح على طرقاته على باب الغرفة يتعجلنى للنهى إفطارنا قبل حضور المهنيين من أسرتينا ، سبقتى وأعد هو الإفطار بنفسه ، جلست بحرج شديد أستشعره وتناولت طعامى بخجل وصمت فتركنى حتى انتهيت بدأت فى رفع الأطباق فاستوقفنى قائلاً :

- لو سمحتى يا منى بعد كده متبقيش تقفلى الباب عليكى بالمفتاح وانتِ نائمة  
- ليه؟

- علشان بعد ما رجعت من صلاة الفجر فضلت اخبط عليكى وطبعا كنتى نائمة ومحستيش بيا  
أستدرت لأذهب إلى المطبخ وأنا أقول بتلقائية لم أنتبه لها :

- لو مقفلتش بالمفتاح مش هبقى مطمئة

قبض على مرفقى وجذبنى نحوه بغضب فكادت الأطباق أن تسقط من بين يداي وقد احتقن وجهه بشدة وهو يقول:

- أنتِ لازم تطمنى علشان انا وعدتك.. لكن لازم تعرفى كويس انى لو عايزك .. الباب والمفتاح بتوعك دول مش هيقفوا قدامى.

تجمدت مكاتى فأفلتتى ونهض غاضباً متوجهاً نحو النافذة ، أعتذلت فى وقفتى حانقة على كلماتى المندفعة وذهبت خلفه بحرج بالغ لأعتذر منه:

- أنا أسفة مكنش قصدى

أوما برأسه دون أن يلتفت قائلاً بجفاء:

- أدخلى البسى الناس على وصول .. ولا عاوزاهم يلاقوكى بالبيجامة

أبتلعت غصتى واستدرت منصرفة فسمعتة يقول بنفس النبرة:

- لو والدتك أو والدتى أو أى حد سألك على ليلة امبارح .. تردى عادى جدا .. مش عاوزهم يحسوا بحاجة .. خصوصياتنا لينا لوحدنا

تورد وجهى محتقناً وقلت بحرج هامس :

- أقولهم أية؟

أجاب بنفاد صبر:

- كل البنات لما بيتسألوا فى الحكاية دى بتتكسف ومش بتترد .. أعملى كده وخلص

ألمنى جفاؤه المفاجيء فأسرعت إلى غرفتى بخطوات تشبه الركد وبدلت ملابسى بانفعال وقد أوشكت على البكاء ، وضعت بعض المساحيق على وجهى لأظهر بمظهر العروس وأعددت البيت لزيارتهم ،

كانت زيارة قصيرة مليئة بالكلمات المستترة بين السطور تغطيها الضحكات والبهجة وعندما انفردت بى والدتى فعلت كما أمرنى وصمت بخجل ، بينما هو ينادينى أمامهم بحبيبتى ويجذبنى تحت ذراعه

بمرح ويلثم وجنتى بخفة ويتحدث عنى بحب كبير واهتمام أكبر مما جعل والدتى تنصرف وهى مطمئة

منشرحة الصدر وقد زال عنها هموم دنياها برويتها سعيدة وفي بيت زوجي كما كانت تحلم وتتمنى وتدعو دوماً.

وفي نهاية اليوم عادت إليه ضحكاته وشغبه مرة أخرى مما أعاد لأرجاء البيت المرح الذي افتقده صباحاً وجلس بجوارى قائلاً بحماسة المعتاد:

- أنا قررت أرجع شغلي بعد بكرة إن شاء الله .. علشان تبقى على راحتك فى البيت .. وخالى بالك انتِ كمان هترجعى الجامعة وهتبدأى محاضرات ومذاكرة من الأول كده.. ولا عاوزة تسقطى ويقولوا انا السبب !

ابتسمت متسائلة بدهشة:

- طب والناس فى الشغل هيقولوا ايه؟

بادلنى ابتسامتى وقال بثقة:

- محدش يقدر يكلمنى فى الحاجات الشخصية دى.. شكلك لسه متعرفيش جوزك كويس

لمعت عينيه بشغف عندما وجدنى أبتسم بإعجاب وعندما مال نحوى أيقنت بأنه سيقول جملة عاطفية لكنه همس قائلاً:

- هو بالنسبة للعشا أنا برضه اللي هحضره !؟

( ٢١ )

هل تنتقل عدوى الحماس من شخص لآخر ! ، هذا ما حدث لي بالضبط ، لقد أصابني حماسه أصابة بالغة وعكفت على دراستي منذ يومى لأول لانتظامي فى الجامعة وأكثر ما أسعدنى أننى لم أقابل سماح ولو مرة واحدة وقد أخبرتنى زميلة لنا أنها قدمت طلب تأجيل للعام القادم مما زاد فى شعورى بالراحة والثقة .

وفى أحد الأيام وأنا أعد طعام الغذاء هاتفنى أدهم ليخبرنى أسفاً بتأخره هذا اليوم فى العمل بسبب أمر طارىء وهو مضطر للبقاء لساعات إضافية ، أومات متممة وقد هاجمنى فتور مفاجيء وظللت أسرف وقتى فى التنقل بين قنوات التلفاز حتى جن الليل وأظلمت السماء فشعرت ببعض التوتر وأنا أسمع صوت نباح الكلاب يخترق النافذة وفجأة أنقطعت الكهرباء ! ، تسللت على ضوء شاشة هاتفى إلى النافذة أنظر من خلف زجاجها وأنا أحاول مجاهدة نفسى ألا أهاتفه حتى لا يتهمنى بالجبن وعندما سمعت صوت الباب يُفتح تجمدت مكاني رعباً حتى تسلل إلى أذنى صوته الدافىء ينادينى وعندها تأكدت بأنى كنت أحبس أنفاسي وشعرت بألم شديد بحلقى وهاجمنى الدوار ، تقدم نحوى على ضوء شاشة هاتفه وعندما اقترب لاحظ تصلبى وتشبثى بمقبض النافذة ، طوقنى بحنان وهو يقول معتذراً:

- أنا آسف يا حبيبتي معملتش حسابى خالص ان الكهرباء ممكن تقطع .. مفيش شمع فى البيت ولا كشاف سامحيني

ألتصقت به مرتجفة وعندما أمسك بيدي وجدها باردة بطريقة أثارت قلقه بشدة فزاد من تطويقه لي قائلاً:

- مكنتش اعرف انك بتخافى كده .. طب اهدى شوية .. أذكرى الله .. قولى حسبى الله لا إله إلا هو عليه توكلت وهو رب العرش العظيم

تمتت مكررة خلفه بنبرة مرتعشة ومتشبثة به فأخذنى إلى الأريكة وجلس بجوارى وظل يتلو آيات من القرآن بخفوت فاستندت برأسي إلى صدره وسقطت فى نوم عميق

فى صباح اليوم التالى أيقظنى وهو جالس على طرف الفراش وقال مبتسماً:

- صباح الخير

- صباح النور .. هو أيه اللي حصل امبارح؟

بدأ أدهم فى فعل حركاته المضحكة وهو يقول :

- ولا حاجة الكهرباء جات ولقيتك نمتى .. شلتك على السرير .. وقعدت ابصلك زى الأسد اللي بيبص

على الغزالة .. ها يا واد يا أدهم تاكلها منين .. تاكلها منين من هنا ولا من هنا .. وفى الآخر لقيت زازو

بيقولى عيب يا أدهم بلاش تبقى اسكار خالك طيب زى سمبا

كان يدغدغنى وكنت أضحك بقوة رغباً عنى وفى النهاية عندما اكتفى ، انقلب مزاحه إلى حماس وهو ينهض هاتفاً:

- يالا قومى بسرعة عاوزين ننزل نشترى طلبات رمضان اللي مالهاش لازمة دى .. ونجيب هدية حلوة

كده علشان ماما عزمانا عندها على الفطار أول يوم

\*\*\*

كان منزل عائلة أدهم مزدحماً للغاية فلقد كان إفطاراً جماعياً يضم عائلته وعائلتى وبعد تناول الإفطار

ذهب الرجال للصلاة بقيادة أدهم ، وبقينا نحن نرفع الأطباق وننظف ما بقى من آثار أطفال أخى طارق

، لم نشعر بالتعب وسط الضحكات والنكات ولم يعكر صفونا إلا زوجة طارق ببعض الكلمات التى نالت

مرة منى ومرة من منال بحديث للاذع عن تأخر حملها ، وقبل أن نعود إلى بيتنا دعا أدهم الجميع

للإفطار عندها يوم الجمعة ولذلك لم يستطع أحد أن يعتذر ، وحضرت العائلتين باكراً قبل صلاة الجمعة

مباشرة وساعدتنى النساء فى إعداد الطعام بينما جلس الرجال بصحبة أدهم.

وبعد صلاة العشاء والترأويح فى المسجد غادروا جميعاً عدا والدته ووالدتى بقيا رغماً عنهما تحت

أحاح أدهم الشديد .

وقفت فى الشرفة وأنا فى حيرة من أمرى .. كيف سأنام فى غرفة واحدة معه، وبالرغم من تأكدى من

عدم تحدثى بصوت مسموع إلا أنه فاجئنى من خلفى هامساً:

- متحمليش هم

أستدرت إليه بدهشة فتابع :

- متقلقيش .. أنا هستناهم لما يدخلوا يناموا وهخرج انام برة

- ولو حد خرج وشافك ؟

قطب جبينه وأطلت نظرة ماكرة من عينيه قائلاً :

- عندك حل تانى؟

صمت بتفكير فتابع بنفس الطريقة:

- أنام جنبك على السرير يعنى؟ .. ولا أقولك أنام على الأرض زى بعضه

شعرت بحرج بالغ وقلت بحيرة كبيرة:

- لا على الأرض ازاي يعنى ميصحش

كاد أن يهتف إلا أنني وضعت يدي على فمه فقال مبتسماً بخفوت وقد نجح بأرياكى:

- أعمل أيه طيب ما انت خايفة مني .. أنت افكرتيني إسكار بجد وهفترسك ولا ايه؟

- بص انا مش خايفة منك ولا حاجة .. طيب ممكن نحط بينا مخده مثلاً ايه رايك؟

قال بمزاح ساخراً:

- طب ايه رأيك نبني حدود ومحدث يعدي إلا بالتأشيرة؟! !

ثم خبط جبينه بكفه قائلاً:

- يوه نسيت أجدد الباسبور بتاعى

حدقت به بسخط وذهبت إلى غرفى بخطوات منفعلة ولحق بى على الفور وعندما دخلت الفراش بدأت

فى وضع وسادة بيننا بهمة عالية ، ابتسم قائلاً:

- هى دى بقى الوسادة الخالية؟!!

لم أجبه واستدرت لأنام فى توتر بالغ فلاحظته يجمع كفيه فوق فمه ويبدأ فى قراءة أذكار النوم ثم

يمسح بها على جسده ثم نظر لى وقال :

- هتقولى أذكار النوم ولا أكمل مسح عليكى ها...!

قلت على الفور:

- لاء هقولها أهو

ولى ظهره لينا وهو يقول مصطنعاً الأسف :

- ياخسارة .. طب والله ما هتعرفى تمسحى زى لعلمك

فقلت حاتقة:

- أظبط تليفونك على معاد السحور بدل ما تروح علينا نومة

فضحك قائلاً:

- أنا عارف انك مش هتعرفى تنامى أصلاً يا حبيبتي

بالفعل لم أستطع النوم فهى المرة الأولى التى يجمعنى به فراش واحد ، و قمت فى وقت السحر

وأيقظت الجميع لطعام السحور ودخلت لأوقظ أدهم وعندما استيقظ قام بحركة مفاجأة وتراجع للخلف

واضعا الوسادة أمام صدره وهو يقول :

- أنا ايه اللى جانبى هنا أنت عملتى فيا ايه يا متوحشة

كتمت ضحكاتى بصعوبة وهو ينظر لى متأملاً ضحكاتى التى ينجح دوماً فى انتزاعها منى رغماً عنى

ثم نهض من الفراش قائلاً بجدية أدهشتنى:

- أنا هصلى الفجر فى المسجد وهقعد للضحى يعنى نامى براحتك بعد ما تصلى.. أنا مش هنام تانى

النهاردة.

أنتهى شهر رمضان ونحن مازلنا على تلك الوتيرة .. يعود من عمله قرب آذان المغرب وبعد الإفطار

يذهب للمسجد مباشرة ولا يأتى إلا قرب منتصف الليل وأنا أعط فى نومى ولا أراه إلا ساعة واحدة

نتناول فيها السحور سوياً ويعود للمسجد مرة أخرى لصلاة الفجر.

فى هذا الشهر كنت قد تعودت على وجود أدهم فى حياتى وقد أصبح جزء أصيل من يومياتى، ودون

أن يوجهنى وجدتنى أحافظ على صلاتى تلقائياً وكأن كل شىء يفعله ينتقل إلي عبر موجات غير مرئية

، أهي الصحبة الصالحة كما يقال؟! .. لا أعلم .  
وفى آخر ليلة فى هذا الشهر الكريم كنت أقوم بتبديل فرش السرير وأرتب الوسائد ببهجة وبفرحة قدوم العيد وإذا بصوته يأتينى من الخلف بدنونة خافتة مداعبة:  
- ياليلة العيد أنستينا وجددتى الأمل فينا.. يا ليلة العيد  
أسلوبه الساخر فى الغناء جعلنى أضحك وأنا ألتفت إليه فوجدته يظهر باقة من الزهور كان يخفيها خلف ظهره وقدمها لى قائلاً :  
- كل سنة وانت طيبة .. حاولت أدور على زهرة أحلى منك ملقتش فقولت خلاص بقى اجيب أى حاجة وأمرى لله.  
أنشغلت بباقية الزهور أتأملها ثم أشمها بعمق فسمعتة يقول هامساً :

- يا بخت الورد  
وعندما رفعت عيناى إليه أشاح بوجهه عنى وكأنه يخفى نظرة ما أطلت من عينيه دون أرادته وتنحج وهو يخرج من الغرفة بخطوات مترددة.  
وبرغم حضوره القوى إلا أننى ترددت فى ذهنى كلمة سامح وهو يقول " يا بخته"، لكننى نفضتها سريعاً من رأسى ، ما هذا الضيق الذى أشعر به ! ، لماذا لا أمحوه من ذاكرتى للأبد؟، ولأول مرة أشعر ببعض الندم الحقيقى بدخولى علاقة ما قبل الزواج، فلو كان زوجى هو أول رجل بحياتى لاستمتعت بكلماته أكثر ولكانت هى الأجل والأحلى، أما الآن فلقد أصبحت كالتى عاشت فى منزل أحبته ثم ذهبت لتعيش فى آخر أكثر جمالاً لكنها لا تستطيع أن تنسى منزلها القديم بكل تفاصيله.

( ٢٢ )

كانت سعادتى بالغة عندما فاجأنا هشام برحلة جماعية بصحبتهم هو ومنال زوجته إلى مرسى مطروح التى وقعت فى غرامها من النظرة الأولى وانتظرت بشغف وحماس اللحظة التى سأرى فيها شاطئ الغرام ، ولم يعكر صفوي سوى لحظة دخولنا غرفتنا عندما رأيت سريراً واحداً وأريكة صغيرة نوعاً ما فى زاوية الغرفة ، ولم أستطع وقتها تحديد أيهما كان سبب توتري! .  
ظهر القلق والحيرة على وجهى بقوة وأنا أرتب ملابسنا فى الخزانة بشرود ، أستفتتُ عندما أمسك ذقتى ليدير وجهى نحوه قائلاً ببعض الهدوء الظاهري:  
- أنا مش عايزك تقلقى أوى كدة .. هنا فى كنبه غير السرير ممكن انام عليها..  
وجدتني أنظر إليه لحظات وقد هجرتنى حروفى ، صمتى أربكه قليلاً فترك وجهى واستدار يرتب ملابسه مجدداً فقلت وأنا أنظر إلى ظهره بوجه خالى من التعبير متسائلة:  
- عندنا فى البيت أوضة تانية وسرير تانى ليه مصمم تمام على الكنبه؟  
فسمعتة يجيب برقة خشنة:  
- لأنى حالف انى منمش غير على السرير بتاعنا وانت جنبى  
ساد الصمت بيننا للحظات حتى التفت نحوى وقد رسم ابتسامه على شفثيه قائلاً:



- أنسى كل الحاجات اللى ممكن تضايقك .. أحنا جايين هنا نغير جو ونتفسح.. يالا غيرى هدومك انا هنزل اسأل على شوية حاجات فى الريسيبشن وخرج وتركنى فى الغرفة وحدى وعياني لازالت تتابعه وبادخلى أتسائل عن نوع التربة الصلبة التى خلق منها هذا الرجل .

خرج هشام ومنال دون علمنا يريدون دخول السينما فهم يعلمون أن أدهم لا يحبها بينما ذهبت معه إلى شاطيء الغرام الذى تمنيت رؤيته كثيراً ، وهناك تقمص أدوم دور المرشد السياحي وهو يهتف شارحاً بمزاج:

- شوفى بقى يا ستى.. دى صخرة ليلي مراد .. بس مع المد والجزر فى السنين اللى فاتت بقت فى المية شوية .. وعلى الحتة دى بالظبط كانت قاعدة خالتك ليلي مراد والناحية دى بالظبط كان قاعد عمك حسين صدقى وكانت ليلي مراد بتغنى "أكرهه واحبه أهىء أهىء" ضحكت ثم قلت مصححة لمعلوماته الضحلة :

- يا سلام .. لا الأغنية دى مكنتش فى الفيلم ، دى كانت بتقول "أحب أنتين سوا المية والهوا" ضحك وهويساعدنى على الجلوس قرب الصخرة وجلس بجانبى وأخذ يتأمل البحر بصمت للحظات قبل أن يسألنى :

- منى .. هو انا بقيت أيه عندك؟

بباغتنى سؤاله فقلت بتلغثم:

- انت جوزى؟

نظر نحوى وهو يرفع نظارته الشمسية قائلاً :

- بس؟!!

تلغثمت أكثر قائلة:

- مش دى أكثر علاقة تربط بين أنتين

أعاد نظارته فوق عينيه وعاد ينظر إلى البحر قائلاً بشرود:

- تعرفى؟ .. مش انا أهو قاعد جنبك وماسك أيدك لكن بحس أنك زى الجزيرة البعيدة وأنا بعوم فى

البحر وبصارع الأمواج علشان أوصل لقلبك

شعرت بالخجل من نفسى ولم أجبه فتنفس بعمق ثم نهض قائلاً:

- تعالى نتمشى على الشط شوية

كنت أشعر بارتباك لا أفهمه وأنا أسير بجواره على رمال الشاطيء عاقدة ذراعى فوق صدرى متلهية

بالنظر إلى بعض الأطفال يتسابقون عن يمينى ويضحكون بمرح حتى هاتفنا هشام وتقابلنا معهما

وذهبنا للغذاء ثم للتسوق فى شارع تجارى معروف هناك وهو شار أسكندرية ، جلب لي أدهم منه

سلسال رقيق يمثل شكل قلب بداخل كف مفتوح ، ثم ذهبنا إلى الصلاة فى مسجد العوام وعدنا للتنزة

على الكورنيش وعدنا إلى الفندق وقد نفذت كل قوانا ، ومن شدة الإرهاق لم أشعر بشيء حولى بمجرد

أن لامس جسدى للفراش ونمت بعمق

أستيقظت فزعة فى صباح اليوم التالى على صوت طرقات سريعة على باب غرفتنا ، وبدون تفكير

كعادتى قمت من مكاني مسرعة وفتحت الباب دون ان ألتفت الى أدهم الذى ينام على الأريكة الصغيرة

بصعوبة كبيرة لفارق الطول بينهما ، دخلت منال مندفعة بابتسامة وهى تقول بمرح:

- انتوا لسه نايمين يا كسلانين ..

قطعت كلماتها وهى تنظر إلى أدهم فى دهشة وهو نائم وقالت:

- أيه ده.. هو ادهم نايم على الكنبه ليه؟

تلغثمت ولم تسعبنى سرعة البديهة بمبرر مقنع فتابعته بقلق:

- أنتوا اتخانقتوا ولا ايه؟  
جاءنا صوت أدهم النائم وهو يقوم عن الأريكة قائلاً بعبوس:  
- أنتِ ايه اللي جابك بدرى كده يا منال؟  
تنحنت بخرج وهي تقول:  
- هشام مستنينا تحت علشان نروح حمامات كليوبترا  
فأوماً موافقاً وقال وهو ينهض:  
- ماشى .. يالا انزلى واحنا جايين وراكى

\*\*\*

ذهبنا إلى حمامات كليوبترا أو صخرة كليوبترا كما يقولون ، ابتسمت بدهشة وأنا أشاهد هذا الجمال النادر من المناظر الطبيعية التي لم أحظى بمشاهدتها من قبل ، والمياه تندفع بين الصخور بينما الهواء دافىء وممتع بعيد كل البعد عن الرطوبة وهناك حمام منهم تندفع إليه المياه من كل اتجاه ، أخذنى الأبهار لما أرى لدرجة جعلتني لم أنتبه لصخرة زلقة وكدت أن أسقط لولا تدخل أدهم الذى احتضنى فى اللحظة الأخيرة قبل السقوط ، تسمرت مكانى ولم أتستطع الحركة وهو ينظر لى نظرات مليئة بالشوق واللهفة ، حاولت أن أبتعد بعد ان استيقظت من تجمد اللحظة فتركنى وأمسك يدي وهو يقول:

- خاليكى ماسكة أيدى لحد ما نعدى الصخور دى لحسن تقعى تانى  
أنتهينا من حمامات كليوبترا ليقترح هشام أن نذهب إلى شاطئ عجيبة الذى كنت أسمع عن تداخل ألوان مياهه من قبل ، ولقد أزهنتنى روعة مياهه الصافية بالفعل.

وفجأة ظهر لنا مجموعة فتيات أجنيات يرتدين القليل من الملابس يتسابقن فى اتجاهنا ، فنظرت إلى أدهم بحركة فاجأتني وأدهشتني من نفسي ولم أفهم سبب التفاتتى العصبية تلك فوجدته يغض بصره مركزاً أياه على مياه البحر فقط .

المفاجئة أركبتنا وصدمتنا عندما تعدمت فتاتان منهن الأصطدام به هو بالذات ، لا أعلم لماذا اختاراه ربما بسبب لحيته فكأنهما يخرتبه بطريقتهما الوقحة ، أختل توازنه لقوة الصدمة فهو لم يكن ينظر إليهن من الأساس لذلك سقط على الرمال وسقطنا فوقه بتعمد ، أضطر أن يدفعهما بقوة وغضب وهو ينهض ثم أخذ بيدي وذهب بى سريعاً يجرنى خلفه وهو يستغفر بشكل متكرر وسريع ويهتف بحنق لاعتنا وقاحتهم .

لحقنا بهشام الذى كان يتقدمنا بكثير هو ومنال ورغم ذلك استطاعا أن يرا ما يحدث من بعيد وصحبناهما لنتناول الغذاء فى أحد المطاعم ولكن أدهم كان متوتراً بعض الشيء ولم يكن كعادته فى ألقاء النكات والقفشات ، أنهينا نزهتنا وعدنا إلى الفندق ودخل هو للأغتسال وخرج وقد أحضر لنا النادل العشاء فى الغرفة ، ظل يأكل وهو صامت تماماً وقد أصبح وجهه كقطعة جليد ، ينظر لى ثم يشيح بوجهه عني عدة مرات ثم أنتفض فجأة ودخل الشرفة واستلقى على أرضها يمارس تمارين الضغط بسرعة وعنف وأنا أنظر إليه من مكانى وأتعبج تصرفاته الغريبة .. ماذا حل به ؟!.

حتى خارت قواه فنام كما هو مستلقياً على بطنه فوق أرض الشرفة والعرق يتصبب منه وقد أخذته غفوة، قلفت عليه بشدة وقمت لأوقظه لينام فى الداخل ولكن طرقات الباب جعلتني أتركه ، كنت أظنه العامل ولكنها كانت منال مجدداً ! ،  
أندفعت منال كعادتها للداخل قائلة:

- أعملى حسابك يا منى هشام حجز خلاص ناموا بدرى علشان نعرف نمشى بدرى فى ميعادنا .. فين أدهم نزل ولا ايه؟

- لاء ده فى البلكونة

دخلت منال وهى تنادى عليه ورأته وهو مدداً فى وضعه السابق فتراجعت خطوات للخلف والتفتت نحوى وجذبتنى نحو الفراش قائلة بغضب مكتوم:

- أنا عاوزة أفهم بقى انت فى ايه بينك وبين اخويا بالطبظ .. مرة أدخل الأقيه نايم على الكنبه ومرة تانية على أرض البلكونة .. فهمينى فى ايه!؟

حاولت أن أتهرب من أسالتها التى لانتتهى وهى تقبض على ذراعى بعنف وتكتم غضبها بكلمات قاسية ولم تصدقنى عندما أخبرتها عن سبب نومه هكذا وصاحت:

- والله؟ فجأة كده طلعت فى دماغه يقوم يلعب ضغط فى البلكونة مش كده! ، وامبارح طلعت فى دماغه ينام على الكنبه برضة صح!؟

وجدت نفسى أتصعب عرقاً وأتلعثم فزادت نبرتها حدة وهى تقول:

- لاء بقى انا لازم اعرف فى ايه؟

لم أجد مفراً من قول الحقيقة ، قلت لها كل شىء عن طبيعة علاقتى بأدهم فانسعت عيناها بذهول وهى تتمم:

- معقول يا أدهم .. معقول تعمل فى نفسك كده .. طب ليه

ثم نظرت لى بحدة وقالت:

- وانت ازاى تعملى كده فيه، بقى علشان اخويا طيب وحنين تقومى تفترى عليه كده وتحرميه حقه .. انت ايه يا شيخة

وكانها تذكرت أمر ما فقالت وهى تضرب كفاً بكف متابعة بحدة:

- علشان كده كان متغير بعد البنات ما خبطت فيه !

وعندما لاحظت غباى وجهلى بالربط بين حادثة الشاطيء وما تغيره أجلستنى بقوة على الفراش وكانها تدفعنى وجلست بجوارى قائلة من بين أسنانها بغيط :

- أنا هافهمك يا هانم

إحساسى بالذنب لم يكن بحاجة لكلماتها الحادة فلم أتمالك دموعى وبكيت بشدة واحتقن وجهى وهى تتحدث عن أشياء بطبيعة الرجال أجهلها تماماً .

أستيقظ أدهم على صوت منال الحاد وبكائى وخرج من الشرفة ينظر إلينا بتساؤل مقترباً نحوى وهو ينظر إلى وجهى ودموعى المنسابة فوق صفحته:

- فى ايه يا منى بتعيطى ليه؟

علا نشيجى وتحاشيت النظر إلى وجهه وهى تهتف بضيق:

- كمان بتسألها بتعيط ليه! .. مش كفاية اللى عاملاه فيك .. أنا لازم اقول لاخوها علشان يشوفله حل معاها

وهمت لتخرج من الغرفة فلحقها أدهم وأمسكها من ذراعها بقوة وهو يقول :

- فى ايه يا منال فهمينى .. تقولى لاخوها على ايه؟

- مش عارف فى ايه؟ .. بقى معذباك وحرماك حقوقك وانت ساكت .

أطلت من عينيه نظرة وعيد حقيقية وهو يشير لها بسبابته محذراً ويضغط مرفقها بيده الأخرى :

- أياكى تدخل فى علاقتنا تانى .. أنت فاهمة ولا لاء؟ .. عارفة يا منال لو حد عرف الموضوع ده .. لا انت أختى ولا اعرفك بقية حياتى

حررت مرفقها منه وخرجت مسرعة منصاعة لأمره بحنق ، أغلق أدهم الباب خلفها وجاء ليجلس بجوارى وقال بهدوء يناقض غضبه المعتدل بداخله:

- هى كانت جايه ليه؟

أجبتة وأنا أجفف دموعى:

- علشان نقولنا اننا هنمشى الصبح بدرى

أوما برأسه وهو ينهض واقفاً ، وبدون حتى أن يسألنى كيف عرفت منال بالأمر قال:

- طب كفاية عياط يالا نامى .. لما اصحى الفجر هصحيكى نلم حاجتنا.. يالا تصبى على خير  
نمت فى فراشى وأغلق هو الأتوار تاركاً ضوء مصباح صغير خافت واستلقى على الأريكة كما يفعل  
دوماً، هدأت وأغمضت عيناى ولكنى لم أنم أبداً ، رأسى تدور كالمطاحون كارهةً لى نفسى ، تتقلب حياتى  
أمامى بين الماضى والحاضر ، ترى ما الذى فعله أدهم بحياته قبل التزامه استوجب عليه العقاب  
بزواجى منه ! ، بعد دقائق شعرت به يتحرك فى الغرفة ففتحت عيناى ببطىء ، رأيتة يدور فى الغرفة  
يمين ويسار كالنمر فى سجنه ، يدور حول الأريكة ثم يتقدم نحو فراشى وفى مواجعتى ثم يقف لأقل  
من دقيقة ، ثم يعود لما كان عليه ثم يتقدم نحوى ثم يعود ، ظل هكذا لفترة من الوقت ثم خرج مندفعاً  
للشرفة ، وقف بها قليلاً ثم دخل ارتدى ملابسه وفتح باب الغرفة بهدوء وخرج ، أنتفضت من فراشى  
وجريت نحو الشرفة لأرى إلى أين يذهب وبعد قليل وجدته يعبر الطريق أمام الفندق مسرعاً وبدأ  
بالركد على طول الكورنيش .

لم أستطع النوم منذ عدت من الشرفة ، لو لم تكن منال شرحت لي ما يعاينيه أدهم لما فهمت تصرفاته  
الآن ، ولكن الرؤية اتضحت أمامى ولامجال للمواربة وهذا ما جعل الذنب يقتلنى أكثر من ذى قبل ،  
ساعة كاملة مضت قبل أن أشعر بالباب يُفتح من جديد وسمعت أنفاسه الاهثة وهو يغلق الباب بهدوء  
بدل ثيابه وتوضأ ووقف يصلى ويرتل ، أفتتح سورة مريم وصلى بها الركعتين ثم ارتمى على الأريكة  
ونام أخيراً.

\*\*\*

عاد من صلاة الفجر وهو يردد أذكاره فوجدنى مستيقظة وقد بدلت ملابسى وبدأت فى جمع أغراضنا  
استعداداً للمغادرة فقال باقتضاب :

- صباح الخير

ثم شرع فى مساعدتى فى جمع الحقائب وهو يتحاشى النظر نحوى مباشرة بينما كنت انا أراقب  
تصرفاته التى تغيرت وكأنه تبدل إلى شخص آخر لا أعرفه ، اختفت ابتسامته وانطفاً حماسه وتوجهه  
بسببى ، دارت بداخلى مداولات عدة أخذت قرارى وأنا أقرب منه حتى وقفت أمامه فنظر لى باستفهام  
صامت وقلت :

- أحنا حياتنا كدة غلط .. ولازم تتصلح وتبقى حياة عادية

رفع حاجبيه وهو يقول متسانلاً:

- مش فاهم

أشحت بوجهى بحرج وارتباك فأمسك بوجهى ونظر لى قائلاً بهدوء:

- لما نبقى نرجع بيتنا نبقى نتكلم

وعندما ترك وجهى وعاد لعمله لاح لى شبح ابتسامة جذابة تشق طريقها إلى شفثيه عنوة فابتسمت  
بتلقائية وبدأت أنفاسى تنتظم مجدداً .

( ٢٣ )

" ولما رجعتوا أتكلمتى معاه " ؟

قالتها حياء بفضول وحماس وكأنها تشاهد أحد الأفلام العربية وترغب بمعرفة النهاية فابتسمت قائلة:  
- لاء .. واحنا راجعين فى السكة مامته اتصلت وقالتلهم ان والده ضغطه ارتفع وتعبان أوى ومامته  
بتخاف على والده جداً .. أى حاجة تحصله ولو بسيطة تتصل بيهم وتبقى عايزاهم يبقوا جنبها .. ولما  
حاولت أروح معاهم قالى انه مش عاوز أى احتكاك دلوقتى بينى وبين منال خصوصا وهشام هيكون  
موجود وجابنى هنا أبأت عند ماما وكلمنى النهاردة الصبح طمنى على والده ووافق أنى آجى أسلم  
عليكى .. أنت بقى مكلمتيش ليه لم رجعتى من العمرة؟

- يا ستى انا روحت أسلم على ماماتك قالتلى أنك فى مرسى مطروح فقولت بلاش أرخم عليكوا فى  
شهر العسل

قلت بحزن مكررة :

- شهر العسل ؟

نظرت لي حياء نظرة أعرفها تتهمني بها اتهاماً مبطناً بأني المسئولة وحدي عما يحدث وعندما شاهدتني أطرق برأسي أمسكت بيدي متسائلة بخفوت :  
- معقولة لسه مش قادرة تحبيه يامنى !؟

فأجبتها بصدق:

- أدهم أنسان مثالى جدا ومنكرش أنى مبسوطه معاه  
ثم تردت وأنا أتابع حديثي :

- بس أنا كان نفسي أتجوز بشكل مختلف .. زى ما بنشوف فى الأفلام كده .. يحبنى ويبقى بينا قصة حب مولعة تنتهى بالجواز  
ضغطت يدي وهى تقول مؤكدة:

- برافو عليكى .. انت كده جبتي من الآخر .. قصة حب تنتهى بالجواز .. هى فعلا بتنتهى بالجواز وبعد شهر العسل بتدورى على قصة الحب المولعة مش بتلاقيها لأنها زى ما قولتى انتهت بالجواز .. ده إذا رضى يتجوز بعد قصة الحب المولعة اللى بتقولى عليها  
أبتلعت مرارتى مع غصتى وأنا ألمح قصتى مع سامح بين سطور كلماتها فهمت لها بحزن:  
- تقصدى سامح مش كدة

تهدت ببطء وهى تتأهب بمصارحتى بالحقائق غائبة عني:

- وحتى لو كان أتجوزك عمره ما كان هينسى .. ولا انت كنتى هتسى انك عصيتى ربنا بسببه ودايما الحب ده كان هيبقى تعب ليكى ولا ضميرك وتقعدى تقولى ياريتى ماكنت عملت كده ..  
تمتت بتردد وحيرة:

- طب والناس اللى بنشوفهم قدامنا فى كل مكان .. بيحبوا بعض وتبقى بينهم قصة حب وبيتجوزوا  
وبيخلفوا !؟

استندت بظهرها للمقعد وأجابتنى :

- أنت قولتى بنفسك " بنشوفهم " .. لكن بتعرفى أيه اللى بيحصل بينهم وبين بعض جوه بيوتهم ؟ ..  
بتعرفى المشاكل اللى بينهم ؟ .. بتسعميه مثلا وهو بيقولها " ما انت كنتى تعرفينى من ورا أهلك " ؟  
.. بتحسى بدموعها وهى بتشتكى لربنا وبتندم على كدة .. !؟ .. وأوعى تكونى ساذجة لدرجة أنك  
تتصورى أن فى واحدة هتقول كدة قدام الناس ! .. لا بالعكس دى هتحاول تظهر العكس أنهم متفاهمين  
جدا ولسه بيحبوا بعض.

أغمضت عيناى محاولة إقناع نفسي بما تقول وصارحتها بخفوت بأن كلمات سامح مازالت عالقة  
بداخلى وبسببها لا أستطيع الأستمتاع بعاطفة أدهم ولا بكلماته الرقيقة فشدت على يدي مرة أخرى  
وهى تقول بجديّة:

- كل ما فتكرى كلامه الحلو أفتكرى برضة انه كان بيقوله بالكذب مش من قلبه .. أفتكرى أنه مكنش  
كلام خمصوص ليكى دى كانت اسطوانة بتلف على الكل .. لكن جوزك بيحبك بجد وكلامه من قلبه  
وليكى أنت بالذات

همست مرة أخرى وكأني أحداث نفسي فقط:

- بس مش قادرة أحسه

تابعت بنفس الجديّة:

- عارفة ليه .. علشان انت لسه ماتوبتيش يا منى .. لسه محستيش ان علاقتك بسامح ذنب متعلق فى  
رقتك لازم تتوبى عنه بجد .. توبى من الحب ده وانت تشوفى حب جوزك وتحسياه .. نصفى قلبك من  
حب الحرام هتلاقى نفسك بتحبنى الحلال ببساطة ..

قاطع حديثنا الخافت ارتفاع رنين هاتفى معلناً عن اتصال من أدهم وعندما أجبته طلب منى الأستعداد  
للمغادرة وقبل أن ينهى المكالمة قال معتذراً:



وبمجرد أن فتح باب الشقة ودخل وفي يده الصغيرة واليد الأخرى بها أكياس عديدة كبيرة أكياس أخرى ملونة مملوغة بالحلوى والساكر والمثلجات، أسرعت نحوه بشغف متسائلة عن نصيبي من المثلجات فنظر لي بعذوبة وحنان وهو يمد يده بالمثلجات خاصتي فتناولتها منه بلهفة وفرحة وجلسنا أنا وهو والصغيرة نأكلها وهو يقول لها مداعباً:

- لا يا ستي انا بحب المانجة .. انت كده بتضحكى عليا.. وبعدين فين الشفاطة بتاعتي كنت أجلس على مقعد منفصل وهو يجلس على الأريكة بجوارها وبحركة تلقائية قمت من مكاني وجلست بجوارها قائلة:

- أدهم ممكن تفتحلي دي مش عارفة افتحها

قال مشاكساً وهو يأخذها ويفتحها من أجلي :

- كده بيبلاش .. لا لو فتحتها لك لازم أخذ حته موافقة ولا لاء ؟

- موافقة .. بس حته صغيرة

جلسنا نأكل الحلويات الملونة والمثلجات بنهم ومشاعبة حتى خرجت علينا هيام بصياحها المعتاد:

- كده برضة يا أدهم جبتلها كل ده .. عاوز تبوظلي سنانها

قال بمرح :

- انت هتستعبطي هي فين سنانها دي اصلاً

كتمت شهقة كادت أن تخرج من حلقي وأنا أنظر إلى ملابسها المنزلية التي خرجت علينا بها وشعرها

المنساب دون قيود وشعرت بالدماء تندفع في أوردتي وأنا أنقل بصري بينهما بدهشة واتسئل أي

التزام هذا الذي يتحدثون عنه وهما بهذا الأنفلات ، حاولت ألا أظهر علامات الضيق على وجهي قمت

من مكاني لأدخل غرفتي بنزق ولكن رأسي دارت بي وشعرت بخفقان شديد وبرودة في أوصالي

ولكني لم أفقد الوعي ، أنفض أدهم بجزع يحملني إلى غرفتي في سرعة ووضعني ببطء على فراشي

هاتفاً بقلق:

- مالك يا حبيبتي أجيبك دكتور

حاولت أن أتماسك قائلة والدوار يتلاشى :

- لالا انا كويسة أظاير بس حكاية السكر دي رجعتلي تاني

سمعت صوت هيام يأتيني من خلفه هاتفه بثقة وسعادة:

- سكر ايه وبتاع ايه تلاقكي حامل ألف مبروك يا أدهم

حاول أدهم إسكاتها بخرج بينما تورد وجهي بضيق وقلت بخفوت:

- لو سمحت يا أدهم انا مرهقة وعاوزة ارتاح شوية

أعتدل أدهم واقفا وهو يقول موجهاً حديثه نحوها:

- يالا يا هيام هاتي بنتك وتعالى بره علشان تنام شوية

فكرت بقلق وتوجس.. هل سيجلسان وحدهما أيضاً .. لا وألف لا .. فقلت له على الفور قبل أن يخرج:

- أدهم لو سمحت استنى عاوزاك في حاجة مهمة

خرجت هيام وابنتها وتركته وجلست على فراشي ونظرت له بحدة قائلة:

- حلو أوى الألتزام اللي انتوا فيه ده.. هي تقلع النقاب والحجاب قدامك وانت تقعد تهزر معاها

وتبصلها

قال بهدوء:

- طب وفيها ايه؟

منعت صياحي بإعصاب من حديد وأنا أقول منفعلة:

- وفيها أيه؟! .. ازاي تقعد تهزر مع بنت خالتك بالطريقة دي وتبصلها كده

بدت على أدهم ملامح عبثية وهو يقول ببرود:



- مش فاهمك يا منى وأيه المشكلة؟  
بدأت أفقد أعصابى أكثر هاتفة:  
- أنت هتستعبط ولا إيه  
رفع حاجبيه وهو يشير إلى فمى أن أصمت وهو يقول باستفزاز :  
- ششش وطى صوتك  
- مش هاوطى صوتى .. أنت خايف من صوتى يعلى ومش خايف من ربنا  
أزدادت ملامحه عبثاً وهو يقول :  
- ليه بس هو انا بعمل حاجة غلط؟  
قلت بغيظ:  
- ماشى .. أنا كمان بقى أقعد مع أى واحد قريبي واهزر معاه ..أيه رأيك؟  
قال وهو يشير إلى عنقه:  
- أدبحك  
- والله .. واشمعنى بقى  
قال أدهم بهدوء وبطء وتسلية وقد تمكن منى تماماً:  
- علشان هيام أختى فى الرضاعة  
وأطلق ضحكاته العبثية وأقترب وقال بشغف:  
- أحبك وانت غيران  
أحمر وجهى بشدة وحينها أدركت أنه تعمد استفزازى وعدم أخبارى منذ البداية بأن هيام أخته من  
الرضاع ، ففقت من فراشى بنزق وأنا أحاول الحفاظ على ما تبقى لى من ماء وجه وقلت ببرود  
مصطنع:  
- مين ده اللى غيران ! .. أنا بس اضايقت علشان دى منتقبة وكدة  
أوماً ضاحكاً بسخرية مستفزة :  
- آه منا عارف  
صمت محاولة تنظيم أنفاسى من جديد فشعرت به يقترب منى من الخلف ويطوقنى وهو يهمس فى  
أذنى بحب:  
- هو أنتِ كنتى بتقولى أيه وأحنا بنلم الشنط فى مرسى مطروح .. وانا قولتلك لما نرجع بيتنا نتكلم؟

( ٢٤ )

أقشعر جسدى لقربه الشديد وإذا بصوت جرس الباب يرتفع ويعقبه طرقات على باب غرفتنا وصوت  
الصغيرة تنادى :  
- عمو أدهم عمو أدهم .. ماما بتقولك تعالى بسرعة بابا جه  
تركنى وهو يرسل تنهيدة حارة ويركل الفراغ بعصبية ، ابتسمت ولم ألتفت ولكنى لاحظت حركاته  
المتردة التى حسمها أخيراً وهو يتوجه ليمسك بالمقبض ويفتحه بغل متمماً بانفعال متوعداً زوج  
هيام بالويل والثبور !

خرجت خلفه ووقفت فى نهاية الممر الذى يفصل غرف النوم عن بقية الشقة ونظرت من خلف الستار وقد كدت أجزم بأن أدهم سيضربه دون سبب حقيقى !  
- فى آيه يا حسن .. آيه اللى جابك دلوقتى  
قال حسن ببلاهة :

- آيه يا شيخ مش انت اللى قولتلى تعالى عاوز اتكلم معاك  
- قولتلك مليون مرة .. أنا مش شيخ .. أنا زى زيك .. هو أى حد يلتحى يبقى شيخ  
قال حسن معتذراً و مكرراً:  
- خلاص يا شيخ .. أنا آسف

ضرب ادهم كفاً بكف وهو يزفر بحنق فقال حسن على الفور:  
- يالا بقى ناديلى مراتى خالينا نمشى  
- أنت لو كنت جيت فى وقت تانى يمكن كنت أدهالك بسهولة .. لكن بعملتك دى هعذبك عليها  
هدأ أدهم قليلاً وما أن شرع فى الجلوس حتى رأيت هيام تخرج من الغرفة ومرت من أمامى كالطلقة  
وخرجت إليهم هاتفة :

- انت آيه اللى جابك .. اتفضل لو سمحت من هنا  
أستدار أدهم إليها بغضب وقد أشتعلت عيناه احمراراً مما جعلها تبتثر ثورتها وتصمت وهو يقول  
بتحذير:

- أنا محبش أختى تطول لسانها على جوزها مهما حصل .. فاهمة ولا لاء  
شهقت وهى تضع يدها على فمها ثم قالت بخفوت:  
- كدة برضة يا أدهم .. بعد اللى حكتهولك

تدخل حسن زوجها قائلاً وهو يجلس فوق المقعد القريب منه وهو يلوح بيده بضجر:  
- أديك شوفت بنفسك بتكلم معايا ازاي .. ده غير بقى طول النهار حرام وحلال لما زهقتنى فى عيشتى  
أمسكها أدهم من معصمها وجرها برفق إلى الأريكة أجلسها وجلس بجوارها وقد استعاد هدوءه قليلاً:  
- أحنا مش اتكلمنا فى الحكاية كذا مرة ياهيام وقلنا الدعوة تبقى بالحكمة ؟ طريقتك دى بتنفره منك يا  
هيام

أسندت رأسها إلى قبضتها بعجز وقد أوشكت على البكاء قائلة:  
- تعبت يا أدهم .. تعبت ومفيش فايده واللى زاد وغطى عاوزنى أقعد اتفرج معاه على المصارعة اللى  
كلها رجالة عريانة  
زفر حسن بقوة هاتفاً:  
- بطلى مبالغة بقى

رأيت أدهم ينظر إلى هيام نظرة ما وكأنها لغة بينهما فنهضت على الفور وعادت للداخل ومرت بي  
ثانية ولكنها لم تعباً ودخلت غرفتها بانفعال فعدت برأسى تجاه أدهم مرة أخرى فرأيته يقترب من حسن  
قليلاً ويضع يده على ركبته ويطلق برأسه قليلاً وكأنه يبحث عن وسيلة حاسمة يمنع بها شجارهما  
الدائم بسبب التلفاز وبرامجه تلك ، رأيت لمعة ما بعينيه وكأنه وجد كنزاً ثم شد قبضته على حسن  
قائلاً:

- بينى وبينك انا عارف أن هيام بتبالغ .. ما انا أصلى عارفك كويس طول عمرك غيور ودمك حامى  
واستحالة تسمح لمراتك تتفرج على رجالة كل شغلتهم يربوا عضلاتهم فغصب عنها جوزها مش  
هيبقى مالى عينها

غمغم حسن بكلمات مبتورة وهو يشيح بوجهه قليلاً:  
- طبعا يا شيخ

أبتسم أدهم أيتسامة جانبية ساخرة وهو ينهض قائلاً:  
- أنا قولت كده برضة .. انا هدخل اشد عليها واخليلها تخرج تعتذرلك

وقف حسن على الفور قانلاً باهتمام:

- براحة عليها الله يخالك .. هي عصبية بس طيبة وانا لما بضايقها يبقي غضب عنى بس فى الآخر مالناش غير بعض

أوما أدهم برأسه وتركه عائداً للداخل وما أن مر بجوارى حتى غمز لي بطرف عينيه فابتسمت بتلقائية وتبعته حتى دخل الغرفة التى تجلس بها هيام ، عندما دخلنا وجدناها جالسة على طرف الفراش تقرض أظافرها بأسنانها بغيظ وعندما شاهدتنا هبت واقفة وقبل أن تتكلم أشار لها أن تصمت وقال: - مشاكلوا دى عمرها ما هتنتهى طول ما انت فاكرة أنك هتغيريه بعصبتك دى .. بالعكس كده بيعد معاكى أكثر وبيزيد فى تصرفاته وبعد ما كان بيتفرج لوحدده بقى عاوزك تتفرجى معاه .. انت وافقتى عليه من الأول وهو كده وقولتى هغيره وهخاليه زى ما انا عايزة يبقي لازم تتحملى مسؤوليتك لآخر وتغيرى أسلوبك الفاشل ده .. خصوصاً أنك مش بتشتكى منه إلا فى الموضوع ده بس يعنى هو فى المجمل راجل كويس وبيحبك .. والحاجات اللى شايفها حرام فى تصرفاته تتكلمى معاه باللين وبالحكمة ..عصبتك بتهد كل حاجة تنهد ببطء وقال متابعا:

- انا اتكلمت معاه فى الموضوع من باب الغيرة ومتأكد أنه مش هيجبرك تقعدى معاه تانى وتتفرجى .. الباقى بقى عليكى انت .. افتكرى موضوع الدعوة بالقهوة مش بالكلام اللى شرحتهولك قبل كدة .. أستيقظ الطفل وبدأ بالبكاء قاطعاً حديثه الذى كنت أتابعه باهتمام فأمرها أن ترتدى ملابسها وتخرج خلفه ثم غادر الغرفة مغلقاً الباب خلفه ، فتوجهت نحو الطفل وحملته وأنا أرى هيام تجمع حقيبتها الصغيرة بتفكير عميق وهى تغربل كلمات أدهم برأسها فوجدتني أسألها دون مقدمات بفضول شديد انتبانى نحو شخصية هيام التى بدت لى متناقضة للغاية وقلت :

- هيام انت بتحبى جوزك؟

قالت وهى تمط شفقتها كالأطفال :

- بحبه أوى ونفسي يتقبل نصايحي زى ما تقبل لبسي للنقاب بسهولة

تابعت أسألها بنفس الفضول :

- هو انت لبستى النقاب ليه؟

أجابتنى ببساطة:

- لو عاوزة أدلة شرعية دورى بنفسك لكن لو تقصدى أسبابى أنا .. فأنا فضلت فترة طويلة أسمع دروس عن أمهات المؤمنين لحد ما ارتبط بيهم عاطفياً جدا وحسيت أنهم أمهاتى بجد ومن شدة حبي .. ولما كنت بتكسف فى البداية وانا خارجة بيه ليهم لما عرفت انهم كانوا بيغطوا وشهم حبيت أقلدهم .. سألت نفسي ليه لما كنت زمان بحب ممثلة كنت بقلدها فكل حاجة حتى طريقة كلامها ومن غير ما اتكسف وتوكلت على الله ولبسته .

منحتها ظهري لتبدل ملابسها جالسة على طرف الفراش أفكر فى حديثها ، وتذكرت سماح ، عندما أحببتها بالفعل صرت أتبعها كظلها وأقلدها فى كل شىء ، وبعد كل ما مررت به .. ها قد تبين لى أننى كنت أبحث فى الاتجاه الخاطيء عن القدوة التى أحتاجها بالفعل ، حديث هيام وقع فى قلبى موقعاً خاصاً ووجدتني أنجذب بمشاعرى نحو غطاء وجهها الذى كان موضوعاً أمامى ومطوى بعناية ، فتلمسته بشرود فسمعتها تقول من خلفى وقد انتهت من تبديل ملابسها :

- تحبى جريبه ؟

وقبل أن أجيبها جذبتنى مازحة وهى توقفنى أمام المرآة وتلفه حول وجهى مداعبة فضحكت وأنا أنظر إلى وجهى الذى لم يظهر منه سوى عيناى ، فتأملت نفسي وأنا أشعر أننى مقدمة على أمر جلل بحياتى ، نعم هو أمر جلل ولكن قلبى منشرح له .. وبشدة ، وبلا أسباب منطقية غير ذلك .

زادت سرعة دقات قلبي وشعرت بسخونة بوجنتي وفجأة طرق أدهم الباب ودخل بعد سماعه صوت هيام تأذن له ، وقف يتأملني للحظات ، تفاجأت بنفسي قبل أن يتفاجأ هو وهيام عندما استدرت نحوه قائلة:

- أدهم .. أنا عاوزة البس النقاب أتسعت عيناه بينما دهشة هيام لم تتعد لحظة ثم انكبت على وجنتي تقبلها وتحضنني بسعادة

سمعنا صوت زوجها يأتي من الخارج تعجلها ليغادروا قبل أن يحل الظلام ، فأخذت هيام طفلها وخرجت وهي تتوعده فهو لم يصلحها كما يجب حتى الآن.

دون أن تفارقه الدهشة قال:

- ايه اللي طلعتها فى دماغك!؟!

قلت له بابتسامة:

- حبيته

رفع حاجبيه مكرراً سؤاله بطريقة أخرى:

- عن اقتناع؟

قلت مكررة:

- عن حب

سمعنا صوت ضحكة هيام آتية من الخارج يتبعها صوت زوجها منادياً على أدهم يتعجله بنفاذ صبر ، فتركني مستديراً لينصرف فتعلقت بذراعه وعندما التفت نحوي قلت له بتصميم:

- أشتريلى واحد وانت راجع علشان خاطرى

حاول تجاوز صدمته وهو يستعد للمغادرة ثانية ولكنه عاد بوجهه لي مجدداً قائلاً بنظرة ذات معنى:  
- مش هتأخر

أبتسمت وقد تورد وجهي خجلاً وتركته ينصرف وعدت للمرأة مرة أخرى متسائلة " ترى هل سأرى العالم من اتجاه مختلف أجد به ذاتي، لقد طرقت جُل الأبواب فلماذا أتردد فى طرق هذا الباب وقد انشرح صدرى له بلا مقدمات " ؟!

\*\*\*

بدلت ملابسى وأخذتني قدمي نحو المكتبة الصغيرة التي يحتفظ فيها أدهم بكتبه المتنوعة ، سلاسلها وأحجامها الكبيرة أشعرتني بالضجر، فأنا لم أكن يوماً قارئة ، قررت أن أبحث عن أقل الكتب حجماً ، فجدتني عنوان كُيب صغير .. " إنها ملكة " ! .. تعجبت من العنوان وعندما فتحت وجدته به قصصاً قصيرة فأخذت الكُتيب وجلست أقرأ فيه وكأنه أحد كُتب السحر التي يخرج منها يد تختطف من يجرؤ على فتحه ، أختطفنتي القصص القصيرة بداخلة ووجدت دموعي تنساب رغماً عني عندما وصلت إلى عبارة كانت بمثابة تعليق من المؤلف على القصة " وكلما احترمت المرأة نفسها احترمتها من حولها .. فهي ثمينة مادامت أمنية .. فإذا خانت هانت "

كررتها مراراً وتكراراً ، وتابعت القراءة و أنا أبحث عن نفسي بداخل كل قصة أقرأها فيه ، أغلقته فى النهاية وقد انشرح قلبي أكثر لقرارى الأخير مستبشرة ببداية جديدة وعندها سمعت صوت المفتاح يدور فى الباب علمت أنه قد حضر .

وقفتُ أمام المرأة محاولة ارتدائه بمجهودي الشخصى وقد رفضت محاولة أدهم لمساعدتى ، محاولة تذكر الطريقة الحرفية التي ارتدت بها هيام نقابها ، ونجحت فى النهاية فشعرت بالنصر وكأننى كنت

أخوض حرب خاصة وأدهم مازال يضحك من محاولاتي الفاشلة السابقة فالتفت إليه فاتحة ذراعي  
بزهو المنتصر فأطلق صغيراً منغماً ثم قال بإعجاب:

- الله .. إيه الجمال ده كله .. مبروك يا حبيبتي  
فنظرت نظرة سريعة في المرأة أتفقد غطاء وجهي ثم عدت بنظري إليه متسائلة:  
- حاسة أن القماش شفاف شوية .. أنت شايف حاجة؟  
أقترب مني وأمسك برأسي وقبلها قائلاً بحنان:  
- شايف ملكة

نظرت له بتساؤل ، هل يقصد الكُتيب الذي كان بيدي وقت حضوره أم هو مديح فقط؟!.. وقبل أن أتكلم  
رأيته يتوجه نحو خزانة ملابسني ويخرج منها ثوب زفافى ، وضعه على الفراش وتقدم نحوى قائلاً  
بنبرة جمعت الشوق بالحنين فى عبارة واحدة:

- ممكن تلبسي فستان فرحنا؟ .. أصلى مشوفتوش عليكى كويس وقتها  
ترددت وانا انظر الى الثوب الساكن فوق الفراش ثم أنظر إليه فأقترب مني وقال:  
- انا كمان هلبس بدلة الفرح .. علشان نبدأ حياتنا من أول وجديد .. كأننا لسه متجوزين النهاردة..  
ها أيه رأيك؟

أنتزعتى رنين هاتفه من خجلي ورهبتى ولحظات الحسم التى أعيشها الآن، أما هو فلم ينتظر كثيراً  
عندما سمع النغمة المخصصة لرقم والده فتوجه إلى الهاتف على الفور والتقطه فى سرعة مجيباً ،  
شاهدت ملامح وجهه تتغير إلى القلق وهو يقول :  
- حاضر يا أمى .. أنا جاي حالاً بس متكلميش منال فى وقت زى ده علشان متخضش .. حاضر مش  
هتأخر

أنهى المكالمة والتفت نحوى معتذراً :  
- أنا آسف أوى يا حبيبتي لازم أنزل دلوقتى .. بابا تعب تانى وأمى عاوزانى أروحها ومش هتأخر إن  
شاء الله

بتلقائية مددت يدي وانزلت النقاب على وجهي قائلة:  
- طب هاجى معاك

- يا منى هتخرجى دلوقتى ليه بس .. بقولك مش هتأخر  
قلت بتصميم:

- لازم اروح معاك يا أدهم .. كفاية مرضتش تاخذنى المرة اللى فاتت .. نروح سوا ونرجع سوا أيه  
المشكلة

فقال باستسلام وهو يلتقط سلسلة مفاتيحه:  
- طب يالا بسرعة

وعندما أغلقنا أبواب سيارته وبدأ يدير محركها لم يستجب له فكرر المحاولة مرات ومرات ولكن بدون  
فائدة وهو يزفر بحنق :

- ما انا لسه جاي بيها وكانت كويسة  
ظننته يقصدنى بتعليقه فقلت بحزن :

- يعنى انا وشى وحش عليك  
ألتفت نحوى بدهشة ثم قال متعجباً :

- أيه اللى خلاكى تفتكرى كده .. يا حبيبتي ده انت نورتى حياتى من ساعة ما شوفتك  
صمت وأنا ألوم نفسي على سوء ظنى به .. ربما ليس سوء ظن بقدر ما هو عدم ثقة بنفسى ، سمعته  
يقول:

- منى أنا كدة لازم أروح أشوف أى مواصلات فى الموقف .. مش عاوزك تتبهلى معايا أطلعى أنت البيت

- أنا طول عمرى بركب مواصلات يا أدهم أيه اللي هيهيدنى بس .. يالابقى نلحق نروح الموقف ويارب نلاقى حاجة نازلة فى الوقت ده

أوما برأسه موافقاً وترجلنا من السيارة فأغلقها بإحكام وأمسك بيدي وسرنا فى الطريق المؤدى إلى موقف الحافلات ، مرت دقائق ونحن نسير بخطوات واسعة والصمت يرهف سمعه لأنفاسنا ويسمح لأصحاب الذكريات باجترار ماضيهم ، تذكرت الأيام الخوالي وأنا أرى المنحنى المؤدى إلى منزل سماح ، هاجمتنى بصراوة كلماته ونظراته محاولة أشعال حنينى متذكرة أنه هو من أنقذنى مما كان سيحدث لي فى منزل محمد بتدبير من سماح ، وعندما وصلت إلى هذه النقطة من ذكرياتى أعصر قلبي متذكرة كلمات حياء " مش هتحمسى بحب جوزك إلا لما تتوبى من القديم وتندمى عليه " .. كنت قد ظننت أننى قد توبت وندمت بالفعل ولكن هذا الحنين أنبأنى بأننى كنت مخطئة .

- يووه وبعدين بقى

سمعت أدهم يقولها بحنق وكنا قد وصلنا للموقف الحافلات، فالتفت نحوه متسائلة فقال:

- العربيات كلها طلعت من نص ساعة ومفيش غير أتوبيس واحد.

( ٢٥ )

و سعدنا إلى الحافلة ، أشار أدهم إلى أحد المقاعد الزوجية فتوجهت نحوه على الفور و جلست بجانب النافذة وهو جلس بجوارى ثم سمعته يسأل أحد الركاب عن السائق فأجابه الرجل:

- السواق قال هينزل يشرب شاي وزماته جاى

مال أدهم علي أذنى وقال معتذراً بهمس:

- معلىش يامنى .. نزلتك من بيتك متأخر وكمان ركبتك أتوبيس

همست له بمزاح :

- الناس كلها بتركب أتوبيس يا أدهم .. وانا من عامة الشعب وواحدة عليه

أبتسم لدعابتي الهامسة وقال شيئاً لم أسمعاه ، نعم لم أسمعاه حقاً فلقد كنت مذهولة محدقة فى الفتاة التى سعدت للحافلة للتو وتبحث بعينيها المتورمة من البكاء عن مقعد شاعر، فتاة أعرفها جيداً ، لم يطرأ عليها تغير سوى الحجاب الصغير الذى تغطى به شعرها ، لاليس هذا التغير الوحيد ، لقد اكتسب وجهها لون شاحب وغطت ملامحها الرقيقة الناعمة كآبة سوداء ، وعندما جرت عياني على جسدها لاحظت انتفاخ بطنها قليلاً ، وبينما أنا أدقق بها متسائلة عن السبب الذى جعل فتاة كـ ياسمين من الطبقة الثرية تستقل حافلة !، هل هى ظروف خاصة كالتى مررت بها مع أدهم من تعطل سيارته أم ماذا؟! ، سعد خلفها ، يا الله .. معقول .. سماح ! .

وضعت يدي على وجهى بخوف وكأنى أتأكد من غطاء وجهى ، خفت أن يعرفنى ، أن ينظر نحوى ، أن يحدثنى ، لم يتغير سماح أبداً .. مازال وسيماً جذاباً ، ولكن فقط أصبح أكثر عبوساً ، لاحظت يده

تدفعها خفية نحو المقعد الزوجي أمامنا مباشرة، زادت دقات قلبي وهما يجلسان أمامي مباشرة، وقبل أن أنشغل في نوع العلاقة التي تربطه بها رأيته يميل نحوها بحركة عصبية وبصوت حاول أن يجعله منخفض ولكن حنقه جعله يعلو رغماً عنه:

- بقى كده يا ياسمين .. بتعصى أوامرى .. وقدام أبوكى وأمك كمان بدأت صوت بكاؤها يعلو قليلاً وهى تقول :

- كفاية يا سامح حرام عليك .. أنت مسود عيشتى من ساعة ما نزلنا من هناك كفاية - كفاية؟ ... هو انت لسه شوفتى حاجة.. أنا تناقشيني قدامهم وتقوليلي لاء..

قالت بتضرع وبصوت مرهق:

- حرام عليك بقى أرحمنى .. كفاية تعب الحمل

لكزها بغلظة بمرفقة فى أحد جنبها فتأوهت بصوت مرتفع قليلاً وهى تسمعه يتوعدها ثم يقول:

- أخرسى مش عاوز اسمع صوتك

صوت تأوها البانس أصابنى بقلبي كطعنة خنجر وأنا أستمع إليهما ذاهلة ، معقول ، هل هذه ياسمين الرقيقة ، هل هذه قطعة الحلوى الناعمة التى شعرت بالغيرة بسببها فى يوم من الأيام ! .

لم أكن أعلم أن أدهم يتابعهما مثلى وقد لفت نظره فظاظة رجل مع امرأته ولكنه لم يتدخل فى ما لا يعنيه إلا بعد أن لكزها وتأوهت بهذه الطريقة المؤلمة لأى نفس بشرية سوية فمال للأمام على الفور قائلاً بصوت رصين موجهاً حديثه لـ سامح :

- يا أخى ميصحش كدة .. الرسول عليه الصلاة والسلام قال (رفقا بالقوارير) ألتفت له سامح قائلاً بغلظة:

- بقولك ايه يا شيخ لو سمحت متدخلش بينى وبين مراتى

المسكينة بكت بشدة وهى تنظر حولها وكأن تيقنتها من سماعنا لهما قد زاداها ألماً وحرناً ، فتابع زوجها بهدوء:

- يا أخى دى علشان مراتك لازم تكون أرفق بيها من أى حد تانى .. دى أمانة عندك ربنا هيسألك عليها

ألتفت إليها سامح بغطرسة هاتفاً بها:

- عجبك كده يا وش النحس خاليتى اللى يسوى واللى ميسواش يكلم معنا

لم يستطع زوجى أن يضبط أنفعالاته فى هذه اللحظة ولأول مرة أراه يخرج عن طوره وهو ينهض ويجذبه إليه من تلايبه هاتفاً بوعيد:

- والله لو مكانش معنا حريم أخاف أفرعهم كنت عرفتك مين اللى ميسواش يا عديم المروعة

تجمع الناس حولهما وأنا فرعة يكاد وعي أن يطوى جناحيه ويرحل بي ، جامعة قبضتاي فوق قلبي أبعث أبت به بعض الطمأنينة بينما نهضت باكياً وهى تقول لزوجى برجاء:

- أرجوك سيبه

والرجال يحاولون فكك قبضة زوجى عن ملابس سامح تضاعل فى عيناى وأصبح كالعزم يهزه أدهم ببساطة " صل على النبى يا شيخ ، مش كده .. معلىش ، أمسحها فينا "

نظر لى أدهم فوجدنى على وضعى هذا خائفة ، فتركه وهو يدفعه بحدة للخلف و يتوعده أكثر بنظرات حادة ، وقبل أن يجلس مجدداً ليطمأننى وضح أحدهم يده على كتفه وهو يطلب منه أن يبذل مقعده هو

وصديقه معنا للفصل بينهما ، وبدلنا المقاعد بالفعل فأصبحنا بعيداً عنهما بعض الشيء ، أجلسنى بهدوء وجلس بجوارى وهو يمسك يدي قائلاً باعتذار:

- متخافيش .. أنا أسف مقدرتش أمسك أعصابى

هدأت قليلاً وأنا اتابع سامح بنظري وهو يلتفت إليها من وقت لآخر بحركات أنبأتى عن مدى المعاناة التى تعانيها تلك المسكينة الآن على يديه ، ورجل من الخلف يسأل أدهم بدهشة :  
- هو انت تعرفها يا شيخ ؟

التفت أدهم نحوه بتعجب وهو يجيب:

- هو انا لازم أكون أعرفها علشان أذاع عنها .. انا مقدرش أشوف واحدة ست بتتهان قدامى واسكت

صعد السائق محتلاً مقعده بتكاسل ومازال كوب الشاي بيده وبدأت الحافلة بالتحرك ، وأنا ألمح ياسمين تستند برأسها على زجاج النافذة وكأنها تشكى إليه سوء اختيارها وجهل قلبها وظلام حبها.

يا الله .. لا أعلم ماذا أقول لك .. أنها المرة الأولى فى حياتى التى أقول فيها الحمد لله وأنا أتلذذ معناها بهذا الشكل ، يارب .. لقد حرمتنى من البذاءة لتعطينى المروعة والشهامة ، حرمتنى رجل سىء العشرة بذىء اللسان لتعطينى رجل حسن العشرة حلو الكلام، يا الله .. كم فى الكون من مليون سامح لهم غلاف خارجى لامع جاذب .. وبواطنهم خربة كريهة .. مقززة  
وكم من فتاة غرها هذا البريق الاعم وطارت إليه كالفراش الذى يطير إلى النار ليلقى حتفه فى النهاية وهو يظنه النور، لا أملك إلا الحمد من قلبى .. لا أملك إلا شكر وجدانى.

ووجدت نفسى ألف ذراعى الأثنين حول ذراع زوجى وأحتضن ذراعه بقوة وأضمها إلى صدرى لتصل إلى قلبى.. فنظر لي متعجباً فأشرت إليه أن يقترب .. فلما اقترب همست فى أذنه بحنين أتذوق طعمه للمرة الأولى على لسانى قبل قلبى :

- بحبك

رفع رأسه ينظر لي غير مصدق و بأبتسامة دهشة احتلت شفثيه مال نحوى ثانية هامساً:  
- قولتى أياه ؟!

قلت مكررة بصدق

- بحبك ... بحبك أوى

أبتسم هذه المرة أبتسامة عريضة وهو يضم أصابعى بين أصابعه بقوة يغلفها الحنان وهمس فى أذنى:  
- ياه أخيراً.. أحمدي ربنا أننا فى الشارع دلوقتى وإلا مكنش هيحصلك كويس

ضحكت ضحكة خافتة لم يراها على شفثى ولكنه رآها فى عيناى، واصلت ضم ذراعه بقوة إلى صدرى وأرخيت رأسى على كتفه وأغمضت عيونى باسترخاء لم يحدث لى من قبل، وبين الحين والآخر أفتحهما فيذهب نظرى بدون أرادة إلى ياسمين التى أشفقت عليها للغاية فى تلك اللحظة فبرغم ما بها من حزن إلا أنها لا تجد رجل حنون مثل زوجى ترتاح على كتفه مثلى.

ثم توجهت بنظري إلى ظهر الرجل العابس الذى يجلس بجوارها شاعرة بغضب هائل تجاهه .. كيف يتجرأ هذا العابس ويتكلم مع زوجى بتلك الطريقة الفجة .. ووجدتني أتمتم:

- قلة أدب صحيح

وجاء دور زوجى لأتوجه إليه بنظراتى تلك وأنا أرفع رأسى له فوجدته مسترخى تماماً مستنداً برأسه للخلف وتعلو وجهه أبتسامة خفيفة لا يعرف سببها غيرى وهو يردد بخفوت :

- الحمد لله.. الحمد لله.. الحمد لله

عدت أضع رأسى على باسترخاء على كتفه ولأول مرة أنام فى مواصلات عامة ، لا أعلم كم مضى من



الوقت ولكنى صحوت على هزة خفيفة من أدهم وهو يقول:  
- يالا الناس كلها نزلت .. كده هيقولوا علينا لابسين حزام ناسف وعاوزين نفجر الأتوبيس وهو فاضى  
أبتسمت لدعابته وقمت وأنا ممسكه بيديه ، بحثنا عن سيارة أجرة تقلنا إلى بيت والده ، حتى وجدنا  
واحدة ومازلت ممسكة بيده وهو بجوارى وعندها همست له:  
- أدهم .. أنا عاوزاك تحفظنى القرآن .. ممكن؟  
نظر لي بدهشة وكان اليوم هو يوم المفاجآت العالمى وقال بحماس:  
- ممكن طبعاً .. ده انا كده هبقى أول واحد حفظ زوجته القرآن وهما فى شهر العسل  
قلت بتعجب:  
- شهر العسل ايه .. هو مش خلص  
هز رأسه نفيماً وقال بهمس:  
- لااا .. ده لسه هيبتى  
أبتسمت بخجل ونمت على كتفه مرة أخرى حتى وصلنا لمنزل والدته .

\*\*\*

لم تنفذ والدته نصيحته وأتصلت بمنال وجاءت بها هي وهشام، قابلتني والدته بدهشة وهي تنظر لي  
بغطاء الوجه الذى رفعته فور دخولى عندهم بينما قبلنى أختي هشام فرحاً بي ، وقد خالفت منال كل  
توقعاتى وأقبلت نحوى تعانقتنى قائلة:  
- مبروك يا منى .. عقبالى  
سأل أدهم عن حالة والده الصحية فأخبرته منال أنه نائم الآن وحالته لا بأس بها وأن والدته بقلتها  
المعهود جمعتهم حولها بمجرد أن ارتفع ضغط دمه وكعادتها أصرت على تواجدهم بجانبها ، عندما  
سمعتها والدتها نهرتها قائلة:  
- كده يا منال .. بقى مضايقة أنك جيتى لابوكى وهو فى الحالة دى .. ده انا كنت هقولكوا نوديه  
مستشفى يطمنوننا عليه  
- يا ماما حالة ايه ومستشفى ايه .. دى كل الحكاية شوية ضغط .. بابا كويس والحمد لله  
ثم اقتربت من أدهم قائلة بخفوت :  
- بعد كده يا حلو أنت اللى هتدبس لوحك .. هشام خلاص هيرجع الشغل كمان أسبوع  
تفاجأ أدهم ونظر نحو هشام الذى علق مؤكداً:  
- إن شاء الله كلها أسبوع وأخلع  
وعندما شاهد الدموع بدأت تتجمع متزاحمة بعيناي ناظرة له بعتاب اقترب منى وضمنى بخفة قائلة:  
- والله كنت هقولك بكرة الصبح .. أنا لسه عارف النهاردة أساساً

لقد كان الوقت قد تأخر للغاية ولا فرصة لأحدنا للعودة إلى منزله لذلك أصرت والدته أن نقضى الليل  
عندهم ، وبحسب عدد الغرف الموجودة هناك اضطررنا إلى تقسيم أنفسنا فاصطحبتنى منال إلى الغرفة  
الشاغرة بينما أفرش أدهم وهشام الأرائك المتواجدة فى الصالة .  
بعد أن أغلقت منال باب الغرفة اقتربت تجلس بجوارى على طرف الفراش وهي تقول معذرة :  
- متزعلش منى يا منى .. أنت عارفة أنى بحبك بس يعنى اضايقت شوية على أخويا  
قبلت اعتذارها بود وأنا أعانقها ، ثم أحضرت لي بعض من ملابسها التى تتركها كادة فى بيت والدتها  
وبدلت ملابسى ، قضينا بعض الوقت نتسامر فوق الفراش إلى أن نامت منال رغباً عنها ، حاولت أن  
أحذو حذوها ولكن قلبى منعنى النوم رغم الأرهاق فهو يهفو شوقاً إلى زوجى وأفتقده بشدة .

ضحكتُ من حالى الذى تبدل بين ليلة وضحاها وأنا أتسلل خفية حتى لا تشعر منال بخروجى من الغرفة وخرجت أبحث عنه ، سمعته يتسامر مع هشام وضحكاتهم تعلو واحدة بعد الأخرى ثم يقول له أدهم محذراً:

- ششش .. عاوز أمى تسمعنا تيجى تنيمنا بالعافية .. وطى صوتك

- خلاص يا عم أيه كارت الأرهاب اللي الحاجة عملولنا ده

- أيه مش عاجبك .. طب يالا أتخمد بقى

مررتُ بهما وبلا مبالاة ظاهرة توقفت أسألها :

- أنا رايحة أعمل شاي .. حد عاوز

نظرا نحوى بدهشة بينما قال هشام متعجباً :

- من أمتى وأنت بتشربى شاي .. طول عمرك مبتحبيهوش

نظرت إلى أدهم وأبتسمت قائلة :

- بقيت أحبه

- يا بختك يا أدهم .. شوف انا بقالى قد أيه متجوز أختك .. ولحد دلوقتى مش عارف أخاليها تحب

العسلية

ضحك أدهم فتركتهما متوجهة نحو المطبخ لأعد الشاي الوهمي، وضعت براد المياة فوق شعلة النار

ورفعت رأسى للجزء الأعلى من المطبخ مفكرة ، هل سأضطر إلى شرب هذا الشىء الغريب

الذى يحبه الناس وبعد لحظات من التفكير شعرت به يقف على باب المطبخ ثم يقول:

- أنا قلت كدة برضة .. مش هتعرفى طريق الشاي والسكر

أقترب من مكانى ورفع سبابته وهو يشير إلى علبة الشاي وقبل أن أمسك به ألتقطه سريعاً وقال وهو

يشير إلى وجنته بابتسامة:

- كده ببلاش ؟

ابتسمت وطبعت قبلة سريعة على وجنته ثم مددت يدي لأخذ العلبة منه ولكنه قال:

- لالا لا دي معجبتيش .. واحدة تانية بسرعة

قالها وأشار الى شفثيه ، فهل أرفض وأضحى بالشاي الذى صرت أعشقه ! .

\*\*\*

أستيقظت صباحاً على صوت طرقات على باب الغرفة وصوت أدهم ينادينا لنستيقظ ، نهضت منال

بتكاسل وعدلت من مظهرها ثم فتحت له الباب ، أعتدلت بسرعة وحاولت ترتيب شعري المبعثر حول

وجهى وقد دخل الغرفة قائلة بنشاط :

- صباح الخير

أخذت منال منشفتها وهى تجيبه ثم تقول متسائلة:

- بابا عامل أيه دلوقتى

أخبرها أنه استقيظ وينتظرنا على مائدة الإفطار التى أعدته والدته كاوليمة فرحة باستعادة زوجها

صحته الغالية ،

ثم التفت نحوى قائلاً بابتسامته الجذابة:

- صباح الشهد

ابتسمت بخجل وخرجت من الغرفة مسرعة تاركة قلبى مازال قابعاً بين يديه منذ الأمس.

أحتضننى والده بحنان مرحباً بي قبل أن يجلسنى عن يمينه حول مائدة الإفطار بينما جلست زوجته فى

الاتجاه الآخر تربت على يده من وقت لآخر بحب وعطف جذب شجونى وتعلقت نظراتى بهما ، بينما

أخذ أدهم وهشام بتبادل الدعابات، ولا نملك أنا ومنال ووالدته ووالده إلا الضحك المتواصل.  
بعد لحظات ألتقت عيناى بعينييه ، وفى غفلة ممن حولنا أرسل لى قبلة فى الهواء ، تلقيتها بأبتسامه  
خجلة وتركت عيناى تبتعد عنه فهو لن يتوقف أبداً والتفت إلى والد أدهم وقلت له بود:

- بس حضرتك يا عمى خضتنا عليك أمبارح .. الحمد لله أنك بخير  
أجابنى بحنان:

- والله يا بنتى ده أنا اللى عاوز أتأسفلكوا .. جيناكوا فى وقت زى ده وكمان فى المواصلات زى جوزك  
ما قالى

لا أعلم لماذا أنتشى قلبى سعادة وهو يقول كلمة "جوزك" .. أول مرة أشعر أنى أنتمى إليه وأنا سعيدة  
بذلك

- بصرحة يا بابا هى اللى صممت تيجى معايا تظمن عليك  
قال والده معاتباً وهو يحدث زوجته:

- أحنا مش اتفقنا قبل كده تبطلنى قلقك ده .. أنا مش عارف أنت بتخافى عليا أوى كده ليه  
- متقولش كده .. لو مكنتش أخاف عليك أومال أخاف على مين .. هو أنت فى حد فحنيتهك يا أبو أدهم

جذبنى ذلك الرجل العطوف فوجدتنى أقول له بابتسامه مشاكسة:

- أنا كده عرفت السرى يا عمى

- سر أيه يا بنتى؟

- سر حنيت أدهم .. أتاريتها بالوراثة بقى

نظر لى أدهم نظرة حب طويلة أعقبته تنهيدة من منال وهى تقول:

- شايف يا عم هشام الحب .. أظاهر كده أنا راحت عليا

قال هشام على الفور:

- لا يا حبيبتى مين ده اللى راحت عليه .. أنا ساكت بس بستمع بوصلة الحب الصباحية دى

لكن أنت عارفة أنك فى الحقة الشمال

أنهينا الإفطار سريعاً ودخلت لأرتداء ملابسى وأستأذنا الجميع للعودة إلى عش الزوجية لكن والدته  
أبت بشدة ورفضت رفضاً قاطعاً وأصرت على بقائنا للغداء ، حارب معها أدهم كثيرا ولكن دون فائدة ،  
وأخيراً أستخدمت والدته السلاح المناسب الذى لا يستطيع مقاومته قائلة:

- يا واد أقعد ده أنا عاملة ورق عنب وكوارع

نسى أدهم أحلامه الرومانسية قائلاً بلهفة:

- بتقولى أيه يا حاجة .. ورق عنب وكوارع .. أشطة عليكى

أستسلمنا فى النهاية وتبعنا والدته إلى المطبخ لمساعدتها فى الطبخ وقد ساد جو من المرح لا ينقصه  
إلا والدتى وتكون الصورة قد أكتملت، هكذا عبرت عن ما يجول بخاطرى أمام منال و والدة أدهم التى  
قالت على الفور:

- والله فيكى الخير يا بنتى خديتها من على لسانى .. روحى يا منال أطلبى الحاجة ونادينى أكلهما

وهكذا اكتملت الصورة وبها كل من أحب ، الصورة المثالية للعائلة البسيطة المحبة التى كنت أتمناها،

لا أعلم لماذا دمعت عيني وأنا أنظر إلى الجميع على طاولة الغداء وهم يأكلون ويتضحكون.

لم يلاحظ أحد منهم دمعة سريعة فرت من عيني فمسحتها على الفور ولكننى كنت مخطئة ، لقد كان  
هناك من يلاحظ ويراقبنى عن بُعد ويسألنى بقلبه عن هذه الدمعة، لم ألاحظه إلا عندما سمعت صوت

والدته تقول:

- مالك يا أدهم مبتاكلش ليه يا حبيبي؟  
أنتبهت له وهو ينظر لي بشرود ويقول لو الدته :  
- مفيش حاجة يا ماما ..

أنهى طعامه وقام ليغسل يديه ، قمت خلفه مباشرة و وقفت بجواره أحمل المنشفة وأنتظره ، أنتهى من غسل يديه وأخذ المنشفة مني وهو يقول بصوت خفيض:  
- ايه الدمة اللي شوفتها دى ..ممكن أعرف؟

قلت بجرج:

- أنا أسفه .. مش عارفة جرائي أيه

- أنت فاكرائي هقتنع كده يعنى؟

قاطعنا صوت والدته تنادينى لأستكمل طعامى ، جلسنا بصحبتهم قليلاً قبل أن ينهض هشام راغباً فى المغادرة لموعده لديه واصطحب معه زوجته ووالدتي ، ودلقت إلى الغرفة لأبدل ثيابي بينما لحقتى أدهم وأصر بشدة أن يعلم سبب دموعى .

لم أكن أعلم سببها بوضوح ولم يستطع أدهم استيعاب أن صورة أسرتهم هى التى أثارت شجونى فخنقتنى غصة فى حلقى وانفجرت دموعى وأنفجر معها ألم السنين وأنا ألتهت قائلة :

- أنا عمرى ما كنت زى كل البنات ..كل البنات كان ليه أب أو أخ يخذها فى حضنه ويعلمها الحياة فيها أيه .. والناس بره البيت شكلها أيه .. إلا أنا

عمره ما خدنى فى حضنه .. عمره ما طبطب عليا .. حتى لما كان بيشفونى تعبانة كان أكبر حاجة يقولها "دوها للدكتور مش عاوز وجع دماغ"

عمره ماقالى مالك يا بنتى .. بنات أيه اللى المفروض أبقي زيهم؟! .. البنات اللى كنت بشوفهم متعلقين فى ايد أبهاتهم واخواتهم .. البنات اللى كنت بدخل بيوتهم وبشوف علاقتهم بأبهاتهم أحس أن أنا يتيمة ..أنا يتيمة من زمان أوى يا أدهم .. أنا كنت دايمًا يتيمة حتى لما كان أبويا عايش .. علشان كده لما مات محستش أنه مات ..لأنه كان ميت من زمان أوى .. زى ما مشاعرى كانت ميتة من ناحيته من زمان .. ومش كده وبس .. أنت عارف؟! .. أنا كنت بشوف زمايلى فى المدرسة ماشين جنب أخوتهم بيوصلوهم ويبطمونوا عليهم .. وأنا الوحيدة اللى أخويا بيمشى ورايا .. بيراقبنى ..عاورنى أغلط أى غلطة علشان يفضحنى ..ليه؟! .. ليه كده ..طب ما يفهمنى الدنيا .. ما يفهمنى الولاد بيعملوا ايه وأزاي أخلى بالى من نفسى .. ما يفهمنى يا أدهم بدل ما يراقبنى ويحسنى أنى مجرمة على طول .. أنت عارف يا أدهم أنا أيه أول حاجة حبتها فيك؟! ..علاقتك بأختك .. حبك ليه هزارك معاها .. بتتفاهموا مع بعض بالنظرة .. ده غير علاقتك بأختك هيام ووقوفك جنبها وخوفك عليها ونصحك ليه ولجوزها وتحملك مسؤوليتها ومسؤولية بنتها ..أتمنيت تبقى أخويا أنا .. وأبويا أنا .. أنا كنت محرومة دايمًا يا أدهم .. حرمونى من كل المشاعر اللى فى الدنيا .. أنا كنت عاملة زى الأرض العطشانة اللى بتترجى أى نقطة مية حتى لو كانت دموع.

وفى هذه اللحظة زاد أنتفاضى ونشيجى وكأنى أنعى إليه نفسى وهى على قيد الحياة، حتى قدماي تخلتا عنى وتركتنى لأسقط .. لكن أدهم أنتبه لذلك رغم دموعه وأحتضننى ، سكنت فى أحضانه فترة ليست بالقصيرة أبكى وأبكى وأرتعش ، وكأنى أروى جوارحى من عطش السنين العجاف، ظل أدهم صامتا وهو يحتضننى بقوة ويربت على ظهرى ويمسح على شعرى وعندما هدأت وسكنت تماما قال بعد تنهيدة طويلة:

- ياه يا منى .. متكلمتيش ليه معايا من زمان .. عارفة يا حبيبتى أنا أيه أكثر حاجة كانت بتصبرنى على بعدك عنى ؟ مش عارف ليه كنت دايمًا بحس أنك بنتى وأنتك محتاجانى زى منال بالطبط .. أنت كل أهلى وأنا كل أهلك يا منى ، ترضى بيا ولا ترفضى ؟ نظرت له من بين دموعى بامتنان وقلت بنبرة متعبة:  
- المهم أنت اللى ترضى عنى بعد كل اللى عملته فيك

- عملتى أيه ؟.. أنتِ حبتينى وختينى أحبك .. هو ده اللى أنتِ عملتیه فيا.. هو فى أجمل من كده

شعرت براحة نفسية لم أشعر بها من قبل ، شعرت أننى قد وجدت نفسى أخيراً ، لقد كانت أكبر غلطة أرتكبتها هى بحثى عن نفسى فى مكان آخر بعيداً عن هذا الحبيب ، ولا أعلم لماذا عادت إلى مشاعر لم أشعر بها من قبل نحو أبى ووجدت نفسى أبكى لوفاته وكأنى لم أعلم بها إلا اليوم !.

\*\*\*

وكأنى أرى الطريق إلى منزلى لأول مرة ! ، فتحتُ زجاج النافذة وبدأت أستمتع بالهواء العليل، وكان النسيم قد شعر بذلك فأخذ يداعب وجهى من وراء غطاءه ، لاحظ أدهم استمتعاً فتركنى حتى انتهيت وعدت ألتصق به وأقول:

- الله المكان هنا حلو أوى

قال بتعجب:

- غريبة أوى ..أنتِ أول مرة تشوفيه ولا ايه

- بجد حاسة أنى أول مرة أشوفه

- طب الحقى بقى استمتعى بيه .. أمبارح هشام كلمنى على فرصة كويسة أوى معاه هناك وانا وافقت .. يعنى هنسافر بعد امتحاناتك على طول بإذن الله

تعلقت بذراعه وقلت بسعادة:

- بجد يا أدهم .. يعنى هنبقى مع هشام فى نفس البلد

أجاب مؤكداً ثم تابع بابتسامة:

- وخذى بقى المفاجأة الكبيرة دى .. هشام أول ما يسافر هيرتب نفسه علشان بيعت ياخذ مامتك

وتسافر معانا .. أحنأ أتكلمنا فى الموضوع ده امبارح وهو عارف انها مش مرتاحة مع طارق ومراته

وانتِ عارفة هى ومنال بيحبوا بعض ازاي

ضغطت على يده من فرط سعادتى وكدت أحتضنه فى سيارة الأجرة فضحك بخفوت وهو ينظر لى بحنو بالغ ويستكمل حديثه:

- مسألتيش يعنى هنعمل أيه فى دراستك !؟

أرخيت رأسى على كتفه قائلة:

- مش مهم

ضحك ثانية وقال:

- هنبقى ننزل على الامتحانات

شعرت فى هذه اللحظة بأن أدهم حقق لى أعلى أمنياتى ، سوف يجمعنى بكل من أحب فى مكان واحد،

وسيبعد بي عن القلق والذكريات الأليمة المقرزة ، أزداد حبه بداخلى وقد تحولت نبضات قلبى إلى

طرقات تطرق باب قلبه .

\*\*\*

عندما دخلنا بيتنا وقفت مكاني بخجل وكأنى أدخل بيته للمرة الأولى ،نظر لى وهو يقول بتساؤل:

- فى ايه مالك؟  
تورد وجهى بحمرة خفيفة بمزيج من السعادة والتوتر والخجل وقلت بخفوت:  
- مفيش بس حاسه أنى أول مرة أدخل بيتك  
أقترب منى بابتسامة شغوفة وهو يقول:  
- لاه ده أنتِ حالتك دى ميتسكتش عليها أبداً  
فررت منه بخجل وهو يتابعنى بنظرات جريئة متفحصة آراها فى عينيه صريحة للمرة الأولى وهو  
يزفر بنفاذ صبر قائلاً:  
- يالا أدخلى البسي فستان فرحنا  
قلت مداعبة:  
- وأنت مش هتلبس بدلة الفرحة؟  
قال بمزيج من المزاح والحنين:  
- طبعاً هلبسها .. فى عريس يحضر فرحه اسبور كده

\*\*\*

منحنى أدهم مهلة مفتوحة من الوقت لأستعد وأرتدى فستان زفافى .. نظرت فى المرآة وأنا أضع  
لمساتى الأخيرة على وجهى بعد أن ثبت الوشاح الأبيض أسفل شعرى المرفوع، ثم وقفت أتأمل  
ملامحى بثقة وأخذت أدور حول نفسى متأملة نواحى ثوبى المزينة بالتل الأبيض، تأخرت بعض الوقت  
حتى أنهيت فسمعتة يطرق الباب وهو يقول مداعباً:  
- كده بقى خدتى وقت مضاعف وهحسبه من الوقت بدل الضايح .. خلاص ولا لسه ؟  
أستدرت فى مواجهة باب الغرفة وقلبى يخفق بجنون وقلت :  
- خلاص

فتح الباب ببطء و دخل بخطوات هادئة ، نظرت إلى حلتته الرائعة ، كانت به وسامة وجاذبية لم  
أشاهدها من قبل ، وقد علت وجهه ابتسامة رضا وشوق مطولة مختطلة بنظرات لم آراها فى عينيه  
من قبل وكأنه كان يخبئها لتلك اللحظة ، لم يترك كلمة مديح إلا وقالها لم يترك كلمة غزل إلا وغازلنى  
بها حتى ذابت مشاعرى وأشتاق له قلبى ، ولأول مرة أسمع منه هذا الدعاء ( اللهم جنبنا الشيطان  
وجنب الشيطان ما رزقتنا ) .

ونزلت علينا ستائر الوصال .... ولم يعد بيننا شىء محال ... وصعد بى فوق كل التلال  
وقذف بى فى بحر الخيال ..... ولم يعد حبنا كلام يقال .... وأصبح زوجى هو معنى الجمال  
وذقت معه كل حب حلال

\*\*\*

## الأخير

من المؤكد أن السماء لم تتغير منذ خلقها الله وكذلك البحار والهواء ، فلماذا فى بعض الأحيان نتصور أن هناك تغيراً ما قد طرأ على الأشياء والأماكن؟! ، لماذا نعبر طريق بسعادة وفرحة قد كنا نعبره من قبل كثيراً ولكن بقلوب حزينة وعيون بائسة؟! ، تحين لحظة ما نظن فيها بأن الطريق قد اختلف ، هو لم يختلف ، نحن من اختلفنا ، أو بمعنى أدق حدث ما جعل مشاعرنا تجاهه تختلف ، فأصبحنا نرى طيور السماء تنشد بسعادة وترفرف بقوة بعد أن كنا نظن أنها تندفع نحو الهاوية ، رأيناها تلمس مياه البحر للصيد أو الشرب بعد أن كدنا نظن أنها تقدم على الأنتحار وفى اللحظة الأخيرة تتراجع ، نشعر بالنسيم يداعبنا بعد أن كدنا نظن أنه يصفعنا ويدفعنا للخلف غير عابىء بسقوطنا .  
تتكشف أمامنا حقيقة قد غابت عنا أو نحن من غبنا عنها وهى أننا نرى العالم حولنا من داخلنا أولاً ، فتعكس تلك الرؤيا فى مرآة عيوننا التى يطل الفؤاد من خلف زجاجها البراق اللامع ، ليجعلنا نرى بها ما حوته صدورنا وما تغلغل فى أعماقنا لذلك قيل " كُن جميلاً ترى الوجود جميلاً " .

- هى مرسى مطروح اهلوت كده ليه!؟

رفعتُ رأسي لأنظر إليه بابتسامة براءة دون أجابة ، ثم عدت متأملة فى الصفحة الزرقاء الممتدة أمامى فأعاد سؤاله مكرراً وهو يضغط أصابعى الحبيسة بين أصابعه برفق قائلاً بالأحاح:

- بقول مرسى مطروح اهلوت كده ليه؟

أبتسمت ثانية متحاشية النظر إليه قائلة :

- معرفش

ضحك من شدة خجلي وقال مشاكساً:

- بس أنا بقى عارف

ضربتُ ذراعه بقبضتى وهو مازال يضحك بشغف يستفز اللون القانى الذى يحب أن يختلط به لون بشرتى على أثر كلماته ، وحتى وإن لم يره بسبب غطاء وجهى ولكنه يكتفى بتخيله وأنا أهتف بتبرم :

- قولتلك بطل تكسفننى كل شوية يا أدهم

ضحك مجدداً يشاكسنى وهو يقول :

- خلاص والله هحاول ابقى مؤدب .. محاولة مش وعد

كدت أن أضرب ذراعه بتبرم مرة أخرى ولكن ارتفع رنين هاتفى يوقفنى، حثنى أدهم على السير وأنا أخرج هاتفى من حقيبتى الصغيرة ، أبتسمتُ عندما رأيت اسم حياء تنير به شاشة هاتفى فقلت له على الفور:

- دى حياء صاحبتى

- سلميلى عليها

قطبت جبينى نظرت إليه شذراً فقال سريعاً :

- متسلميش عليها

وأخيرا وقبل أن ينقطع الرنين أجبتها بسعادة يفشى سرها نبرة صوتي :

- السلام عليكم ... حياء وحشتيني

زفرت حياء بقوة ثم قالت :

- اشهد أن لا اله إلا الله .. ايه يا بنتي بقالك أسبوع قافلته تليفونك ليه ؟ قلقتيني جدا

ابتسمت وألقيت نظرة نحو أدهم السائر بجوارى متأملاً في البحر وقلت بصوت حاولت أن اجعله خافتاً:

- معلش يا حياء أصل أحنأ في مرسى مطروح بقالنا أسبوع

أستوعبت حياء الأختلاف الذى طرأ على نبرة صوتي وقالت بتساؤل مزيف:

- بتعملوا ايه في مرسى مطروح؟

أخفيت كلماتي أكثر أجيبها :

- يعنى .. أجازة

هتفت حياء مداعبة بمزاح قائلة:

- أوباللا .. يا حلوة يا بلحة يا مقمعة .. شرفتي اخواتك الاربعة

ضحكت بشدة فنظر لي أدهم بابتسامة ثم عاد بعينيه إلى البحر مرة أخرى ومازالت ابتسامته عالقة

بشفتيه فقلت أحاول إسكاتها :

- أسكتي بقى .. ده انت فضيحة

ضحكت حياء بسعادة وقالت على الفور:

- خلاص يا ستي مش هطول عليكى بقى .. لما ترجعى القاهرة كلميني على طول .. سلام

أنهيت المكالمة وشرعت بإعادة الهاتف إلى حقيبتي بينما رفع أدهم نظارته الشمسية للأعلى قليلاً وهو

ينظر إلي ويدندن بمزاح قائلاً:

- يا حلوة يا بلحة يا مقمعة .. شرفتي اخواتك الاربعة

نظرت له بذهول وقد احمر وجهي بشدة وصرخت به:

- أنت كنت مركز معانا للدرجادي !!

ضحك بقوة وهو يلف كتفي بذراعه فدفعته بعيداً بضجر، أنجح أحياناً فيتركني ثم يعود ليضمني ثانية

ولكن لا تزال ضحكاته المتواليه تشعرني بمزيج عجيب من الحنق .. والحب .

\*\*\*

عدت من مرسى مطروح بروح جديدة وقد تبدل حالى وكأني فتاة أخرى تماماً واختلفت نظرتي لكل ما

حولى ، انشغلت بدراستي وصارت علاقتي بـ حياء علاقة هاتفية عن طريق الهاتف فقط فهي أيضا

انشغلت فى دراسة جديدة بدأت بها فى أحد المعاهد الشرعية الأكاديمية ، زادت انشغالى واعبائى بعد

معرفتي بنبأ حملى ولكن سعادتي طغت على كل ما دونها من مشاعر ومع الوقت وبمساعدة أدهم خفت

الأعباء قليلاً وبدأت أعتادها ، حتى تجاوزت اختبارات نهاية العام ، وعندها أخبرنى أدهم بأنه قد حان

وقت الاستعداد للسفر للخارج فهاتفت حياء ورجوتها أن تأتيني لأراها وأجلس معها قليلاً قبل سفرى

فالحمل يستنزف كل طاقاتي ، وافقت حياء على الفور وحددت معى موعد وجاءت لزيارتي بالفعل ،

احتضنتها بشوق جارف أرحب بها وعندما جلسنا وسألتنى عن أحوالى وماذا فعلت فى الشهور

الماضية بدأت أقص عليها كل ما حدث معى بما فيها مقابلتى مع سامح وياسمين فى الحافلة .

كانت تستمع لي بعيون متسعة دهشة وقلق وعندما انتهيت من حديثي رأيتها تحرك رأسها غير

مصدقة وهى تقول بشرود:



- ياه .. معقول !

ثم تابعت ساخرة :

- قال وانا اللي كان ضميري بيأبني بسببه

ثم ابتسمت فجأة وأمسكت بيدي وشدت عليها فشعرت بقشعريرة تسرى بجسدي عندما سمعتها تقول :

- ياه يا منى .. ده ربنا حنين أوى علينا احنا الاتنين يا بنتي

ثم تمتمت تشكر الله وتحمده من قلبها فقلت على الفور :

- أنا كمان عملت كده يا حياء.. فضلت أحمد ربنا واشكره .. ده مش بس ربنا راف بيا وخلي واحد زي

ده يسبني .. لاء كمان رزقني بزواج حنين وعطوف زي أدهم .. صحيح ربنا مبيأخدش منا حاجة غير

لما يدينا حاجة تانية أحسن منها بكثير

أبتسمت حياء بعيون دامعة ثم قالت بمزاح متسائلة:

- يعنى بعنى القضية وبقيتى تحبى الشاي ؟

ضحكت وانا أومىء برأسي مؤكدة فتابعت بتأثر مصطنع :

- مبروك عقبال القهوة

بادلتها مزاحاً بمزاح قائلة:

- عقبالك يا حياء

تنحنت وهى تبتسم بخجل مصطنع قائلة:

- قريب ان شاء الله

أتسعت عيناى متفاجأة فقالت على الفور:

- مالك اندهشتى كدة ليه .. انت عارفة انا بيتقدملى عريس مع موسم حصاد

ضحكت وانا اتشبت بيدها متسائلة بلهفة:

- مين ده .. وأهلك رأيهم أيه .. ووافقتى عليه ولا لسه .. اعترفى

قالت بتفكير:

- ده زميلي فى المعهد الشرعى وصاحب زوج جيهان صاحبتى .. جيهان قالتلى انه متابع تحركاتى من

بداية السنة وعاوز يتقدملى قبل ما نبدأ فى الامتحانات بتاعتنا بس انا طلبت منها نقعد مع بعض الأول

فى كافتريا المعهد علشان لو مفيش نصيب ميحصلش مشاكل زي كل مرة فى البيت

صمت قليلاً أفكر بحديثها ثم قلت متسائلة:

- ده كده يبقى مش جاهز للجواز طالما لسه بيدرس

نظرت لى شذراً هاتفة:

- أعمل فيكى أية يا هبله انت .. يابنتى ده معهد دراسات عليا يعنى هتلاقى فيه مهندسين ودكاترة

ومحاميين وغيرهم كتير وكلهم ناس اتخرجوا وبيشتغلوا .. ده احنا معانا ناس معديا الأربعين سنة

هزرت رأسي بفهم ثم تسائلت:

- طب ومتقديش معاه فى البيت ليه .. اشمعنى فى المعهد

- علشان كل مرة بيجبلى حد وبرفض لأى سبب البيت كله بيتقلب عليا كأنى عملت جريمة .. وانا مش

ناقصة يا منى كفاية اللي بيحصلى منهم من ساعة ما رفضت سامح ..

قطعت حديثها فجأة وافتتت نحوى متسائلة عندما وجدت عيناى تجوب أرجاء شقتى بشرود :

- مالك؟

- رغم انى ليا فيها ذكريات جميلة مع أدهم لكن مش حابة أفضل ساكنة فى مكان ممكن يفكرنى بالذنب

اللى كنت فيه زمان .. ويمكن ده أكثر سبب مخاليني مبسوطه من السفر

قالت حياء بتعجب :

- ياه يا منى للدرجة دى

قلت وأنا أشعر بالأشمزاز من تاريخى الغابر :

- قد أياه زعلانه من نفسى وخايفة من ذنبى وبدعى ربنا يسامحنى ليل ونهار.. أنا مش عارفة كنت مستعجلة على الحب ليه.. لو كنت اهتميت بمذاكرتى وصاحبت بنات محترمة فى الكلية مكنتش هتبهدل كده .. والله أعلم كان هيحصلى أياه وربنا سترنى بستره .. كان زمانى احتفظت بمشاعرى كلها لجوزى ومحستش معاه بتأنيب الضمير اللى بحسه مع أدهم .. شدت حياء على يدي وقالت بثقة :

- يا بنتى انت توبتى وانا أحسبك مخلصه فى توبتك .. والدليل على كده الحالة اللى أنت فيها دلوقتى .. يا منى التائب من الذنب كمن لا ذنب له .. و ضميرك ده شىء طبيعى يتعبك شوية لكن لما تحسنى معاملتك لزوجك وتحبيه أكثر هتحسى بالراحة .. واللى بيفتكر ذنبه كل شوية دى علامة كويسة أوى لأنه بيفضل طول الوقت منكسر لله وبيجدد توبته دائماً.

\*\*\*

ألتفت بعض الفتيات داخل المعهد الشرعى وفى الكافتريا وعلى إحدى الطاولات حول حياء وهى تقوم بشرح المخلص الذى عملت على إعداده طوال السنة الدراسية لمادة مقارنة الأديان ، وبحماس شديد أخذت تجيب أسألتهن حول المادة ، حتى قطع حديثهن اقتراب أحدهم ثم بجرأة يسحب مقعداً ليجالسهن قائلاً بابتسامة ممطوطة :

- ممكن احضر الشرح

أتسعت أعين الفتيات وقبل أن تهتف حياء به معلنة قلة ذوقه شعر الشاب بمن يسحبه من مرفقه ليجعله يستقيم واقفاً مرة أخرى ، مالت جيهان نحو أذن حياء هامسة:

- هو ده أسامة

نظرت لها حياء بجزع وهمست:

- الكائن اللازج ده !

هزت جيهان رأسها نفيًا وهى تحاول كتم ضحكتها قائلة بخفوت :

- لا .. التانى

أعدت حياء رأسها إليهما مرة أخرة وشاهدت أسامة يسحب الشاب الآخر من مرفقه بخشونة وينظر إليه بنظرات حادة وهو يأمره بالأبتعاد عنهن ولا يكرر تلك المحاولات السمجة التى لا تتناسب مع كونه طالب فى إحدى الأماكن التى تدرس المواد الشرعية.

حسنت حياء الأمر وهى تصرف نظرها عنهما وتعود به إلى صديقاتها قائلة بجدية :

- يالا بقى نكمل الفصل اللى مش عاوز يخلص ده .

وتابعت شرح المتبقى من هذه الجزئية بنفس الحماس الذى لا يخلو من المزاح وهى تشعر بأنه يلاحظها عن قرب ، منتظراً النصف ساعة المتبقية على مواعدهما بنفاد صبر.

\*\*\*

حضر زوج صديقتها جيهان إلى المعهد بناء على الموعد المحدد سابقاً ، وبناء على طلب حياء جلس الأربعة حول طاولة واحدة كبيرة فى مشهد قد تكرر سابقاً مما جعلها تبتسم ساخرة بداخلها متعجبة مما يحدث لها ، انشغلت جيهان بالحديث مع زوجها لئتركا لهما المجال للحديث سوياً بدون تدخل وصممت حياء تنتظره يبدأ بالكلام فساد الصمت للحظات ، حاولت هى أن تتحدث كما تفعل مع كل

شخص يتقدم لطلب الزواج منها وتغمره بالأسئلة والتفسيرات والتحقيقات ولكنها ابتلعت لسانها ولا تعلم كيف تستعيده ، قرر قطع الصمت أخيراً بعد ان انتهى من نظراته المتفحصة قانلاً بهدوء:  
- ازيك يا أنسة حياء  
- الحمد لله

- عايزة تسأليني على حاجة الأول قبل ما اتكلم؟  
حاولت استعادة "جبروتها" المعتاد مع العرسان ولكنها فشلت هذه المرة ووجدت نفسها تقول:

- أنا عاوزة البس النقاب ووالدى مش موافق.  
أستعاد رباط جأشه عندما شعر بضعفها وقال بابتسامة خفيفة :  
- بس انا موافق ..  
أبتعلت ريقها وهى تحاول أن تبدو أكثر سيطرة على الموقف وقالت :  
- حضرتك محامى مش كده ؟  
- ايوه  
صمتت فقال متابعا :

- بس متقلقيش .. كل مهنة فيها الحلو وفيها الوحش .. وانا بحاول على قد ما اقدر ابعد عن أى شبهة وماقبلش قضية فيها شبهة ظلم أو حرام تنفست الصعداء وهى تتمتم:  
- ممتاز

لم تعقب بأكثر من هذا فانطلق فى الحديث وبدأ يتحدث عن نفسه وعائلته وأخوته وكيف التزم و المصاعب التى يواجهها بسبب اللحية وإن كانت خفيفة فى عمله وتمسكه بها رغم كل شىء، ثم اختتم حديثه وهو يقول بنظرة أحببتها :  
- على فكرة أنت متكلمتيش خالص  
ثم تابع بابتسامة مداعبة :  
- بس انا عارف ليه  
أعدلت فى جلستها وهى تتسائل بارتباك :  
- ليه ؟

أتبسم بثقة وحاول أن يكون صوته خفيضاً وهو يتكأ على سطح الطاولة قبل أن يلقي نظرة نحو صديقه وزوجته ، وعندما وجدها مازالا منشغلان بالحديث سوياً ، نظر إليها بأعين تقول الكثير وقال :  
- هقولك بعد كتب الكتاب إن شاء الله  
نهضت حياء واقفة متوترة وهى تقول بتعجل :  
- طيب نستخير الأول وربنا يبسر.. عن أدنكوا  
ألتفت جيهان لنهوضها المفاجأ وقبل أن تسألها كانت قد غادرت على الفور بخطوات مرتبكة.

\*\*\*

كانت جلسة رؤية شرعية معتادة فى المنزل ، لم تخلو بالطبع من كلمات والدتها المرحة به وبعائلته ومن بعض كلمات والدها المقتضبة والتى تعبر عن أستيائه من اللحية ووصفه للملتحين بالتشدد الزائد فى الدين ، لكن أسامة كان بالتعقل الكافى الذى جعله يجيب بلباقة وعبارات هادئة لا تفسد الأمر برمته ، بينما جلست حياء بالداخل بصحبة والدته ، وبعد قليل أتت والدتها لتحثها على الخروج للجلوس معه قليلاً كما هو المعتاد ، بمجرد خروجها لاحظت نظرات والدها تتابع حركاتها وكلما نظرت

إليه وجدت في عينيه نظرة حادة تشير إلى الرفض ، وبرغم التأثير السلبي الذي وقع بها موقع حزين إلا أنها تناسبها تماماً عندما سمعته يقول بجرح مكرراً نفس عبارته في المعهد :  
- أزيك يا أنسة حياء ؟

لم تستطع النظر إليه بشكل حقيقي إلا نظرات خاطفة وهي تجيبه بكلمات قليلة ، نهض والدها وتركهما وأنصرف بضجر ، لقد كانت تظن أنه سيبدء بالحديث عندما ينفرد بها ولكنه لم يفعل ، كان ينظر للأسفل مطرقاً بوجهه ويبدو عليه التوتر بعض الشيء وكان عدوى القلق قد أنتقلت إليه منها مما شجعها إلى النظر إليه ملياً ، فاجأها بنظرة متفحصة وقد رفع وجهه وقال :  
- أخبار المذاكرة أيه

- الحمد لله

- طب أخبار الملخصات اللي بتعملها أيه

- أبتسمت وقالت :

- تمام

- قال بهدوء :

- طب ممكن أحجز نسخة ، خصوصاً لمادة مقارنة الأديان؟

- أبتسمت مرة أخرى وقد ذكرها خفية بالموقف الذي حدث بالمعهد ، فتابع قائلاً بدعابة:

- متخافيش مش هاخدها ببلاش ..هاديكي ملخص لمادة المواريث

- نظرت نظرة خاطفة ثم قالت بخفوت :

- بجد محتاجها جداً .. المادة دي صعبة أوى

- مال للأمام قليلاً وتابع بخفوت وشغف :

- متقلقيش أنا هبقى أشرحها لك بطريقة سهلة جداً!!!

لم تمض ثواني حتى عاد والدها مرة أخرى فنهضت وغادرت الحجرة ودلفت للداخل تنضم للنساء التي تبادلن الأبتسامات واحدة تلو الأخرى وهن ينظرن إلى تلون وجهها الذي لم يجعل من الصعوبة التكهّن بقرارها .

- بمجرد أنصرفهم دخل والدها غرفتها وقال بعصبية :

- ده بيقول عاوز يكتب الكتاب على طول

- قالت والدتها على الفور بتفهم :

- آه علشان يعرف يقعد معاها ويتكلموا

- أجابها بعصبية أكبر :

- كل الناس بتتخطب وبيقعدوا مع بعض برضة .. سمعتوش عن حاجة اسمها خطوبة

- قالت حياء على الفور :

- طب نستخير يا بابا الأول

- لوح بيده وهتف بضيق وقد لمح القبول بوجهها :

- أنت حره .. أنا مش هضغط عليكى بس لو حصل حاجة بعد كده متجيش تعيطيلي .. أنت اللي اختارتيه وأنت اللي تتحملى النتيجة لوحك من غير ما تفتحى بؤك بعد كده بكلمة.

أنهى كلماته الحانقة وخرج على الفور وتبعته والدتها محاولة تهدئته ، أما هي فقد احتقن وجهها

بشدة بالدماء ولمعت عينيها بالدموع رغماً عنها . نعم هي اختارت على أساس الدين والأخلاق ، ولقد شاهدت بعض من تعاملاته في المعهد خلال الأيام السابقة منذ عرفت برغبته للزواج منها ، لم تجد فيه

ما يسيء ولكن في النهاية تحتاج الفتاة أن تشعر بان بيت أبيها سيسعها لو لجأت إليه في يوم من

الأيام ، لماذا يقطع عليها الطريق ويهددها بعدم الوقوف بجوارها اذا حدث لها ما تكرهه وتستعبده ،

لماذا يشعرها أنها بمجرد قبولها به سوف تنقطع من رعاية أبيها وحمايته، هي تعلم أنه ليس تهديد أو

توعد فقط ، فلقد فعل ذلك بالفعل مع أخوتها جميعاً . عند هبوب أى عاصفة مفاجأة على بيت أحدهن وتأتى للجوء له يصرخ بها " ماليش دعوى أنتِ اللي أختارتيه " .  
شعرت أنها بمثابة الصعود إلى سفينة حياتها التى ستحملها إلى الطريق التى كانت تتمناه وتحلم به ولكن على يقين أنها إذا قررت اللجوء إلى المرفأ عند حدوث أى عطل بفعل رياح الأيام فستجده موصداً بوجهها ، أى أنها رحلة بلا عودة.  
أضطربت وخفق قلبها بشدة وهى تقف بين يدي الله تطلب منه المعونة والرشاد وحسن التصرف ، فهى وحدها تماماً ومُخيرة بين الرفض والقبول ولكن ستتحمل نتائج أى منهما وحدها ، أستخارت الله كثيراً ولجأت إليه بكل ما أوتى لها من خشوع أيام وليالى ، وبعد كل مرة لا تشعر سوى بالراحة النفسية الكبيرة التى تدفعها دفعاً نحو القبول .  
وجاء القرار بالموافقة صلداً وهى تتغاضى عن كل الأنتقاضات التى وجهت لها بعد إعلانها الموافقة ، وتم تحديد موعداً لعقد القران بعد عشرة أيام فقط وقد فشلت جميع محاولاتها معه لتأجيل الموعد قليلاً ولكنه كان مصراً للغاية وهو يحاول اقناعها قائلاً:  
- الامتحانات قربت .. عاوز أعرف اشرحك براحتى .. و انتِ عارفة المواريث صعبة ومحتاجة شرح بضمير

\*\*\*

تم عقد القران فى إحدى قاعات المساجد الكبيرة ، قاعة النساء فى الطابق الثانى وقاعة الرجال فى الأسفل ، وبعد رحلة التوقيع على العقد تقبل كل منهما التهانى من الأهل والأصدقاء ، بابتسامة منتشية جلس بجوارها وتعالى أصوات الزغاريد وهو يخرج علبة قطيفة بها خاتم الزواج ويمد يده ببطء ليتناول أطراف أصابعها ، أما هى فقد شعرت فقشعيرية تسرى بجسدها كالتيار الكهربائى للمستته الأولى ، نعم اللمسة الأولى تختلف اختلافاً كبيراً ، فهى بالنسبة لها ليست لمسة فقط لأطراف الأصابع وإنما هى لمسة للقلب مباشرة ، الآن فقط تفهمت كلماتي المعذبة عندما كنت أقول لها: "كان نفسى أدهم يبقى أول راجل فى حياتى .. كنت هاحس بيه بشكل مختلف " .  
وضع الخاتم فى أصبعها ثم همس بخفوت :  
- مبروك

لم يستطع الحديث أكثر من هذا، فنظرات الفتيات كانت تلاحقهما بإصرار حتى أنتهى الوقت المخصص للحفل ، ذهب بعد دعوة والدتها ليتناول العشاء معها فى منزلها و اجلستهما والدتها فى غرفة بمفردهما وقد جهزت لهما العشاء المعتاد فى مثل هذه المناسبات ، لم تستطع هى أن تأكل إلا قليلاً بسبب نظراته الجريئة المتأملّة والابتسامة الشغوفة المشاكسة التى تعلو ثغره والتى زادتها أرتباكاً وتلعثمًا ، وأخيراً نظرت إليه بارتباك حاولت أن تغلفه بالثبات وهى تقول :

- أيه؟!!

رفع حاجبيه بتسائل وقال :

- فى أيه؟!!

- بطل تبصلى كده

أستند بمرفقه على الطاولة وقال بثقة :

- أبص براحتي .. أيه هغض البصر عن مراتي كمان ولا أيه؟  
أطرقت برأسها فمد يده ورفع رأسها بأنامله بهدوء ونظر لها نظرات مُحاصِرة وهو يقول :  
- بقالى كام سنة جوايا كلام كثير عاوز أقولها لك  
نظرت له متعجبة وقالت :

- كام سنة ازاي .. أنت مشوفتنيش غير من السنة دي  
وكأننى كنت أدرك أنها لحظة مناسبة لأتطفل عليهما برسالة نصية أرسلتها لها فى تلك  
اللحظة وعندما قرأت حياء الرسالة أبتسمت رغماً عنها وكأنها ترانى أخرج لها لسانى الآن  
أشاكسها ، فالرسالة كانت مكونة من كلمتين فقط " يا بخته " ! .  
أخفت ابتسامتها سريعاً قبل أن يسألها عن سرها والتفتت نحوه تكرر سؤالها السابق  
وقالت :

- مجاوبتنيش على سؤالى .. كام سنة ازاي ؟!  
تناول كفيها بين كفيه وقال بحب :

- أصل أنت أول حب فى حياتى كلها .. أنا من زمان أوى وأنا محوش كلام كثير علشان  
اقوله لمراتى وبس .. وكنت خايف أوى أحسن اللى اتجوزها مقدرش احبها .. لكن أول ما  
شوفتك حسيت أنك مراتى من سنين وان الكلام ده كنت محوشهولك أنت بالذات .. علشان  
كده كنت تقريبا براقبك وبراقب طريقة كلامك مع كل الناس اللى فى المعهد حتى لما كنتى  
بتتكلّمى فى التليفون .. كل حاجة كنتى بتعملها كنت واخذ بالى منها  
ثم مال قليلا ليقترّب أكثر وقال بهمس :

- فاكدة لما قعدنا مع بعض فى المعهد وانتِ كنتى ساكتة وأنا قولتلك انى عارف انتِ ساكتة  
ليه وقولتلك هقولك بعد كتب الكتاب ؟

اومات برأسها بصمت فأرسل تنهيدة طويلة ولم تفارقه أبتسامته وقد أطلت من عينيه  
النظرة التى أحببتها من قبل وهو يقول :

- متكلمتنيش علشان كنتى بتعملى المستحيل علشان تخبى نظرة الراحة والقبول اللى طلّت  
من عنكى غصب عنك.

أرتبكت وحاولت نفى ما قاله وهى تقول بترفع :  
- لا أبدا مش كده يعنى

أبتسم وهو يأخذ أصابعها بين أصابعه بقوة وحنان مستشعراً ملمسها وهو يتأمل وجهها  
وبيده الأخرى يلامس وجنتها بأنامله قانلاً:

- أنتِ حبتينى زى ما انا حبيتك بالظبط .. أحنا الاتنين بنحب بعض من زمان أوى .. من قبل  
ما نتقابل وكنا شايلين مشاعرنا لبعض والحمد لله ربنا وفقنا لبعض أخيراً ..

ثم تابع مشاكساً بمزاح :

- دوختينى يا شيخة حرام عليكى

أبتسمت وهى تشيح بوجهها خجلاً وفرحاً به ، مشاعر كثيرة متداخلة بين حمد الله وشكره  
وبين مشاعر الحب الحقيقية التى تشعر بها معه ، فها هى قد تدوقت الحب الحقيقى التى  
كانت تبحث عنه وتنتظره بلا تعجل أو ملل ، وها هو قد أتى يحث الخطى نحوها ويلتهم  
المسافات إلتهاماً .

\*\*\*

وضعتُ قلمي وقد انتهيت من سرد حكايتي متسائلة " لمَ العجلة والنصيب آتي لا محالة، لمَ  
ننشغل كفتيات بصنع تمثالاً وهمياً لحب رجل ، بينما ننسى صنع أنفسنا لنكون حلم كل  
رجل " .

\*\*\*

تمت بحمد الله

يليه رواية " إغتصاب ولكن .. تحت سقف واحد "